

ПЕТӖ 1926 ВОСЯНЬ

ЛЭДЗӖНЫ: КОМИ РЕСПУБЛИКАСА ГИЖЫСЬ КОТЫР, ПЕЧАТЬ ДА ЮӖР
СЕТАН КОМИ РЕСПУБЛИКАСА АГЕНТСТВО

ВОЙВЫВ КОДЗУВ



ISSN 0134-4323

БЫД ТӖЛЫССЯ ЛИТЕРАТУРНО-ХУДОЖЕСТВЕННОЙ ЖУРНАЛ

10 ЙИРЫМ (ОКТЯБРЬ) 2010

ТАЙӖ НОМЕРЫН:

Михаил ЕЛЬКИН. ВогӖгӖрся . Кывбурьяс	3
Олег УЛЯШЕВ. Комдорсянь КоммуӖдз . ВосьтысьӖм-вись- тасьӖм	9
Василий ЛОДЫГИН. ЧибльӖг	22
ЗАРНИ ЛЮСЯ. Выль кывбурьяс	41
Виктор НАПАЛКОВ. Войся ангел . Роман	43

В.Т.ЧИСТАЛЁВЛЫ — 120

Диана ХОЛОПОВА. **Тима ВеньӖн ентьюгьд чужанінын** .. 66

И.А.БУНИНЛЫ — 140

Иван БУНИН. **Кык висьт** 70

Обложка вылын снимокыс **Альберт ЛогиновӖн**.

© «Войвыв кодзув» («Северная звезда»), 2010 г.

СЫКТЫВКАР

СЕВЕРНАЯ ЗВЕЗДА



***Ежемесячный
литературно-художественный
журнал***



Учредители:

СОЮЗ ПИСАТЕЛЕЙ РЕСПУБЛИКИ КОМИ

**АГЕНТСТВО РЕСПУБЛИКИ КОМИ ПО ПЕЧАТИ
И МАССОВЫМ КОММУНИКАЦИЯМ**



РЕДАКЦИОННАЯ КОЛЛЕГИЯ:

Главный редактор

ЕЛЬКИН М.А.

Зам. гл. редактора

ПОЛУГРУДОВ А.В.

Ответственный
секретарь

КИЧИГИН И.Н.

КОЗЛОВ Е.В.

ЛИМЕРОВА В.А.

ТИМИН В.В.

УЛЬЯНОВ А.В.





Вогөгөрся

* * *

И бара войыс лунсö венö,
И некод пемыдсьыс оз видз...
И войыс кодзула, но меным
Дзик веськодь енэжыслөн мич.

И енвевт шöрас тöлысь койтöм
Оз кыпöд олан руös войт —
Му весьтас кывтысь эзысь мойдыс
Оз гажöд менö и оз дойд.

И весиг Выль во гаж кор öйö,
Ме сэки йöз дорö ог пет —
Мый ассиян войтырыслы вöзъя?
Мед метög гажöдчöны, мед...

Шог мөвпъяс песысь — кодлы кола,
Öд гажöдчыны абу вын...
Кузь төвбыд лöня узьö лолöй,
И сьöлөм тулысöдзыс кын...

* * *

Асыввывсö алöй кыа визьö
Кизялöма шондi зарни кизьöн.

Öзтiс тулыс ловъяыслысь вирсö!
Сьöлөм пытшкысь сывдiс чорзьöм сирсö.

Майбыр, енвевт лöзовъягыд кеня!
Егыр-расыс — быттö ая-эня.

Сійӧн кыскӧ кызъяс-козъяс ордӧ —
Карсыс татчӧ вола быттӧ гортӧ.

Батьсянь-мамсянь вичмис меным олӧм.
Егыр-рассянь — кывбуралысь лолӧй.

Медся ёна чужанінкӧд йитӧ —
Егыр-рассянь бокин лолӧй битӧм.

Кодыр татчӧ вола — кык пӧв ола:
Морт да ссылысь лӧбач тані лола.

Тані чужан му быд емӧн-корйӧн
Олӧмс да ссыланкывйӧс дорйӧ...

* * *

Кӧть кольӧма радейтан кадыс —
Да тулысыс сӧлӧмлы матыс.

Дзик вӧр-ва моз сӧлӧмӧй ловзӧ —
Лӧнь керкаын сылы оз овсы.

Зэв кыпыда тіпкыны пондӧ...
А тӧлыслысь ыпъялысь шонді

Кыз эшкынсӧ му вывсыс кулӧ
Да кок увтӧ ыркӧдӧ ульӧн.

Но шӧйта ме гӧпъяссыс повтӧг
И здукъясӧн серавла ковтӧг.

А нывъясыс! Лолӧ и синмӧ
Быд видзӧдлас шоныда инмӧ.

Ой, унатор тулысыс мойдӧ —
Да сійӧ тай сӧлӧмс дойдӧ,

Мый кольӧма радейтан кадыс,
Кӧть тулысыс сӧлӧмлы матыс...

* * *

Рифмуйтлі мусӧ и вӧрсӧ,
Васӧ и юсӧ и йӧрсӧ.

Рифмуйтлі рытсӧ и войсӧ!
Долысӧ, жугыльсӧ, дойсӧ...

Таласӧ и мӧдлапӧвсӧ!
Юргӧмсӧ, ызгӧмсӧ, чӧвсӧ.

Рифмуйтлі гожом и тулыс
Копырӧн ас чужан мулы.

Зэр шы и гымыслыс равзӧм —
Рифмуйтлі олӧмын ставсӧ.

Сӧмын тай «радейта» кылыс
Мыйлакӧ нэмӧ эз ылав.

Бокиті исковтис ёльӧн,
Рифмуйттӧг сідзи и коли...

Турунвиж

Гожӧмланы пӧлыньтчис тулыслӧн тасыс!
Турунвиж бипурӧн ыпмуні расыс.

Турунвиж саридзӧн ойдӧма виддзыс —
Мудзӧма мичлунсӧ му улас видзны.

Весигтӧ сынӧдыс турунвиж кӧра —
Турунвиж шыяс ме кыла веж вӧрас.

Турунвиж пемыдӧн вевттӧыссьӧ войыс...
Турунвиж бикиньяс ывлаыс койӧ!

Шоныд зарниӧн ывлаыс тырас

* * *

Зэрӧ век, оз ланьтлы лич.
Дзикӧдз поводдяыс дзугсис.
Ваын вӧр и ваын видз —
Некыдз гожӧмыс оз пуксьы.

А ме зэрӧмсьыд ог пов,
Ветла вӧрса туйӧд-вожӧд,
Гашкӧ, кӧнкӧ,— вошӧм лов,—
Меным паныдасяс гожӧм.

Гашкӧ, туйсӧ потшис нюр,
Воис пикӧ, сьӧлӧмшӧрыд:
Петан ордымыс оз сюр
Гожӧмыслы пемыд вӧрысь.

А ме вӧрад шӧйтны чож!
Босьта сойбордийӧдыс сійӧс —
Мекӧд сэсса оз нин вош,
Паськыд нюрӧ, вутшӧяс пиас.

Ӧтув ставсӧ вуджам ми
Вӧрса туйӧд, быттӧ вокӧяс!

Кутчысьомён, ки на ки,
Чужан грездö сыкөд локтам.

Сиктса войтыр сэсся дыр
Бурён казътыласны тайös:
Кыдзи коркö парма пыр
Сиктö гожомсö ме вайи.

* * *

Шоныд зарнийön ывлаыс тырас...
Кокни кымөрön зарниас пыра.

Сэсся муыслön туруна мойдö
Уся вылісянь ичöтик войтön.

Дзоридз кйдыслы шоныдös сета —
Сэсся видз шöрас дзоридзön пета.

Арöдз көртася сөнöда иддзön
Кыддза распытшса дзоляник виддзö.

Мулысь эбössö идз пырыс босьта,
Пытшкысь шогсö да висьомсö косьта.

Сэсся видз весьтас кокньыда лыба
Колип сьылана кельыдлöz ыбас.

Бара төлөдзыс шудаön лола...
Төвсö төвъя. А гожомнас — ола!

* * *

Гожся лун йывсьыс мый нин и шуны?
Мудзöм каньпи моз вугралö луныс.

Мый нин висьтавын веж кыз пу йывсьыс?
Сылön веж пиын кодлыкö сьывсьö.

Сэні, вож вылас, ичöтик пемös
Оз и тыдав, а сьыланыс — шемös!

Быттö гожöмыс вож вылас дзолгö...
Кысьö сьыланыс кыздздорса ёлькөд.

Гажа лун шөрö кыз дорас локсяс...
Майбыр луныс да, мыйысь и шогся?

Ичöt пемöслön сьыланыс эзысь —
Мездас сьölөмös жугыльлун везысь.

Майбыр муыс, и вöрыс, и ваыс!
Гожся сынöдас кизьöртöм маыс...

* * *

Гажа лунъяс, шоныд рытьяс нуö
Тури тöвъянінö, ылі муö.

Керка пельӧс пыкӧ вугыр шатьӧй...
Копыр тэныд, гожӧмӧй, да аттьӧ.

Менам сьолём восьтан жугыль висьтö
Бөрья шоньд югөрьяссö кисьтö.

Ас кодъыс жӧ югыд, шань да мича!
Сійӧ менӧ тӱлысӧдзыс видзас...

Съокыд горөдө вөтөссө йитөма...
Жовсө курыдсьыс лёкөда-вида мөй?
Вөтөс курыдсьыс ас динө матыста —
Өнө олөмлөн сэтшөми кадыс да...

* * *

— 7 —

И öнi, кор татчаньö вола —
Сэк горт дiнö кежавны пола...
Оз, гашкö, и сибöдлы дорас,
Грек вöчöмсьыс ачымöс ёрас.

И лэбöны лунвылö арын
Юсь-дзодзöг...
А ме вуджи карö,
Да карас и вужйöдiс олөм...
А грезд... Грездöй мöдъяскöд олö.

Ме эмбурөн некор эг лыддьысь,
Но вузалi гортöс — и быттьö
Лов гажöдысь нöрысыс кыри,
А сьölөмлы öзыныс быри...

* * *

Ыпмунлi гөгөр — и кусi...
Шондiыс быттьö эз вöv.
Гыясөн серöдiс юсö
Лым чиръяс гудралысь тöv.

Сөнiксъыс ывлаыс тэська...
Енэж он аддзывлы дон —
Быттьökö зэвтöма весьтö
Ас кыöm дöраысь вон.

Оз кыскы кыз пуа нöрыс,
Некысь оз сюр гажаин.
Виддзыс, и юыс, и вöрыс —
Быдтор мем дöзмöдö син.

Мустөм и керкаса чöвлун...
Личкöма сьölөмöс мөвп:
Збыль мöй нö шудаөн вöвлi?
Гашкö, и томнас эг вöv...

Весигтö йöз сьылөм горас
Сьыланөн йитчыны дыш.
Шöйта да ывлалысь ёра
Ме водзын абутөм мыж.

❖ ❖ ❖

Комдорсянь Коммуөдз

ВОСЬТЫСЬӨМ-ВИСЬТАСЬӨМ

*«Ми комияс, ми мөдлапөвса козьяс,
Ми некор огө куснясьой, кыз росьяс».*

Коми.

«Видзөда комияс вылө да шензя. Дзик оланінныс кодьось. Пермякьяс олөны козья вөрьясын. Пермяк — козья тіль кодь, пемыг, гуся дума, родысь, неуна вөй. Зыраньяс пожөма ягьясын олөны. Зыран — пожөма яг кодь осьса, вылын юра, веськы сюрсаа».*

Карабулгар.

Вөй көр кыйысьяс

Коми морт! Видза, коми морт!

Комиясөн шусям. Мыйла? Морт оз төд. А *мортыс* — мый лоө?

Мортыс аланьясөн, важ осетиньясөн, лоө *дженьыг нэма*. Насянь кыйыс воөма. Сөмын тай комияс нэм пом абу артавлөмаось, олөм абу орьөдлөмаось, комияс асланьыс бергөдөмаось. Эм кө енэжын лэбалысь *орт*, сідзкө, эм му тальысь *му-орт*. Эм кө му тальысь *му-орт*, сідзкө, эм юын уялысь *ю-орт*, мортлөн ёрт. *Орт* пырыс *морт* морткөд ёртась, орт пырыс *ёрт* ёрткөд мортась. Орт морта-мортөс, ёрта-ёртөс ловнас көрталө-йитө.

Йөграяс *мортөс* шуөны кум. Савроматьяссянь воөма кыйыс, сзки тшөтш ласкысьлөма комиы. Миянөс пө степса съөд йөз шулөмаось *сара кумөн*, веж юра йөзөн, *зарни комиөн*. Юрсины миян пөляслөн, видзөдтө, югыдджык вөлөма степса дорысь, зарниа юрси.

Да өд савроматьясөдз нин мусө төдлөмаось *Комгорнас, коми горнас*. Сэк нин комияс асьнысө коминас шулөмаось. Да и войдөрджык, *комвагорса Коммуас* олігөн на, коми мортөн шусьывлісны, көнкө. А, гашкө, мөд ног кызкө. Кыдзи, өні ог нин төдөй. Важөн вуніс сійө нимным. Уна сюрс во өд комияслы. Уна войтыркөд туйвежасьлісны комияс. Уна олөм олісны комияс, кытчөдз эз веськавны өнія гартола кадлөн дзугйө. Тадз тай Чудө-Чурва висьтасьліс-а. Тадз тай Чудө-Чурва мойдліс-а. Тайөс тай Чудө-Чурва осьтивліс-а.

Нелямын сюрс во ветлісны комияс этштөм-помтөм Парматі. Нелямын сюрс во вөралөм помысь олісны. Вөрысь-ваысь быд бур-

* Вөй — *мортысь* полысь, велөдтөм, пышъялысь пемөс.

сö босътлісны. Вöрсянь-васянь став олöмыс петліс. Быдмывлісны бур кадö *Комгор-Коммуын* паськыд коръя вöръяс, тупуяс, ыржапуяс, нинпуяс. Вежсьывліс олöмыс, кор кынталіс мусö, кор нэмъяс кежлö кыз йи улö вошисны, мый эськö войвывса Изьва, Печера, Ву да Мозын, весиг Емва да Эжва эжсисны сюрс сывъя йи эжöсөн. Сибыр-Изйысь джуджыда зымгысисны йи сюрöсьяс. Комва сэк чукöртліс сöстöм васö Эжва лунпöвса йи кыръясысь, нуліс васö Азовö. Эз на шуны сэк Комватö роч Волгаö усьысь Камаөн. Эз на шуны сэк Ком васö Роч Волгаөн. Ком-мортлөн *Комыс, одэ-мортлөн Камыс* Азовö на сэк усис, эз на Каспийö. Рочьяс эз на вöвны матын-гöгöрын. Лунвывсаяс ас ногыс Итільөн эз на шулыны Комтö.

Тöдан-ö, бур коми морт, кытысь *рочьясыс* босътчисны? Кодарысь воисны, мыйла асьнысö *славянаөн* шуöны? Энлы, висьтала.

Тöдан-ö, бур коми морт, кытысь *лопъяс* лоисны, кытысь *шомъяс* лоисны? Кодарысь воисны, мыйла асьнысö *суомиөн* шуöны, *саамиөн* шуöны? Энлы, висьтала.

Тöдан-ö, бур коми морт, мыйла *зыранөн* лоин, кызди зыранас воин? Энлы, висьтала.

Парма пыдди Йи кыптан кадö йи дорöсас, ляк вöра эрдъясын Аскандъясянь Сибыр-Изйöдз олісны көр кыйысьяс. Оланінсö шуисны ас ногныс: *тунагар, тунтури, трунгра*. Сёрниныс налөн вöлі уна визула. Вирныс налөн эз öти вужйысь пет. Волысисны öта-мöдкöд асывсянь рыгöдз нюжöдчöм ва туйясöд-ордымъясöд.

Тöдысясөн вöліны ставныс. Быдөн ас выяыс, дерт. Рытыввылын ён тöдысьöс шуисны *ётунөн*, комияс — *тунөн*, асыввылын — *тунхөн*. Ён тöдысьлы ордым эз ков, öта-мöд дорас юяс пöлөн ортөн лэбалісны тунъяс. Эз ковны бордъяс, кымөръяс вылын верзёмөн шуръялісны.

Чорзёдчасны кө, гыма кымөрөн чардалöны, чарда кымөр *öныралöны**, тунъяра гундырөн гуръялöны. *Туннырөн, тунъярөн* сэсса сійö борда кымөръяссö нимтісны. *Гундырөн, гудырөн* сэсса сійö юра кымөръяссö нимтісны.

Шурыдмасны** кө, еджыд кунöртöрийөн кунърасьöны, кунөр бöжö тшапкысьöмөн мөвкъялöны, юсь гөн еджыд кымөр бöрысь шлывъялöны. *Кунөрөн* сэсса сійö борда кымөръяссö нимтісны. *Юсь бöжөн* сэсса сійö бöжа кымөръяссö нимтісны.

Сідз нин тай сэсса олісны тунъяс. Сідз нин тай ассыныслысь ордсö-вужсö видзисны, сідз нин тай ассыныс вирсö-яйсö кутісны. Кодлөн вирыс суқджык, сы гөгөр кизьör вираяс топöдчöны, ягъюрбокса пожöмъясөн чук гөгöрыс зымвидзöны. Ялаа ягъюр — енэжысь еджыд, яла выв пожöм — шондіысь зарни.

Зарни комияс, яла выв комияс чукланьыс сибöдчисны, нюр выв олöмас эз лэчывлыны. Бур мортлы нюр выв олöмыд оз лöсав, гöпта олöмыд оз шогмы. Нюр выв зыбучыд Енэжсянь былын, зарни Енэж-Енмысь бокин. Вылын юрөн олісны еджыд комияс. Ылісянь тыдалісны-чурвидзисны зарни комияс. Чур видзисны комдорса панъяс. Ачыс Ен-Чур комдорсаöс биысь-ваысь, пемöсысь-лөк мортысь, став му выв омольсьыс видзис.

* *Öныр* — *седлö*.

** *Шурыд* — *небыд сьöлöма; шурыдмыны* — *незбöдчыны. Шурыд бурдöдö, чорыд тшыкöдö*.

Сыліс му. Вешйисны войвылө юяс, воссисны выль ва туйяс. Вөрсяліс-нюрсяліс важ оланін. Сетчисны вөй көръяс войлань. Вөтчис вөй көръяс бөрся вөра трундраса йөз. Овмөдчис Вой Саридз пөлөн, выль вощьом юяс пөлөн, выль быдмөм трундраа-вөраинъясө. Паськөдчис бур войтыр бур сьолөмөн, вужъясис зумыд войтыр зумыд подулөн.

Чудө-Чурва пан тадз висътавліс. Чудө-Чурва панпияныслы тадз шуліс.

Вөйөм муысь сьөд пыжаяс

Воисны Вой Саридзысь сьөд пыжаяс. Сьөд пыжъясьыс бердіс-сьөдөдіс саридз дорөсыс кык ньөв чилөм пасьта. Öтмөдарө паськыд кырныш бордйөн, ёсь йыла *культи** бордйөн шевкнит-чисны сьөд сиралөм пыжъясыс саридз дорөс пөлөн. Аддзисны комиясөс воысьяс. Сувтөдісны пыжъяснысө ва шөрө. Берегө оз лысьтны сибөдчыны. Родөны-ө, вежавидзөны-ө? Энь улов, ай улов, пөрыся-тома, посни йылөмысь да дзормөм-воймөм войты-рысь өприч, чеччыштисны ваө. Коді пидзөс вьйөныс ваын сулалө, коді коскөдзыс ваын чурвидзө, кодлыкө морөспань улөдзыс ваыс лоө. Коді кага моздора, коді пөрысь айсө-эньсө кутө пельпом вылас. Виччысьöны. Корöны видзөдласнас, чуксасьöны вир-яйнас. Синваөн тыр синмөн мутор корöны. Гөрөдөн гөрддзасьом горшөн отсөг виччысьöны.

Петіс воймөм пөрысь морт сьөд пыжысь. Лэччис укшаль пөрысь морт сьөд пыжысь. Дөрөм бөждорсө ваын көтөдө. Дзор тошсө синванас мыськө. Шыөдчис коми дорө комиөн. Шыөдчис воөм морт пыскыль кывъя комиөн:

«Вөлі миян изъя му, чужан му, подула му.

Вөлі миян оланін-выланін, вердан-вердчанін, чериа-пөткаа, вөръяса-юяса. Олім, шог эг төдлөй. Олім, дзескыд эг төдлөй. Вөрысь пөтка кыйим, юысь чери кыйим, саридзысь пемөс кыйим. Ставыс тырмис. Ставыс судзсис.

Сөмын, тыдалө, мыжмим еньяс водзын. Тыдалө, эг бур сөянөн, эг бур сьолөмөн матыстчөй видзысьяс-посйысьяс дорө.

Скөрмисны миян вылө мупытшса еньяс, дөзмисны миян вылө вапытшса еньяс. Сыркөдісны мунымөс миян кок улысь. Личкисны мунымөс миянлысь ва улө.

Шуисны коркө лэптыны ва улысь подула мунымөс. Шуисны коркө бөр сетны изъя мунымөс вөрнас-юнас, черинас-пөтканас. Мыж вешмөм бөрын. Улыс еньяслөн небзьөдчөм бөрын.

Колим ми оланінтөг-выланінтөг, колим ми верданінтөг-вердчанінтөг. Пуксим ми бура сиралөм пыжъясө, бура дзужалөм пыжъясө. Босьтім, мый сьөрысь босьтны сюрис, сөвтім, мый пыжө сөвтны төрис.

Мунім ми выль му корсьны, овтөм му корсьны. Эг аддзөй выль му, овтөм му. Кытчө ог сибөдчөй, быдлаын олысь эм. Кытчө ог воёй, быдлаын пукалысь эм. Некөн миянөс пось сөянөн оз виччысьны. Некөн миянлы лөз ной кок улө оз вольсавны. Воштім сөа-сурса мортөс, сотісны дасъясөн-сөясөн пыжъясны-мөс.

* *Культи* — гөгөра.

Бөръяысь сибёдчим муланьö. Бөръяысь матыстчим му дорöсö. Татчö кö он лэдзöй, ковмас вешйыны саридз шөрö, ковмас öзтыны пыжъяснымöс, ковмас бийыв мунны вылысса енъяслань. Ковмас кыпöдчыны ортыясөн вылыс енъяс дорö, водзджык мунлöм пöль-пöчъясным дорö.

Сэсса миян бöрын нинöм нин эз коль. Сэсса миянлы водзысь нинöм нин корсьны».

Небзьöдчисны комияс. Нормисны комияс. Лэдзисны выль олысьясöс кöдж вылö, Саридз нырд вылö. Сёрнитчисны, мый выль воысьяс вöй кöр кыйны оз кутны, нэмся олысьяслөн олöмö оз суйсьыны. Сёрнитчисны, мый выль воысьяс кутасны саридз пемöс, васа чери кыйны. Сёрнитчисны, мый выль воысьяс кутасны пелыс лол помысь овны, койбедь помö оз кутчысьны. Мед та йылысь пыжөн локтысьяс оз вунöдны, нимтисны найöс лопөн. Сёрнитчисны, мый выль воысьяс Енмөн Вöйтöм Муыслөн кыптöмөн тшöтш бөр мунасны сирöд пыжъяснас, сьöд пыжъяснас тшына-шома му вылас, саа му вылас. Мед сы йылысь оз вунöдны, кутисны шомаясөн найöс шуны, саамуаясөн найöс шуны. Лэптисны выль воысьяс колаторъяс-керкаторъяс, пон чомйысь гырысь-джык, кер чомйысь дзоляджык. Кола кöджөн, Кола нырдөн нимтисны выль оланінсö. Комдорын овны кутисны бур сьöлöмөн. Комдорын кутисны овны кыпыд лолөн. Му кыптöмсö виччысьны. Енъяслөн небзьöдчöм вылö лача кутны.

Дыр олисны орччөн комиа-лопа. Комияс койбедь помысь олисны. Лопъяс пелыс помысь олисны. Комияс чужан му вылад да, осьса лолаöсь, веськыд сюрсааöсь. Лопъяс выль му вылад да, сиптыса лолаöсь, нюкыльтчöм сюрсааöсь. Öнi на шулöны дзебяссьöмөн олысьöс: зэв пö гусьөн олысь, зэв пö пöдсөн олысь, зэв пö ас выйөн олысь, дзик пö тай вöй лопар кодь.

Чудö-Чурва пан тадз мойдліс. Чудö-Чурва панпиянсö тадз велöдліс.

Вöймöм-рöчмöмъяс

Воисны комиясөн лунвылö энöвтöминö, шунмöм муö выль олысьяс. Бур олöм корсьны, лёк олöмысь пышйыны. Öтияс моргөн асьнысö шуöны, мöдъяс — мереөн, коймöдъяс — муромөн. Комияскöд матыс вира йöз. А кодсюрö дзик нин мöд вираяс локтисны, словянаөн асьнысö шуöны, кывъяөн. Му гөрöм-гурйöм помысь ставныс олöны. Вузасьöм-нöбасьöм помысь выль воысьяс олöны. Накöд нöбасьны-вузасьны кутисны войвывсаяс. Накöд воысьны кутисны войвывсаяс.

Сьöкыд воны öти кывйö пемыд йöзкöд, кодъяс ортөн оз лэбавны, кодъяс муö видзöдöны. Сьöкыд воны öти кывйö йöзкöд, кодъяс кок увсьыс мортöс корсьöны, кодъяс под увсьыс кынöм-пöт шедöдöны. Чукöртчисны тунъяс-ётунъяс ыджыд сёрниөн. Йитисны тунъяс-ётунъяс вужъя кывъяснысö, сёртисны руна-серөн подула кывъяснысö, йитисны лунвывса кывкöд. Мед öти кывйö воны нöбасьысь-вузасьысьяскöд, чужтисны выль кыв, кокни вежöра, кокни мывкыда. Эз чужан кыв вöв, эз ловъя вöв, сідз нин, торъялöм-рöчалöм* кыв песöм, кыв бертлöм.

* Рöч — юкөн, тор, пельöс.

Уна вир сорласис, уна кыв сӧльнитчис вузасиг-волысигӧн. Уна туй дженьдӧдысь, кок песысь вунӧдіс чужан кывсӧ, уна *кидус** чужан кывйӧн кутіс лыддыны кокни руа рӧчсӧ. Сэк тай сӧсся рӧчалӧм кидусъяссӧ шуисны *рочнас*. Виль войтыр, том войтыр, роч войтыр чужис куим визулысь. Виль войтыр, том войтыр, роч войтыр чужис куим вирысь. Лелькуйтисны войвывса тунъясыд *рочӧс* пузчужӧм кагаӧс моз, йитисны вӧркӧд-вакӧд топыд овмӧсӧн, мича оласногӧн. Вужйӧдісны олӧмас зумыд вир-ййӧн, паськыд лолӧн, сӧстӧм вежӧрӧн. Олӧй пӧ, эн полӧй.

Эз на эштыны быдтыны рочъясӧс тунъяс. Эз на борд вылӧ пуксысь роч войтыр. Пузувтчис олӧмыс асыв-лун муясын, туруна паськыд эрдъясын. Пузувтчис олӧмыс Лун саридз дорын. Пузувтчис олӧмыс рытивыв вӧръясын. Гудыртисны олӧмсӧ виль оланін корсысыяс, бур му корсысыяс. Воисны асыв-лунсянь сӧд вӧлаяс, гӧрд вӧлаяс луныв муясӧ. Ас велӧдӧмӧн воисны, ас нырӧн воисны, гудыртисны ставсӧ. Торкисны тшӧтш роч нэр быдтасӧс, рӧча быдтасӧс. Воштисны рочъяс бур велӧдӧмсӧ дыр кежлӧ, вежисны зарни-эзысь вылӧ. Зарни-эзысысь на эз бура кианыс кутчысь. Ковтӧм налы вӧлі зарни-эзысысь, посни челядьлы сяркӧдчан чача кодъ. Ворсыштасны-мырддысясны, шыбитасны-вунӧдасны.

Кодкӧ чукӧртны, дерт, босытчис, «тайӧ-менамаьсны». Тыш-вен пансис на костын, чачаӧн мырддысьӧм. Пуксисны джуджыд кыръяс вылӧ *ӧктӧм-бӧрийӧм ӧксыяс*. Каръяс лӧптисны, ӧна кыпӧдчыны кутисны, *ӧктысьны-шепасьны*. Быдӧн нин аслас карын ыджыд, быдӧнлӧн зептыс тыр, да уна вылӧ тай сыысь уна колӧ. Быдӧн кӧсйӧ, мед сылысь карсӧ медыджыдӧн шуисны. Вить содӧ, горш паськалӧ, азым воссьӧ. Сэк сӧсся шуисны аскандъяс роч мутӧ *Гаргарикаӧн***, комияс — *Каръёлаӧн*. Сэк сӧсся шуисны комияс рочлань сетчӧмъясӧс, каръяс бердӧ сирасьӧмъясӧс *каръёлаӧн*. Сэк сӧсся шуисны ылалӧмъясӧс весь олысь *весьӧн* да бокӧ войтыштӧм *войтьӧн*.

Зыкӧ воисны олӧм кутысыяс овмӧс ӧктысыяскӧд. Коми тӧдысыястунъяс, коми юръяс-панъяс ӧлӧдны видлісны олӧмысь шыбӧлитӧмъясӧс. Озыр каръяс босытчисны сотны-пасыйыны:

— Олӧй пӧ Парма серти, олӧй лов серти, эн чукӧртӧй эзысь-зарни, эн горшасьӧй веськыд сювъя косысь моз. Эзысь-зарни зарни енъяслы сӧмын шогмӧ. Эзысь-зарни сӧмын енъяслы лӧсялӧ. Эзысь-зарни сӧрсьыд мӧдарас он ну. Эн пӧ чукӧртӧй куяс-ротъяс гор саяныд. Шогмӧ новлыны куяссӧ енъяслы кокпод улӧ. Куяс-ротъяс новлытӧгыд сісьмасны. Мый вылад кышалӧма, тырмас тӧян дженьыд нэмтӧ. Оз кӧ тырмы, позяс вильӧн вежны. Мый рушкулы колӧ, ныйӧдӧм мышкуӧн шедӧдӧй. Эн мырддӧй вермытӧмлысь, вылысьыд пӧрччӧмӧн вермытӧмыслы сетӧй. Сям-эбӧс кӧ эм, шедас рушку поньӧдыд. Сям-эбӧс кӧ эм, сюрас сирин вевттьӧдыд. Сям-эбӧс кӧ эм, он ор сӧян-юанысь.

Кысь эськӧ! Эмбурӧ шашаритчӧмыд вӧйны кӧ кутас, озырлунсӧ кысысь оз лӧдз. Биысь кӧ чепӧсйыны ковмас, эмбурсӧ кинас-кокнас куртны уськӧдчас. Колысьыдлы тай — кымын уна, сымын

* *Кидус* — *кидтӧм-торъялӧм*, кык *вирысь чужӧмтор*; ӧні *тадзи тшӧкыдджыка шуӧны низя-туланалысь пиянсӧ*.

** *Гаргарика* — *асканд кывйӧн*: *Каръяса му*.

унджык колö. Морт горшысь да Омöль горшысь паськыд нинöм му вылас абу. Ассьыс паськыд горшсö дорйö горш морт:

— Олöмыд кузь, гашкö, быдтор на ковмывлас. Вердан йылöм-лы öктам. Пöль-пöчөн шуысылы чукöртам. Кымын унджык чукөр-мас, сымын бурджык миян йылöмлөн олöмыс лоö.

Вензöны панъяс, öлөдöны тунъяс:

— Оз эзысь-зарни чукөрталыны бур олöм вылö. Мывкыд-вежөр бур олöм вылад колö. Ворсысь вир-йй бур олöм вылад колö. Эзысь-зарнинад вир-ййыд оз сöвмы. Эзысь-зарни весятад вир-ййыд косъмö. Мед мича нывъяс эзысь-зарнисö новлöны жыннйан пыдди. Мед муса зонъясыс найöс жолькөдчöм сертиыс ылёсян кылöны. Мич вылö эзысь-зарниыд колö, дзебасын видзöмысь чусмö. Эзысь-зарниыд весиг гуся дзебассяныыс морт олөмтö джендöдö».

Тадз панъяс шулисны, тадз тунъяс велөдлисны. Эз тай пон серти сыла тшегырыс ло. Эз тай вердöм шобдi доныс быдмы ляк гыркъя чань.

Ас выяыс олö выль войтыр. Ассьыс горшсö посйö, ассьыс эмбур тасйö. Торйöдчисны войтыръяс коми панъясысь. Кодлы нö колö быдлунъя янөдöмтö кывзыны? Кодлы нö колö асьтö мөмөтөн аддзыны? Öнi на сйö войтыръясыс лөк кывйөн коми панъясöс казътывлöны, морт виысьөн да эмбур мырддысьөн коми панъясöс шуöны. Быттö аслыныс босьтiсны панъяс озыр-лунсö, быттö эз сотлыны ковтöм шылльö-мылльöсö, каръясыскöд тшöтш. Быттö эз мортлы бур вылö мездывлыны сйöс кöласьöм лöпсьыс да колöмсьыс-азымсьыс. Асьныс нин висьталысьясыс оз тöдны, мыйсяма панъяс вöлöмаöсь, нимтöны найöс коркö «мустöм лопөн», коркö «этш тöдтöм литваөн». Бергöдöмаöсь ставсö увлань юрөн тöдтöмъяс, вежөртöмъяс.

Вунö тай бурыс мортыдлөн öдйö, лөкыс дыр кeжлö вежöрад вужъясьö.

Мый сэсся керан? Сэтшöмось нин йöзыд: оз гөгөрвоны атявны*, эштывлöны матавны.

Збыльсö панъяс-öксыяс йылысь важ йöз со мый мойдiсны:

Вöй Раккой да вежöра Чудö-Чурва йылысь мойд

— Раккой-öксы гөтрасис ыджыдпырысь. Раккой-öксы босьтiс гөтырсö ыджыд карысь. Раккой-öксы босьтiс гөтырыскöд уна эмбур.

Овмөдчис Раккой-öксы Рагна ты дорö сюрөсөн. Паськөдчис Раккой-öксы джуджыд Кар вылö ыджыдөн. Чукөртны кутiс овмөссö, вунөдны кутiс олөмсö.

Горшасыны кутiс Раккой-öксы. Нартитны кутiс бур войтырсö. Вежавидзöм бырис, вежөр видзöм вошис. *Ортыс* сыысь весьöпөрöмөн пышйис. Олөмсьыс Раккой-öксы *ортсыасис*. Олөмсьыс Раккой-öксы дорö колис.

Лябсис-норасис бур войтыр, важ войтыр Чудö-Чурвалы Раккой вылö.

Чудö-Чурва — чуд вирысь, Чудö-Чурва — чуд котырысь. Чудö-

* Атявны — бурсиймөн атьны; сэтысян «аттьö» кыв артмöма.

Чурва — медыджыд пан. Чудö-Чурва Ен-Чурлы юрбитö, Чудö-Чурва Ен-Чурöс вердö. Чудö-Чурва мусö-васö лунөн вуджö. Чудö-Чурва вöй көръясöс вöйзöдлö*. Шыөн бытшйöдлö кынём пöтмөн. Ньöвйөн лыйлö котырлы вердмөн. Уна оз босыт, этшаысь оз бергöдчы. Асьсö вердö, войтырлы отсалö.

Кывсис Чудö-Чурвалы Раккой-öксылөн выжыласьöмыс, Раккой-öксылөн горшасьöмыс. Шемöс усис Чудö-Чурва, шензис луна-воя. Мунис Чудö-Чурва Каръял-öксыöс, Раккой-öксыöс чиршöд-лыны-янöдны, успаньвыв пуксьöдны.

Оз кывзы Раккой-öксы Чудö-Чурваöс. Оломсьыс вылö пуктö эмбурсö. Зэвтчö Раккой-öксы Чудö-Чурва-пан вылö. Тышö пырö Раккой-öксы Чудö-Чурва-панкöд.

Ыстис Раккой-öксы Чудö-Чурва вылö öкмыс мортöс. Шеналис Чудö-Чурва Раккой-верöтъясöс** кикарнас. Ыстис Раккой-öксы Чудö-Чурва вылö куим-öкмыс мортöс. Шеналис Чудö-Чурва Раккой-верöтъясöс кок баннас. Ыстис Раккой-öксы Чудö-Чурва вылö öкмысысь-öкмыс мортöс. Шеналис Чудö-Чурва Раккой-верöтъясöс кык дорыша чернас.

Раккой-öксы паськыд Кар йывсянь биа ньöвйөн шöтис. Раккой-öксы Чудö-Чурвалысь веж юрсисö чишкалис. Раккой-öксы Чудö-Чурвалысь бур ёртъяссö дойдалис. Раккой-öксы Чудö-Чурваöс чорыда дöзмöдис.

Скормис Чудö-Чурва, сотис Раккойлысь Карсö лöз пöймöдз, чийöдлис Раккойлысь озырлунсö-эмбурсö кыр горув, Рагна тыö. (Öнi на сэн Раккойлөн эзысь-зарниыс Рагна ты пыдöсас шонди лун сьöмöсын югъялö, тöлыся вой шöрын син вежö). Зырис Чудö-Чурва Раккойöс Рагна ты дорысь. Чепöсийис Раккой-öксы Рагна-гöтырыскöд. Пышйис вöймём Раккой-öксы Нимтём ю катыд.

Овмöдчис Раккой-öксы Нимтём ю бокö коньöрөн. Векньöдчис Раккой-öксы гуся сён серти дзоляөн. Вöйявны кутис, дзевсясьны кутис Раккой-öксы бур йöзысь. Медся ёна Чудö-Чурваысь полис-полтöсаси***. Шуис Рагна-гöтырыслы, муса гöтырыслы: «Эн шыб-лав лöпсö-ёгсö Нимтём юö, эн чагйы пессö-пусö Нимтём визулö, эн чийöдды пывсьём корöсьястö Нимтём ю шöрö. Локтас Чудö-Чурва-пан, тэнсьыд и менсьым юръяс сötас».

Оз кывзы муса гöтырыс, Рагна-гöтырыс, Раккой-öксыöс, вын-тём верöсöс. Эз татшём öксы сайö петав. Эз татшём öксыкöд олöмсö йитлы. Эз татшём олём öксы дорын лачаавлы. Чагйö Рагна-ичмоньыд пессö-пусö Нимтём визулö. Шыблалö лöпсö-ёгсö Нимтём юö. Чийöдлö пывсьылём корöсьяссö Нимтём ю шöрö.

Нимтём ю вомын Чудö-Чурва пукалö. Нимтём ю вомöд зарни чаг кывтö. Нимтём ю вомöд эзысь лөп-ёг кывтö. Нимтём ю вомöд ыргөн корöсь кывтö.

«Аттö, пиö! Эм, тыдалö, Нимтём ю йылын выль олысьяс! Эм, тыдалö, Нимтём ю йылын выль пукалысьяс! Эм, тыдалö, Нимтём ю йылын бур йöзысь дзевсясьысьяс! Нолтö, видзöдла, мыйсяма йöз йöзасьны полöны?»

Пуксис медыджыд пан Чудö-Чурва сиралём пыжö. Зутшнитис Чудö-Чурва косыт пыдöсö эзысь пелысөн. Бузнитис Чудö-Чурва

* Вöйзöдлыны — повзöдлыны-вöтлысьны, котрöдлыны.

** Верöт — важ комиён: öксыöс дорйысь, öксыöс кывзысь.

*** Полтöсасьны — вошласьны, каститчöмысь повны, быдлаысь аддзыны повзöдчысь полтöсъясöс.

джуджыд гобльөгö эзысь лоптөн. Дас кыкысь зібйыштчөмөн катіс Нимтөм ю йылөдз. Дас кыкысь сыныштчөмөн воис Раккой-өксы öзынөдз.

Раккой-өксы öзынын Рагна-ичмонь пукалө, нор сьылан сьылө. Раккой-өксы öзынын Рагна-ичмонь пукалө, Чудө-Чурваөс виччысьö. Аддзис Рагна-ичмонь Чудө-Чурваөс, нимкодъысла нимсö вунөдіс. Босьтіс Рагна-ичмонь Чудө-Чурваөс кык пельöдыс, Чудө-Чурваөс пöся окаліс.

Раккой-өксы сёйнын вутралө, Раккой-өксы бур сёян нинөмö воштö, Раккой-өксы водзöс босьтөм вöталө. Вузалис Раккой-өксыöс бур гöтырыс, вузалис Раккой-өксыöс муса гöтырыс. Олөм кутысьлөн тай доныс абу, овмöс öктысьыдлөн доныс эмбурас. Мый Раккойлөн вылысас пасьталöма, сы дон и ачыс сулалө.

Чудө-Чурва дыр эз виччысь, Чудө-Чурва ёна эз жуйав, Чудө-Чурва рушку эз гыжъяв. Раккой-өксылы ситан вурысас чужъяліс. Раккой-өксылы сьылі тшуптас сеталис. Раккой-өксылысь шойсö рака-катшалы колис. Раккой-өксылысь гöтырсö сиралөм ыджыд пыжас босьтіс.

Рагна-ичмонь эз петитчы. Рагна-ичмонь нимкодъпырысь, кыпидпырысь виль олөмö пырис. Рагна-ичмоньлы бур верöс, виль верöс, ала-мывкыда верöс сюрис. Рагна-ичмонь Чудө-Чурва-гöтыр вьлө нимсö вежис.

Чудө-Чурва вужсянь öти мойд колис. Раккой вужсянь мöд мойд муніс. Кодар мойдыс веськыд, кодарыс кытшoла, оз ставөн тöдны. Кодарыс велöдö, кодарыс ылöдö, оз ставөн гöгөрвоны. Пан да öксы оз öти озырлун видзны, пан да öксы оз öти мойдөн овны.

Лызь туйыд — гозъя, катша кок туй — розъя. Мича пожöма чугйын, он кө веськав дзугйö.

Тадз нин медыджыд коми пан Чудө-Чурва шулывліс. Тадз нин медыджыд коми пан Чудө-Чурва гаравліс.

Вöймöм комияс

Сöмын тай эз быд Раккой вьлө Чудө-Чурваыд сюр. Энoвтчисны комияс овмöс чöжысьясöс бур олөмö пыртöмысь. Асыввыв вешйисны комияс каръялысь, рочысь. Торйöдчисны комияс вельсьсь, войтысь. Ылыстчисны комияс шомысь, лопысь. Мозын кузя, Эжва кузя катісны. Йöгра-яран дорö сибöдчисны. Ханті-маньсі дорö матыстчисны. Олөм видзны, олөм кутны. Йöз синмысь бокын Чур видзны, мед йöз син водзын этшаджык чурвидзны.

Чудө-Чурва комиöс йöгра-яранкөд йитіс. Чудө-Чурва комиöс комикöд йитіс. Виль воысьяс важ ног на *Комгорөн* асьыныс мусö шуисны. *Комгорөн* на олан мусö нимöдісны. Камва пöлөн олысьяс *Коммуён* асьыныс мусö шуисны. *Коммуён* олан мусö нимöдісны. Войвылын — *Комгор*, лунвылын — *Комму*. Сідз олісны комияс кык муён, кык бордйөн нэмыс. Дыр олісны, олөм кутісны, зарни кутшөн лэбалісны, сьöд кырнышөн вöралісны, еджыд каляён чериалісны.

Олөм кутны абу олөм вуджны. Олөм вуджысьыд сьöдас тільсьö, сьöд удж песö, вердчö-быдтысьö, вир-яйсö быдтаснас кад

пыр вуджөдө, сідз сэсся кывтөм пемөсөн пемыдас помасьё. Вуджас, мөдарас виччысьё гу-горт, виччысьё шойна орд.

Олөм кутысьыд тайөн оз пөт: ас олөмсө олө, содтөмөн йөзлы сетө. Мортсянь мортө тай содө. Содтөд вылө содтөд. Сод вылө сод. Сідз вөляныкысь сэсся содтысьё Ен содыд. Кыптө мортыд вир-йисысь вылө, кыптө ловнас-ортнас Енэжөдз. Сөмын отсөг колө олөм кутысьлы ортсысянь-орччасянь. Отсөгсө морт босьтө олөм кутысь енъясянь, мыджсьё морт олөм кутысь ёртъяс вылө.

Коми мортлөн енмыс уна. Коми мортлөн енмыс лыдтөм. Быд-тор вылө аслас ен. Быдлаын аслас видзысь. Му пуктысь Енэж-Ен. Би пестысь Гым-Чард. Би видзысь Шонді-Ныв. Лов сетысь Войпель-Зон. Ен-Чур да Муса-Му. Тыр да Тор. Дар да Дор. Кылдысь-Вордысь да Му-Кутысь. Ва-Куль да Вөр-Пель. Чук да Чой. Зарань да Черань. Налөн ина-арта зарни нывъяс да эзысь пиян...

Кок подйысь улө сэсся ог нин лэччөй. Горувсасө вой улө ог нин казтывлөй-кодралөй. Синсайсасө вой улө ог нин вошйөдөй-чуксалөй.

Важъя комияс эськө ставсө лыддөддывлісны. Важъя комияслөн эськө ставлы ним сюрліс. Чудө-Чурва быд энкөд синмасьліс. Чудө-Чурва быд енлы ас морт туйө вөлі. Чудө-Чурваөс быд ен пыдди пуктіс. Чудө-Чурва быд енмөс вежавидзис.

Миян сы вылө сям оз тырмы. Миян сы вылө вежөр оз судзсы. Комдора-Коммуа костас ыджыд тув пырис. Комдора-Коммуасө рөчаліс-торйөдіс. Бордъясыс эськө колисны комияслөн, сөмын борд костсыс зарни кутшыс бырис. Зараньсө дзевлавны ковмис. Чераньсө гуавны ковмис.

— Вөлі Зарань, Кылдысь-Вордысь* инь. Вөлі Черань, Мыждысь-Ёрысь инь. Нэмыс вөліны, комиясөдз на.

Зарань — веж зарни юрсиа, нюмсера паръя. Черань — сімсьөд юра, зумыш вом дора.

Зарань — олөм панысь, ловби сетысь. Черань — олөм пома-лысь, ловру босьтысь. Чойяс найө. Чужөм вылас весиг өткодь мичаөсь. Мыгөрнас весиг өткодь шыльыдөсь.

Зарань вылітө ветлө, бур олысьөс чужтө-кылдө. Зарань быдөн-лы бур олөм вордө. Олөй пө, менам быдтасъяс, зарни мус улын видзөмторъяс!

Черань улітө ветлө, лёка олысьөс мыждө-чергөдө. Черань быдөнөс лёк олөмысь ёрө. Бырөй пө, синмөн аддытөмторъяс, нйитысь лэптөмторъяс!

Вунөдны кутісны йөзыд Зараня-Чераняөс. Бурлань йөз оз сетчы, лёкысь оз өтдортчы. Гаж оз корсь, мыжысь оз пов.

Шуисны важ төдысьяс дзевлыны найөс дженъыд мывкыдаясь, кузь кияясысь. Шуисны важ төдысьяс саймовтлыны найөс вежөр куштысьясысь, рушку тыртысьясысь. Шуисны важ төдысьяс вөчны ловъя аканьясөс, висътасысь-видзысьясөс.

Куим Зараньөс кисьтісны веж зарниысь. Мый Морт йылысь бурсө төдісны, дзевисны өти Зараньө. Мый Му йылысь бурсө

* Кылдысь — важ коми: чужтысь-вөчысь; вордысь — бурсысь, сызъысь.

төдісны, дзебисны мөд Зараньё. Мый Енэж йылысь төдісны, дзебисны коймөд Зараньё.

Вит Чераньёс дорисны сьод көртысь. Мый морт йылысь лёксө төдісны, дзебисны вит Чераньё. Сир-Шог. Мыж-Висьом. Веж-Лөг. Тыш-Кось. Кулом-Пыдөс. Сэтшөм нимъясөн лэдзисны му вывті ветлыны.

Быд Акань дорё орта войтыр индөма. Быд Аканькөд орта войтыр йитчөма. Быд Аканьёс чуд войтыр лелькуйтө.

Зараньяс юяс пөлөн ветлөны. Зараньяс юяс дорысь оз веш-йыны. Зарнияслы кысьом юыс тырмө. Видзёны найёс видзисьяс. Посйёны найёс посйисьяс. Дорйёны найёс дорйисьяс.

Чераньяс ва дорё оз лэччыны. Чераньяс косөд ветлөны. Чераньяслы паськыд муыс тырмө. Видзёны найёс видзисьяс. Посйёны найёс посйисьяс. Дорйёны найёс дорйисьяс.

Эн корсь найёс, пеж морт. Эн корсь найёс, вежа морт. Оз сюрны бур мортлы-ө, лёк мортлы-ө весиг ёна корсьөмөн. Оз сюрны бур мортлы-ө, лёк мортлы-ө весиг кузя вөтлысьөмөн.

Кад воас, асьныс петасны. Кад воас, асьныс мыччысясны. Чудө-Чурва панлөн пияныс войвывса Зараньёс ваясны. Рагна-ичмоньлөн нывъясыс войвывса Зараньёс йөзаласны.

Сөмын тай мортыд бурлань оз вежсьы. Сөмын тай мортөс лёклань кыскө. Оз на талун пет зарни сьолөма шурыд Зарань. Оз на талун мыччысь көрт киа чорыд Черань. Ёнія йөзлөн син-мыс Зараньлөн ёран югөрысь чегас. Ёнія йөзлөн пельыс Чераньлөн ёран юргөмысь потас. Жебось ёнія йөзыд. Нярёсь-колысьось, горшось-полысьось, йөз олөмөн олысьось.

Ёні өти енлы, овтөм керкаысь вайөм йөз енлы юрбитам, сі-йёс на ог бура төдөй. Ёти енмөс, изъя муысь вайөм йөз енмөс ог вежавидзөй. Йөз ылөдчөм кывзам, сьолөм шөпкөмлы ог эскөй. Олөм коляссө корсям, олөм сюрөссө эновтім. Сьод юра йөз ен-мыскөд сёрнитны ог кужөй. Кывсө сылысь ог төдөй. Воссьынысө сылы ог вермөй. Сой кыза сисьяс сотам-буралам. Рөчалөм кыв-йөн (кужам-ог кужөй) варгам-муралам.

Мортысь мортөс ог аддзөй. Ёртысь ёртөс ог кылөй. Некор морт вылас видзөдлынысө. Каръёвтчим-рөччим. Карсялім-роччим. Эмбур куралам, йөз ныр улысь нетшкам. Сөмын тай йөз ныр увсьыд куш мыльёсыс сюрө. Номыр кокалысь уна, юсь бөж кунөрөн лэбалысь эз коль.

Овны ог көсйөй. Овмөдчыны дыш. Олөм вуджассө миянлы өдйөджык колө вуджны. Мөдарас миянлы колө өдйөджык воөд-чыны. Тэрмасям гуө-гортө, шойна ордө. Быттьө лөз нойөн сэтчө туйсө вольсалөма. Быттьө ныв лыскөн сэтчө туйсө чышкөма.

Аттө, комияс, комияс... Та вылө өмөй чужлім? Та понда өмөй миянлы пөль-пөч вир-яйсө нэмъяс пыр вуджөдісны? Та вылө лачаөн өмөй Чудө-Чурва коми енъяссө вердіс, лов сетліс, ышөддіс? Рөч вөлі, да рөчыс паськаліс, асьным дзоляник рөч вылө колим. Діалісны миянөс дзоля діяс вылө, юклісны комиөс сартас пескөс моз сартасъяс вылө. Та йылысь Чудө-Чурва на өлөдіс. Та йылысь Чудө-Чурва на мойд висьтавліс:

— Ен да Му войтыръясөс чужтісны. Ен да Му войтыръясөс вөчисны. Омоль на гөгөр гартласис, Омоль на гөгөр тшыкөдчис.

Коді тай кылдыны-вөчны оз вермы, дась вөчөмсө керө-тшыкөдө.

Медводз артмисны съод йөз, пемыдын вөчөмъяс, бипур дорын вөчөмъяс. Омоль найөс шомөн-саөн, пөимөн-өгырөн сузляліс. Омоль найөс Енлөн бипур дорын пуртікаліс.

Аддзис асывнас Ен, мый артмөма, ёрис артмөмторсө, Омольөн тшыкөдөмторсө. Ёром-енаөн съод йөзөс шуис, лунвылө шыбитіс.

Виж сёйысь Ен да Му йөзөс вөчисны, лэбулө косьтыны пуктісны. Омоль локтіс, виж йөзлы юрас тапйөдліс. Виж йөз куньтыра синмаөсь, латшкөсөсь лоины.

Аддзис асывнас Ен, мый артмөма, ёрис артмөмторсө, Омольөн киалөмсө. Омоль *ки тай* тшыкөдөма-киалөма! *Ки-тайөн* виж йөзөс шуис, асыввылө шыбитіс.

Кылдісны Ен да Му рочьясөс. Омоль на гөгөр гартласис, Омоль на дорын тшыкөдчис. Вөчисны Ен да Му содз тыр рочөс. Омоль войөн дас сюрсөдз лыдсө содтіс-пөляліс.

Аддзис асывнас Ен: му пасьта роч жуө, бергөдчыны некөн. Дөзмис Омоль вылө Ен, став рочсө кодзувкотө пөртіс, лыда-лыдаөс колис.

Вөчисны Ен да Му уна пөлөс войтырөс, бур войтырөс. Вөчисны Ен да Му быдсяма войтырөс, бур войтырөс. Разөдісны му пасьта бур кйдыс моз, бур олөм вылө. Сөмын тай оз төрны войтыръясыс му вылас. Сөмын тай дзескөдчөны да дзескөдөны өта-мөдсө. Бур олөмсө бокысь корсьөны, бур олөмсө йөзлысь аддзөны. Оз гөгөрвоны, мый олөмыс ставныслөн ас саяс.

Комиөс дырөн-регыдөн Комдорысь зырасны, зырөмъясөн вөчасны. Комиөс дырөн-регыдөн Коммуысь пөрөдасны, пөрөмъясөн керасны. Сэтысянь зыранаөн шуны кутасны. Ковтөм зырымөн Из бердө сульзясны. Сэтысянь пөрөмаөн шуасны. Сивнырөн пөрөдөм вөр моз Из бердө пөрөдасны.

Тадз Чудө-Чурва пөрысьладорыс висьтавліс. Тадз Чудө-Чурва жугыльтчөмөн мойдліс.

Зырисны тай. Зыртісны. Зыранаөн вөчисны. Сөмын коді мыжаыс таысь? Некодөс мыжавны. Код вылө ыстысьны? Некод вылө ыстысьны.

Олөм кутысь панъяснымөс кык пөръя вузалім. Олөм видзысь тунъяснымөс сизимсө во чөж бырөдім. Олөм олыссянь чужанінын палюрөдз усим. Шулісны эськө важ йөз:

«Кымөс вылад ёсьөн кө пыридз кутны верман, верман палюравны.

Чаль гыж йылад кө йи вылө сувтны верман, верман палюравны».

Дыр-ө на пыридзсө йөз серам вылө, йөз теш вылө кымөс йылад кутан, коми морт, бур морт? Дыр-ө на чаль гыж йылад чеччалігад сюрсатө жуглан, коми морт, бур морт? Кокыд мый вылө колө, төд вылад уськөд. Кымөсид мый вылө колө, бура казгышт.

Рок пань вылө гортад кывйө шедтөмөс лэдзин, ачыл пончойө овмөдчин. Сюрнянь көрыш вылө вузалөм йөрад чепйив понйө пөрин. Олөм видзыссянь йөз овмөс видзысьөдз усин. Ковтөм лоин, йөр сайө шыбитан туйө. Морт-ө тэ? Ог нин төд... Коми-ө тэ? Ог нин төд...

Менö кывзы. Ме тэнад медбөръя лов пыкöдыд.
Менö кывзы. Ме тэнад медбөръя сьылысьд.
Менö кывзы. Ме тэнад медбөръя оллялысьд.

Оз казав коми морт, бур морт менсьым пыксьöмöс. Оз кыв коми морт, бур морт менсьым горалöмöс. Оз вежöрт коми морт, бур морт менсьыс лöвтöмöс. Коли коми кадыс. Коли панъяслöн ыджыд нимыс. Коли тунъяслöн ыджыд выныс. Вунöдісны менö, важ сьылысьöс, олöм видзысьöс, олан вуджөрöс. Орталісны ловъявылысь... Ортөн ветлыны сöмын колис, ассьым ортöс видзны...

Тайöс аддзывліс Чудö-Чурва нэмъяс сайын. Тадз висътасьліс Чудö-Чурва Комдорсалы. Тадз велöдліс Чудö-Чурва Коммусаöс. Сöмын тай ачыс куш мойдын коли. Сöмын тай ассьыс бур нимсö дорйыны эз куж. Йöз муын нимсö сылысь важ ротöс моз летöны, киссьöм бон моз бонйöны. Комияс Чудö-Чурваöс оз нин казъываыны. Комияс Чудö-Чурваöс оз нин нимöдны. Вушйöма сьлөн бур нимыс коми вежöрысь, зыртсьöма сьлөн вежа нимыс коми вежöрысь.

Вöйпöм орт-видзысь

«Бур вöлі пыжöй, вöлі öзын...»,
Мый морыс ковмис меным йöзын?

Лоз зептö мудöд шудöс босьті,
Вель ыджыд ноп тыр сюрнянь косьті.
Ас йöзлы корсьны петі гортысь
Выль шемöс му. Ме, öтка корсьысь,
Кузь туйö вөрзи шыөн-пуртөн...
Дзик весьөн лоис мусö куртöм.

Ме вуджи юяс, изъяс, эрдъяс,
Бур муыс-ваыс менö вердліс.
Мойдвывса му тай эз ло воча,
Мед вöлі сьödъяс пöвстын, рочын,
Мед сюрліс би пыр, ва пыр вуджны,
Мед соскöс уна пörъя пуджлі.
Кор вынөн венлі, письтлі гусьөн,
Кор муныштавлі лöз ной кузя.
Скөр гундырлилысь юръяс сötлі,
Мед сылысь зарни нопъям лöдны,
Медмича нывъяс-аньяс бокö,
Дерт, нёровтчывлі... (бур-ö-лөк-ö?)
Зэв кыпыд, гора сьылан сьывліс
Ме йылысь нэмöвöйся сьылысь.
Пыр гаравлісны шогөн-гажөн...
Тшук ставыс кольöма тай важö.

Кор куліс сёод дзормöм сьылысь,
Сэк войтыр вунöдіс ме йылысь...
Мый корси кöнкö бокын, йöзын?

Бур вöлі пыжöй, вöлі öзын,
Ён керка куд кодъ, кыркöтш йылын...

Бур пыжöй сисьмис öзын вылын,
Сьöd вöвдом-сюръя воймис-пöрис,
Дзуг раскөн вежсис пожом вöрыс.
Выль войтыр менö оз нин сьылöd,
Дыр корсян муöй воши ылö.



Дона лыддысьысь !

*Эн вунöd судзöдны «Войвыв кодзув» журналтö
2011 волөн воддза джын кежлас. Гижöдчыны позьö
быд тöлысянь.*

Доныс:

Редакция пыр

- 1 тöлысь кежлö — 15 шайт.
- 3 тöлысь кежлö — 45 шайт.
- 6 тöлысь кежлö — 90 шайт.

Пошта пыр

- 1 тöлысь кежлö — 28 шайт 02 ур.
- 3 тöлысь кежлö — 84 шайт 06 ур.
- 6 тöлысь кежлö — 168 шайт 12 ур.

*Сыысь кындзи, гижöдчыны позьö «Урал-Пресс.
Регион» агентствоян. Адресыс: Сыктывкар, Пок-
ровский бульвар, 5 номера керка.*

Чибльög*

Лымкайяс

Сьода-еджыда арпомся бобувъяс син водзö петісны, важөн нин пөрөдөм яг местаö чепөсйөм рос вылысь жбыркнитісны. Лымкай гозъя вөліны, вөр петкөдан вөвлөм туй весътöдыс суналөмөн бура дыр лэбзисны, сьода-еджыднас син водзын пөртмасисны. Понйöй быдсөн вөтчыны босътчыліс.

— Йöймин али мый?— шуа сылы.— Мун да дозмөрөс корсь, мый тайöяс бөрся вөтлысян.

— Мичаөсь да, видзөдлыны окота вөлі,— другöй видзөдласнас шуис. Ме сійөс гөгөрвои.

Век велөдчы

Чайтан, быдторсö нин төдан, а збыльвылас зэв этшаника. Öндрей Öльөксан Вась, меысь томджык, висьталіс, лымъялөм бөрын пö дозмөр пуртікъяссö роскөн чышкылö. Лымъялөм бөрас пö ёнджык шедлö, весалөм купайтчанінас локтö да. Васьлөн зэв бура кыйсьысь бать вөлі да, дерт, төдас: вит арөссянь чөс туй вылын. И менам мөд бур төдса Толя Öльөксан вөралөм йывсьыд зэв жö унатор төдö. Сійөс батыс чөс туй вылö куим арөссянь босьтлөма. Мудзас, вөлөм, дзоляникыд, да нопъяс пуксьөдö.

Отитор ачым гөгөрвои важ йөзлысь видзөдлыны. Ас ногөн тулан капканъяс пуктавлі, да öти вөлі сутуганас орөдчөма, капканнас пышйөма. Капканас көрталөм сутуга помсö колö вөлөм сёр вылас көртыштны, а ме пуас көрт тувйөн швачөді. Туланыд шедөма да коз пу резювъяссö ставсö чегъялөма, пессигад сутугатö унаысь нюгыльтлөма, да сійö орөма. А сёр вылас кө көрталі, кызди важ йөз вөчлөмаөсь, эськө пуөдзыс эз судз да тоньгөдчис сöмын.

Чукцияс — шойна вылын

Öльөксеи дядь Борис зятъыскөд турун ваялігөн чукциясöс адзылөмаөсь. Дзик деревня дорын, сё метра лоö ли оз, шойनावывса пожөмъяс вылын вөлөм пукалöны. Вөлөн мунөмаөсь синъяс водзаныс, да абу весиг вөрзылөмаөсь. Борис ырсмунлөма ружье-ла котөртлыны, но дядь өлөдөма: шойна вывсьыд пö оз позьлыны.

А ме коркө лыйлі урөс. Лун вөлі, да эг, көнкө, садъмөд мөдаръягыдö мунөм войтырөс, олісны нин, төдөмысь.

* Пом. Заводитчöмыс тавося 9 номерын.

Сідз кө нин шуны, и мукөд звер-пөтка, вөрыд матын да, деревняөдз пыралоны. Көчъяс өшинь улын йөктөны, уръяс керка пельөсөд кайөны, таръяс мир туйбокса эндөм му вылын койтөны.

Бипура варыш

Уткаыс мортыслөн гортөдзыс абу воөма. Ю кыр йылас варыш моз и куштөма, тырыс гөн. Кольөм вося турунас сибдөма, да төлыс весиг лэбөдны оз вермы. Бипур пестылөма да, видзөдөм серти, жаритөма. Куш «Троя» доз туплясьө да, көнкө, закуситис. Чөскыда, дерт, кылалис.

Тырыс өні вөр-ваад татшөм варышыс. Наысь и пөгибө воөма олөмыс.

Кык кока көч

Кайи Керөсө медводдза тувсов вежөд вылысь көчъясөс кыйөдны. Сайөдчи вөвлөм чумали майөг видзан чом местаө, сяркнитөм кызъяс да бадъяс костө. Пув ва рөма шоңді надзөникөн лэччис вөр-пу сайө, да өкмыс час бөрын рөмдіс.

Часлы, мися, эсийө пөрөдөм пипуяс дорас кузь пельыд и петас. Но петис эз сэтчө, а горулөджык. Вөлі кык кока да өна ыджыд. Варполом Ольөксан ме моз жө көчла локтөма. Воча петі, мед плешкам оз колскөбты. Сөрнитыштім да өтарө-мөдарө нин мунам вөлі — көчыд петис буретш пипуяс дорад. Ольөксан матынджык вөлі да, мися, лыяс, а сийө матыстчыны көч дорад күтис. Көсөйыд йөй али мый? Бөр утөвтіс вөрас.

Нелямын метра сайысь кө нө он лый, мый ылнаысь сэсся лыян? Но ме Ольөксанлы нинөм эг шу. Колөкө, дрөб пыддиыс анькытш вөлі да?

Некодөс сэсся эг аддзылөй. Öдйө и пемдіс. Гежөда аддзысьлам да варовитігмоз бөр лэччим сиктө. Варгөмсьыс и пуам шыд-нымөс, оз кө асывнас юква вылө, кулөмъяс вөйтлім да, чери шед.

Сямтөмъяс

Важ электролинияыс россялөма, да кодкө сы пөлөн лэч туй лөсьөдөма. Тэрмасьмөн, челядь моз. Вөснъыдик лемень сутугаысь кольчаяс кызд веськалө гартыштөмөн. Татшөмад омөля пөткаыд сетчө.

Во-мөд абу нин матыстчылөма да өдвакө водзө вөдитас, а сямтөмлун йывсьыс паметьсө кольөма. Тырыс өні татшөм сямтөм войтырыс вөр-ваын. Уджыд абу да, кужөны и оз, кынөмпөт перйөны, лөксө зэв уна вөчөны.

Сюзypi

Өндреевка вомбокса турун зорөд вылын пукаліс сюзypi. Казялі пыж лэптөм бөрын юладорсянь локтігөн.

— О-тө-тө, кутшөм дзояник! Бать-мамыдлөн син улысь, көнкө, пышйин?— дзик нин матыстчи лэбачпиланыыс.— Лок мекөд

сиктö лэччам. Игорь внучоккöд кутанныд ворсны. Сійö тэ кодъ жö дзоляник на. Дерт, бордтö корсюрö нямравны вермас, визулі-ник зонкаыс да.

Сюзьпыд, тыдалö, повзис татшöм другсыд да исковтис зорöд вылысь орчча вөрö, дзоляник бордъяснас катласигмоз. Мед сэнi аслас чой-воккöд ворсö. А ме Игорьлы ворсны выль чача ньöба. Сійö машинаяс радейтö.

Сюлка

Тулысыс водз воліс да, арся кыйсьöмсö водз жö и восьтісны. Бара чужаніö шутёвті. Вомöс паськöді, а горт гөгöрын быдтысьöм уткайссö ставсö нин шковйöдлöмаось, а лунвылö лэбысьыс войвывладорысь абу на вөрзьöма. Но öти лунö, Ен сетіс, Öльöш тыысь казялі куим сюлкаöс. Кынöм вылын öтаваа видз вывті весиг ковмис кыссьыны. Пемыд асывнас на зэрис, да люстик кötаси. Но лыйны сюрис. Куимсыд со мый лоис: öти гатшасис, еджыд морöссö енэжлы восьтіс, мöд суныштіс да, буракö, эжör сайö дзебсис, коймöдыс лэбзис.

Гатшасьöм утка берегсянь бура ылын. Абу на дзикöдз кулöма, тірöдчö. Патрон ог жö кут видзны — сідз көдзалас. Легöдчöмнас, колöкö, береглянь матыстчас. Овлö тадзисö.

Збыльысь öд матыстчыштіс дай бөр «мортногса» лоис — бергöдчис мыш вывсьыс. Береглянь жö кутіс легöдчыштны. Суныштны видлö да оз вермы. Кузиник рос аддзи да ва дорö лэччи. Но эг судз уткаöдыс, көть эськö көмкотнам и сорөн ваас пыравлі. Ляпкыд кө вöлі, эськö водзö келі, но джумъяыс öлöдіс.

Эновтчи да мöд росла, а утка водзö видлö суныштны, ылыстчö нин берегысь. Видласис-видласис да менам рос корсигкості тюльс ваö. Сы мында и аддзылі. Сайöдчис кытчöкö эжөръясас, да корссьöма. Кыдз көть повзьöдлы, оз пет, он кө дзик вылас веськав.

Со кытчöдз вайöдіс скупитчöмыд. Лыйи кө — и став делöыс вöлі. Кодлыкö, дерт, сюрас. Оз меным — удж вылö юрсиктö лэччыны колö.

Каникульяс

Воч ю бырöда. Бур көдзыдъяс эз вöвны, сöдзтысьысь ва джуджыд лым улын эз кынмы, шлюпъялö кокъяс улын. Йи улö вöйталöм кулöмъяс лун кост мысьт видлала да сійөн ю вылын шлапъяла пидзöсöдз вöйласьöмөн. Съökыд, но шулöмаось тай: мый корсян, сійö и сюрö.

Йöрдан омöля кынмöма да муртсаөн и воссис. Аттö, ва черöй менам бур — кулöмдінса Попов Öльöксанлөн киподтуйыс. Йиö азыма пырö, оз и ныжмы.

Вотъя кулöм. Нинöм абу дорысь шедöма: мезді кызь кымын чери. Жаритмөн лоас, мöдысь унджык Енмыс сетас.

Январса луныс шоныд да лöнь. Кыліс росъяслөн шарöдчöм, а сэсса кыр йывсянь ю вылö исковтисны «партизанъяс». Орчча посёлосаяс, комын верст сайысь локтöмаось. Пельпом саяныс ноп, ружье пыдди йи писькöдлан. Йи улысь чери кыян висьöм найös менö моз жö вöдитö, оз бурдны нэм помöдзныс.

— Шедӧ-оз?— юалис вит пиысь ӧти.

— Омӧля,— вочавидзи да петкӧдлі целлофан пакетӧ пук-тӧмасӧ.

— Позьӧ на миритчыны. Часлы, ми видлам жӧ.

Гуджгисны йисӧ, гӧгрӧс розьясӧ лэдзисны тыдавтӧм сі помын мормышкаяс. Ме, нинӧм вӧчигмоз, видзӧдышти. Бадь кор ыджада черипиян сӧмын дэльӧдчисны, и то гежӧдика. Но эз скӧрмыны, мӧд йирӧ мунісны. Татшӧмъясыдлы Америкаын моз тӧвшӧрын лӧсьӧдӧм каникулъясыс кивыв. Меным тшӧтш: деревняӧ верма воыны да ас кежысь олыштны.

Весалӧм пуртік

Локтіс бур тӧдса Анатолий Александрович Попов да нуӧдіс:

— Вай катӧдлы машинанад Вуктыл поскӧдз. Ӧльӧксан (сылӧн пиыс — авт.) бура важӧн нин мунліс да мыйкӧ эз кут локны. Эз-ӧ мыйкӧ ло?

Ӧльӧксаныс кыйсьӧ, пармаысь прамӧя оз и петавлы, вӧр керкаясын войнас мудзсӧ веськӧдӧ.

Улыс керкаысь Вуктыл ёльбоксаас локтӧма, шоныд юр сюян-іныс, но кытчӧкӧ мунӧма. Лымвывса кок туйӧдыс босьтчылім вӧтчыны, но регыд энӧвтчим: ветлӧма то ӧтилаӧ, то мӧдлаӧ да кытчӧ пӧ и муніс? Горзім, да эз шыась. Ылӧ нин, сідзкӧ, шавк-сьӧдіс. Батыс колис кутшӧмсюрӧ сӧян да гижӧд, пукалыштім шоныдінас да бӧр лэччим. Но ог тайӧс висьталӧм ради гиж вӧвлӧмторсӧ. Ме сӧки аддзылі: Ӧльӧксан дозмӧр пуртікъяс весалӧма ки вомлӧс судта лымсьыс да октӧмӧн на кольӧма лэчъяс, лымйысь пыркӧдӧма и пельсь розъяс — пӧткаӧс ылӧданторъяс. Бӧрынджык висьталіс: лым усьӧм бӧрын чышкан пуртіксӧ роскӧн, да зэв на и шедӧ чукчи-вийӧрыд. Сійӧ гылӧдлӧ лымсӧ и сьӧла кыян сӧръяс вылысь. Шедӧ и тайӧ пӧткаыс.

Кывлі: мед эз веськав лымйыс пуртікӧ, вӧчӧны сы весьтӧ лэбув. Тӧда весиг: татшӧм «изобретательыс» эм Дзоль сиктын, шуӧны сійӧс Ёгорӧн, но эг на слӧймыв сыкӧд сӧрнитны. Да и сьӧкыд пӧ сійӧс суны гортсьыс, кулӧмдінса Ӧльӧксан моз век жӧ пармаын.

Ме на моз «ог дур». Мый шедӧ арнас, сійӧ мед и шедӧ. Абу тайӧ сир вийӧдӧм, мед кушӧдз пычкыны.

Бубуля

Уна жӧ и ягсер петавлӧма пипу пос бокас, юладорса туй дорышас. Ыркыд да, абу на эськӧ сісьӧсь, но гырысьӧсь да лагъя пеляӧсь нин. Татшӧмъяссӧ, вижӧдӧмъяссӧ, эг босьтав, а посныдикъясӧс, банйыштӧмаясӧс корсялі. Некымынысь ва вежлӧмӧн курыдсӧ вӧтлан да тӧвнад пӧсь картупельнад ныма сӧян, абу быть ельдӧг корсьны.

Абутӧмсӧ он на и корсь. Коркӧ эськӧ зэв вӧлі петлӧ Грязнушка (эм татшӧм нима ёль) бокшаын, да важӧнкодъ нин дзикӧдз дугдӧма. Скӧт пӧ ӧні, йирсяніныд сикт дорын мыйта колӧ да, сэтчӧдз оз ветлы, местаыс дзикӧдз нитшсяліс, да сы вӧсна, шуӧны сиктсаяс.

Пипу поскөдз верст нель. Олөмаяслы ылынкодъ.

— Сы ылнаад менам мунсьома нин,— шуё Матвей Агния.— Керөсө ветлывла. Сэтчө быдторйыс петө.

Збыльысь петө. Пипу пос дорас ветлытөдз на Керөсас кайли жö да кытшовті коркөя колхоз му гөгөрсө. Зэв уна петöма чорыд-кодъ мулюк, коді рочөн, буракö, шусьö бычокөн. Сюраліс сідзжö нывйтшак, ягсер, кос ельдöг, рыжик да весиг виж ельдöг — пипудзур.

Ставыс эськö вöлі бур, эз кö быттьö зэр. Гортысь петігөн коставліс да, мися, лöняс, а öддзис да эз и дугды. Роскöдыс келалігөн дзикöдз кöтаси. Сикт вылын паныдаси Витякöд, коді менö аддзöм бöрын шай-паймуніс.

— Мый нö тэкöд лоис?— юаліс.

— Нинöм эз,— вочавидзи.

— Чужöмьд дзик сьöд да. Бубуля кодъ лоöмьд.

Пыри гортö, видзöдлі рөмпöштанö да — бубуля и эм! Картузысь да юрысь пöсьыс да нййтыс зэрнад чужöмö визувтöмаöсь да менö вöчöмаöсь повзёдчысьөн. Чышкалі жö быттьö синмö лэччигөн, да абу ставыс мынöма.

«Тшакнас и сорөн эськö!» шуи, да öд му кынмавтöдз на вотчи.

Му ловзян кад

Тадзи важысянь нин шуöны тулысöс — му вылö збыльысь ловзян кад вайысьöс. Тöлыс да гожöмыс синмö ёнасö оз вöйысьны, а сійö пырöмөн пырö. Ме сійöс кылышта январын нин, кор шондіыс вылынкодъ пукавлö енэж пöлатын. Но лым небзыйтöдз ылын на. Весиг март помын, ыркавлас ывлаыс да, бура кутö чарöм. И век жö буретш да мартсянь ывла шоналöмөн шоналö. Кодкö быттьö шондісö, бипурöс моз, лöдсалö и лöдсалö. Мир туй вылын артмö рокöс, лым öтарö ляпкалö, тыдовтчöны кушинъяс. Регыд чепöсьясны шоръяс, а сэсся и вөрзяс йи, кылöдас юкмöсьяс и чери кыйысьясслысь лямпа туйяс.

Вöрысь тайö кадö корсьны нинöм. Кыйсян кад помасис, пес керавны водджык на. А зарава кö дум вылад усис, позьö сикт мыш вылысь видлыны. Сьöлаяс, дерт, чипсасьöны, кужан кö ылöдны, ныр улöдзыд локтасны, но жаль и айсö лыйны, гажтöм иныслы лоö. Мортлы кö пöвтöгыс гажтöм, и вöрас-ваас, кöнкö, сідз. Мед муслун йылысь водзö сьылöны, пöсь сьölöмөн олöны да посниясöс лöсьöдöны-быдтöны. Оз сöмын сьöлаяс, но и мукöд ловъя ловъяс, кодъяс вуджисны войвывса чорыд кöдзыдъяс: дозмөр-тар, кöч-руч, ур-тулан, кöин-ош. Эмöсь найö, да гажа вöрын-ягын. Пыстальысь чипөстөмсö кылан, и то майбырöй.

Вöрысь кö вайны нинöм, то мыйкö да вичмöдас ю. Муртса лöзаласны видзьяс вылын ваөн тырöм гөгрöс и кузьмөс тасьтияс, видзöдан да, пыжаяс вöйтасьöны нин. Оз кö талун, аски паняласны выль юква да мурскасны сир тшупöдъяс. И ме лэдза Öндревка ёль кырйивса коз улысь тöv кежлö кымынътлөм пыжöс, нюжöдла куръяö берег пöлöныс да ю шөрланьыс кулөмъяс. Кодкö да пысаяс, ог коль вом вежантöг.

Тайö, öти-кö. А мөд-кö, бурпöт нимкодьяс ывланас. Сійö öні —

художникӧн муртса гижӧм серпас. Рӧмгясыс югыдӧсь, синмӧ колянаӧсь, сьӧлӧмӧ йиджанаӧсь. Серпасыс дась нин, а сэтчӧ век содӧны выль сергяс да рӧмгяс: то утка чукӧр, гӧгралас-гӧгралас да, шыв пуксяс кытчӧкӧ, то таргяс сьӧд молясӧн ӧшгясны ылі тілльӧ, то варыш кынмас медся джуджыд коз йылӧ. Дзолясянь аддзантор, а быд пӧрийӧ нимкодъ.

Медводдза дзоридз

Тувсовгя медводдза дзоридзӧн лыддӧны лымдорчачаӧс (подснежникӧс). Миянладорын сійӧ абу. Миянладорын медводдза тувсов дзоридзӧн, ме думысь, колӧ лыддӧны берба-баляӧс.

Роч «вербаысь» «берба» лоӧма, да «баля» нӧшта содтӧмаӧсь. И гӧгӧрвоана, мыйла: пушыд еджыд бербаыс дзик баля нигӧн кодъ и эм.

Повтӧм баддӧыс, водз ловзьӧ, йӧткыштӧ небыд ёкмыльяссӧ. Чорыда на корсюрӧ кынмавлӧ, а терпитӧны, луныс нюмдас да, веж биӧн сяркнитӧны.

Бипур

Пон кындзи вӧрын медся бур ёрт — бипур. Зэв лӧсялӧ и ю дорын. Сійӧс лӧсьӧдны ёна велӧдӧм оз ков, мед сӧмын вӧлі мыйысь вӧчнысӧ. Эн дышӧдчӧй корсыны сирӧд. Сійӧ, торйӧн нин ӧзтӧм-пестӧм вылӧ, сӧ пӧв бурджык кос увгясысь да сямӧдысь. Кыдзи важ йӧз шулӧмаӧсь, сямӧдыд — морт виысь, а сирӧдыд — дорйысь. Сямӧдыд, абу кӧ нопсыд (ме мукӧддырйи дзоляник торок босытывла), а сӧмын на кытыськӧ кулыштӧма, вермас дасысь куслыны, а сирӧдыд, посныдыка чагйӧмӧн, стружки кодӧн вӧчӧмӧн, ӧзгяс пырысь-пыр да вочасӧн ӧддзас. Ни зэр, ни слӧт, ни лым, ни тӧв кусӧдны оз вермыны. Шонтас, косьтас и чайӧн юкталас сирӧдыд. Сійӧ век кос, кӧть лым улысь перьян, кӧть зэр улысь босытан. Ас вӧрын кӧ, тӧдан, кӧні мый эм, да ӧдийӧ аддзан. Менам чӧс туй вылын кӧнсюрӧ весиг вундалӧма сирӧдсӧ да кондасӧ дженныдик чуркаяс вылӧ да меститӧма пу бокӧ. Ковмас да, сирӧдсӧ лӧсышта да кондасӧ посныдыка поткӧдлышта сӧмын. Ёна и бур. Зэриггясӧн ӧд зэв деливӧ корсьысьнытӧ.

Бипурыд вермас не ловзгыны и бур «сӧянӧн», нинӧмӧн кӧ быттьӧ ӧзгыны. Овлӧ татшӧмыс, нильзяс кӧ дзикӧдз ӧти истӧг кӧрӧбыд. Та вӧсна колӧ босытны этша вылӧ кыкӧс да нӧшта пуктыны плӧнка пытшкӧ, мед эз кӧтась. Ме новлӧдла и зажигалка, кодӧ сідзжӧ плӧнка пытшкын да век кос. И тӧда, мый любӧйлаын меным шедас би, кодӧ шонтас, вердас-удас да вайӧдас гортӧ.

Кыйсьӧмсӧ дугӧдлыны

Вӧрын да ва вылын кыйсян правилӧясӧ бӧргя кадӧ пыртисны вель уна вежсьӧм. Менам видзӧдлас вылӧ, ӧткымынторгяс ваясны сӧмын лӧк. Мыйла колӧ тӧждысьны посни чери вӧсна, а

гырысьсö поэь кыйны мыйта окота? Гырысьсö кө öд кыян — и посниыс оз ло. «Бать-мамтöг» «челядь» оз овлыны.

Мыйла сетöны позянлун лыйлыны арнас съолаöс «мелко-ысь»? Съола кындзи öд этш тöдтöмъяс колскöдасны став ловъя-ясö — зверсö и пöткасö. Кодкö усьö да кодкö оз. Зэв уна воштöм лоö весьшöрö.

Сетисны позянлун вöдитчыны пищальöн дас квайт арössянь, и ме думысь — пыдисянь мöвпыштлытöг. Вунöдисны мортöс воспитайтöм йылысь. Öнiя дас квайт арöсаыд зэв абу кызь ли комын восайса том морт кодъ, ог нин сёрнит нэм джын сайö колöм кад йылысь. Водзтi кө бать велöдис писö, кыдзи овны-вывны вöрын, ичöтсянь пестерын новлöдлöмөн, то важөн нин абу тадзи, сы вöсна мый кыйсьöм помысь кынöмпöт дугдис шедны. Дзоляниктö öнi пестерын ли ноппын оз нин новлöдлыны, оз нин велöдны быдсяматорийö, мый колö тöдны вöрын да ва вылын. Да и асьныс челядь видзöдöны оз вöрö, а телевизорö да компьютерö. Öнi уна семьяын бать-мамлөн öлöдана кыв ныв-пиы абу закон, и дас квайт арöсалы киö ружье босътны поэьомыс, ме думысь, бергöдчас лекторъясөн. Öнi öд дугдисны вежавидзны весиг сиктса челядь. Аддзыланнды тай туй пöлөнъясысь дрöб зарадыасөн розьöдлöм пасъяс — тайö кызвыннас налөн «уджыс». Пасъясö да банкаясö лыйлöм кындзи гындöны коньор ракаясöс да катшаясöс. Найö жö тотшкöдöны борд вылö кыпавтöм на пöткаöс. Ас уткаяс калянысь гырысьджыка оз и быдмывны — сюрöны зарад улö.

Дас квайт арöснад мортыдлөн этша на вежöрыс. Чайта да, ружье сетöмсö колö урчитны дас көкъямыс арössянь, кор эмышт нин олöмлөн кутшöмкö опыт да общество водзын кывкутан вежөр. Паспорт сетöм бöрын морт лыддысьсö тыр арлыдаөн, да сылы колö кывкутны законъяс водзын, но сёрни мунö оз рогатка, а öружие йылысь.

Ас кадö ыджыд öшыбкаөн лоис сийö, мый сетисны позянлун ньöбны да вöдитчыны нарезной öружиеөн, торийөн кө, карабинөн. Татшöм öружиелөн зарадыс судзö ылöдз, некутшöм звер ни пöтка оз куж видзчысьны. Со и гылöдисны став дозмöрсö да тарсö, швачийöдлисны став көчсö да ручсö. Вöрын этшаник съола кындзи нинöм нин эз коль, и со сийös лэдзисны лыйлыны «мел-кашкаысь». Правилöяс да законъяс лöсьöдысьяс олöны оз государственной юрөн. Ме ногөн, колö бөр сдайтöдны нарезной öружиесö, тырмымөн шылыд стволаыс. А мед мыйкö колис на вöрын-ваын, колö дугöдлыны вöрын и ва вылын кыйсьöм көть нин öти во кежлö. Та вöсна некод оз кув, а зверыс, пöткаыс да чериыс содас.

Сарапана кыйсьысьяс

Татшöмъясыс — нывбабаяс. Дзолядырсянь тöдлi миян Габов деревнякöд орчча сиктысь Öсип Вераös, кодi öнi абу нин ловъя. Евсей верöсыс, кодi абу жö нин ловъя, велöдöма, да ассъыс бурджыка сэсся сюсь аныд кыйсьöма. Зэв шаньöсь вöлины тайö гозъяыс. Керканыс сулалiс аэропортö нуан туй вылын мед-

* Ичöт калибра винтовка.

бӧръяӧн (водзті кызвыннас самолётӧн и лэбавлісны), да пыралысьыд век вӧлі, и век пызан выланьс сѣян-юантӧ лэптылісны.

Миян деревняыс Пуд (вӧлі татшӧм нима морт) гӧтыр (нимыс эськӧ Анна вӧлі, но век тадзи шулісны) вуграсис. Водзті чериыд уна на вӧлі да вутырад зэв шедліс. Швыргас черисӧ шатиннас пельпом саяс да кызкӧ тай аддзас жӧ. Эз надзӧникӧн кыскыв, а век швыргыліс. И ми, челядь, тадзи жӧ вӧчлім. Мун пӧ да и тӧд, кытысь тайӧ модаыс.

Кывлі, мый и мукӧд сиктъясын да деревнясын нывбаба кыйсьысьыс да вуграсьысьыс вӧліны и ӧні эмӧсь. Кодӧскӧ лолыс тшӧктӧ, кодӧскӧ олӧмыс, мед пинь улын мыйкӧ вӧлі. Ӑні йи улысь чери кыйысьяслысь ордйысьӧмъяс нуӧдлӧны да сэсьяс-ысь унаӧс аддзылан, весиг айловъясысь унджык кыйлӧны. Но тайӧ ёнджыкасӧ шойчӧм.

Кыйсьӧмыд — век жӧ айловӧн удж. Сійӧ ёна мудзтысь да весиг лов босьтысь. Кымынӧн гортаныс бӧрсӧ эз бергӧдчыны: ош чашйис ли, мыйкӧ асьныс лоисны. Вотчӧм — мӧд делӧ. Сійӧс тай и тӧдӧны, арнад ёна шарсйӧны пувтӧ да чӧдтӧ. Иналасны, да сьӧмтор вичмыштӧ. Зэв на и отсалӧ парманым, бура мӧвпыштлӧмӧн бӧрйылӧмаӧсь чужан мунысӧ комияс, тырмылӧма вежӧрныс.

Велӧдісны...

Миянладорӧ вӧр лэдзӧм помысь нажӧвитны «кузь руб» локтісны сюрсясӧн. Шулісны «вербованнӧйясӧн». Унаӧн бӧрсӧ гортаныс эз и мунны, гӧтрасялісны да верӧс сайӧ петісны, сорлалісны коми вир. Талунъя йылӧм комиӧн оз нин кӧсйы сёрнитны. Со мыйӧдз вайӧдіс гурйыв ӧдзӧсӧн олӧм. Но абу та йылысь сёрниыс.

Кӧся пасйыштны, мый налысь велалім вӧрӧ-ваӧ петалігӧн. Эг тӧдлӧй йи улысь вуграсьӧм. Тӧвнад черитӧ кыйлім жӧ, но дӧмӧдъясӧ гымгаяс вӧйтӧмӧн. Зэв на и шедліс. А мед луннас йи вылын кад колявны — татшӧм модаыс комилӧн эз вӧв. Весиг восьса юӧн берег пӧлӧн шандайтысьӧс прамӧй мортӧн эз лыддьывны. Прамӧй морт уджавліс, черитӧ кыйліс рыт-асывсӧ. Кердор удж бергӧдігӧн локтӧм йӧзлӧн вӧліны шойччан лунъяс, да унаӧн мунысны йи вылӧ. «Висьмисны» и миян да вель уна удж эновтісны гӧтыръяс выланьс. Тшӧтш велалісны «пыдзыртны» сэнӧ еджыд доз, мӧд ногӧн кӧ, водка. Эз бӧрынтылыны и спирт. И ӧніӧдз тадзсӧ кыйсьӧны да «пыдзрасьӧны». Вӧйласны и быдсӧн, но оз эновтчыны. Окотаыс йиджӧма вираныс, оз петкувтӧдзныс.

А рочьясӧс да мукӧдӧс ми велӧдім кыйсьыны чӧсьясӧн да лэчьясӧн. Зятъясӧн лоисны, да кыз он велӧд? Ӑткымынъяс сэтшӧма паськӧдчисны, мый асьным маті берегӧ эг кутӧй сибавны.

Олам, юрнымӧс гыжъялам. А мый и гыжъявны весьшӧрӧсӧ. Олӧмыд — сійӧ ытва, пыжӧс моз мӧдарӧ он бергӧд. «Лым сывтӧдзыс» ас юрӧн коліс овны.

Менам пур

Ӑльӧш тыысь нинӧмӧн уткаяс судзӧдны, да тэрмасьӧмӧн вӧчлі пур. Ог и соссьы — лӧкиникӧс. Ӑти ар кӧ, мися, тырмас и, мӧд

во мөдөс вөча — лөсьыдөс, мед та моз оз повзёдчы путкыльтөмөн.

Кыкысь кымын и смелмөдчылі петавны ва вылас. Ог төд, мукөдъяс сөвлісны эз. Забыль, Варполом Олёксан шуліс: аслыд пө и вөчөмыд.

Өти воө ытваыс менсьым пурйөс колис тыбокса бадь дорө. Таво нуис Ыджыд видз помө яг дорышланьыс. Сідзи и оліс вөрзёддытөг. Ытшкысьяс гөгөртөмаөсь, абу вөрзёдөмаөсь. Кодкө кутас ноксьыны ютш колодаөн...

Вот менам и рөбөта йөзлы серам вылө. Оз кө син водзысь выль ытва ну, жугөдны лоө да кытчөкө вөрас суюыштны.

И выльсө на эг вөч. Потшгясөн да мыйөн да уткаяссө судзө-дала, төлыс матысталө да. Некор на вөлі, да и уткаыс судзөдмөныс абу, кытчөкө ыджыд ва вылө бокиті лэбө, миянө ылалөмгьяс-ыс сөмын веськавлөны.

Повтөмгьяс

Май коймөд лун. Воч ю местаясөн бура кузя нин воссялөма. Йи рыж да вөсни, но йи улысь чери кыйысьяс катша-рака мында на Олёш тывомса джумгьяын. Лысьтөмаөсь на кайны йи вылө, көть эськө Павел Оньө воддза лунас купайтчөма. Оз кө вөлі шед, эськө өдвакө нин вуджисны, юрнаныс ворсөмөн, берегсянь косталөминсө потшгяс вывті, да мык бура босьтө. Видзөдышті да — сөмын мачалөны!

— Вөянныд өд өтчукөрөн, ерөмаканьяс!— горөді кыр йывсянь.

— Эн пов. Победа лун бөрын на йиыс кылалас!— вочавидзисны меным.

И збыльысь, сідзи и лоис. Май дасөд луннас йи вөрзис, да мөд луннас на лунтыр торокгьясыс кылалісны, көджгясөд чукуль-мукуль вөчалігтыр. Видзөдан ылісянь да, йиыс бөр бөрыньтчылө, быттө вабергачө веськавлө: ёна чукалө миян Воч юным.

Уткаяс йиа дырйи на волісны, гөпгьясын пукалөны, а дзодзөггьясөс, туриясөс ни юсьясөс эг аддзыв. Ю миян дзояник, нюргяс дзояникөсь жө. Паськыдінө лэбисны-ордйисны.

Жов

Миянладорын оз быдмы да, деревняө жов пу вайи сө верст-сайса юрсиктысь. Окмыс вуж лэдзи арнас муө, потши, мед скөт оз таяв. Тулыснас видзөдлі да, ставныс босьтчөмаөсь. А кодсюрө өлөдліс: зэв пө асныра пуыс да вермас и бөрыньтны йөз мутө.

Ме өд нимкыв лыдди дай шоныд вылө вөв куйөд вуж улас пукті. Гашкө, жовтөгыс олі, өшинь улын пелысьяс мич вылө сикөтшасьлөны, да оз быд во. Сьөлаяслы лэчкасьны нинөмөн овлө, а гөрд моля жө жовыс быд во розгья.

Шойна вылын

Миян деревнялөн шойнаыс — Матвей вис тылөн джуджыд кырийвса пожөма діын. Водзті таті Воч юыс визувтлөма да

веськыдалӧма сэсся. Кос да гажа места. Мусӧ мыш вывсьыс эновтісны, да бура ыджыд кӧджыс регыд бӧр пожӧма ягӧн лас, тіллыс вель нин джуджыд.

Тані ас сиктсаяс пӧвстын ыджыд мамӧ да Наста ичинь. Деревняӧ быд волігӧн ме век кежавла татчӧ. Воан и лэччан лунӧ дай шӧракостас, дырджык кӧ олӧм вичмылӧ. И мукӧд гуяссӧ кытшовта, видзӧдала. Оз-оз да и выль крестьяс сувтӧны сідз нин этшаник йӧзнас.

Кыдзи олӧмын, сідзи и шойна вылын. Рӧдсӧ-вужсӧ пыдди пуктысьясылӧн гӧгӧр лючки потшӧма да краситӧма, идралӧма да сӧстӧммӧдӧма. А кодьяс олӧны ылӧсас, налӧн и тані абу морттуйыс. Ог нин шу пӧль-пӧчьяс, ыджыд мамъяс да ыджыд батьяс йылысь, весиг бать-мамныслысь пӧрӧм крестьяссӧ оз вежны да выль потшӧсьяс оз сувтӧдны. Коді потшсьӧма да сюрьяс вылӧ вӧляник пожӧмьяссӧ пӧрӧдӧма, пуяссӧ идравтӧг и кольӧма, абу увйӧма ни чукӧртӧма. Мир туйланьсӧ урӧстӧма-ӧсь дзикӧдз. Ёна жӧ и мисьтӧм видзӧдны. Пыравлан да сьӧлӧмтӧ сӧмын дойдан.

Китай кулӧм

Сӧнысь вӧчӧм китайса кулӧмъяс пыр, кодьясӧс омӧль вӧсна-ыс ме шуа «нямӧдьясӧн», гырысь сирьяс мунасны да сӧмын «ӧшиньяс» колясны. Зэв жӧ розьӧдлӧны ва шырьяс. Лэптан кулӧмтӧ, да шыбитны и кольӧма. Но ёнасӧ он вишкы: донтӧм да, кило куим чериӧн вешмӧ. А ӧти кулӧмнас дас та мында кыйлан. Вӧсни сӧа кулӧмас сетчӧ чериыс, да сы боксянь бур тайӧ кыйсянторйыс. Кытчӧкӧ кӧ пысаяс кулӧмӧй — прӧщай жӧ дай: кушӧдз косясьлас.

Лӧк сійӧ, мый ёна посни синмаӧс тшӧтш лэдзӧны, да браконьерьясыд посни черитӧ ёна бырӧдӧны. Колӧ дугӧдны вывті посни синма кулӧмьяссӧ вӧчӧмысь да вузалӧмысь.

Вом вежысь

Сьӧкыд шуны, кор пуксьӧ гожӧмыс. Тӧлысь серти кӧ, юньын, а овлӧ, мый май шӧрнас нин гожӧмсьыс гожӧм: турун кос шӧрӧдз пуритӧма, картупель мудйим, и весиг выль тшакӧн нин чӧсмасим. Но кызвыннас юньнас и дзикӧдз шоналӧ муыс, да гӧрдазасьӧм дзоридзясысь босытчӧ кисьмыны быдсяма пӧлӧс вотӧс.

Гожӧм пывсьӧдӧ выль корӧсьӧн. Гожся Иван лунӧ пырам сӧйӧн лов бурмӧдӧм да сӧстӧммӧдчӧм бӧрын. Та гӧгӧр жӧ и петам видзяс вылӧ, мед пуктыны чорзыйтӧм на медся чӧскыд турунсӧ. Водзті петлӧмаӧсь вит кымын лунӧн сӧрӧнджык — Петыр лун бӧрын да эштӧдчылӧмаӧсь Илья лунӧдз. Но ӧні йӧзыд уджтӧ оз нин тӧдны сідзи, кыдзи водзті. Овлӧ, дышджыкъяс пуктысьӧны на сентябрын.

Гожӧм — вом вежысь. Пасйи нин: медводз чӧсмӧдлӧ тшакӧн. Менлы вылӧ медся чӧскыдӧсь посныдик гӧрд гобьяслӧн жаритӧм юръясыс, быдсӧн пиньяс улад дзуртыштілӧны. Челядьдырйи

зэв чөскыдөн вөлі бипур весьтын ньөр йылын жаритөм да со-
лыштөм уртшак.

Тшак бөрас зэв лөсялас йөла оз. Абу градывивсаыс, а вөрс
эрдьяс вылысь вотөмаыс. Посныдик, да весиг кружка тыр бу-
ра дыр лоө вотны, но, номъясысь өвтчигмоз, вотан, мед панясигөн
синъястө куньтыравны.

Сэсся вооны чөдлач да чөд. Август помланнын вузалөм могысь
вотөны нин и пув. Но аслыд сөйөм вылө медбур вотны лым
усьөм водзвылын съөд пувсө, пармаыслөн верстьö көрасө, коді
абу сөмын юмов, но и пөтөс.

Гожөм — звер-пөткалөн быдтысян кад. Тулыснас лымъя дыр-
йи на ловнысö кыпөдөм бөрын съөла-дозмөр лөсьөдісны позъяс,
чөвтисны сэтчө колькъяс, кодъясөс пөжөм бөрын шыөдчисны
силбөяс. Сійö и төжд — сюявны паськөдөм воманыс гут-гагөс.
Борд вылө кыптасны да асьныс сэсся кынөмпөтсө шедөдасны.
Сентябрын ыджданас бать-мамнысö пөшти суөдасны. Гожөмыс
и зверъяслы верстяммөм вылө. Съөла-дозмөр кө вотөстө өти
тусьөн кокалоны, то ош коддьөм «китырнас» шарсийоны. Варгылъ
кокыслөн ыджыд тыртан «бөчкаыс», зато сэсся, гуө пырас да,
төвбыд нистө.

Дерт жö, гожөм — турун пуктан, меуна пөсь кыстан кад.
Абу весьшөрö шулөмаөсь, гожся лун пö во вердö. Сідзи и эм:
турун пуктан — төвбыд пызан вылыд еджыд сөяна лоө. Он,
небось, пыктав, йөвнад да выйнад, нөкнад да рысьнад. Төдлі
и ме страднасө, кор Габовын олі. Помнита: поводнөя мудзан
гөрбуш косаөн лунтыр өвтөм бөрын, но, войыс веськөдас да,
бара ловтырнад кыпалан. Том на да, верман на да!

Гожөм — тайö и вакөд медъөна ёртасьөм. Челядьдырйи сәні
сяльөдчан лун-лун. Да и верстьö дырйи турун пуктігъясад
бузгысян.

Гожөм йылысь позьö гижны кузя, сійö — помасьлытөм висьт.

Көк

Дзолядырйи чайті, мый көк — кутшөмкө аслыспөлөс лэбач,
өшинь улын чипанъяс вылын ыджыдалысь чиган паськөма пету-
кысь на мичаджык. Висьтавлісны эськө, мый сійö дзоляник
руд варыш и эм, но ме эг эскы: татшөм съөлөмсянь «ку-ку»
шуалысьыс, йөзлы нэмсө арталысьыс, абу варыш, а кутшөмкө
мөд пөлөс лов. Но школаын велөдысь петкөдіс серпас вылысь
да эскөдіс, мый руд лэбачыс збыльысь көк и эм. Да и книгавыв-
са серпас улас вөлі гижөма: «көк».

Дача вылө мянкөд ветлөдлысь дзоля внукөс дыркодь эскөді,
мый дзик орчча вöрын көкысьыс — град йөр потшөс вылын
корсюрö пукалысь лэбачыс и эм, да, пөрийөдлан пö, пөльö, сөмын
шуаліс. Но өтчыд дзоля морт ачыс адзыліс, кызди көк потшөс
вывсьыс кыпөдчис матысса кос козийö, лөсьөдчыштіс ув вылын
да босьтчис лыддысьны.

Абу мичлун сайын сывны ли мөдторйөн шензьөдны кужөмыс.
Со сквореч съөд ёкмыль и эм, а кутшөм мичаа босьталө. Оз
торъяв мичлунөн и мянладорын медъөна сьылысь квайтпалич.
Тадзи жö и йөз пөвстын: синмö усьтөмыслөн овлө медыджыд

енби. Татшөмъясыс сьөлөмтө босьтөны пытшкөсса мичлунөн. Сідз кө нин шуны, му вылын став ловъяыс аслыснога мича.

Пуд Вась

Во нелямын мысти сөмын аддзысим ас тшөтшъякөд — Пуд Васькөд. Эн чайтөй, мый нимтыся: батыслөн збыльвылө нимыс Пуд и вөлі. Кутшөмкө поп татшөм ним пуктылөма. Но Вась та вөсна оліс, увтыртөмаөн асьсө эз кыв. Сылы зэв бура сетчисны арифметика да математика, но гижис мисьтөма, ышыбкаясөн, да коми и роч кывйысь медбур оценкаөн вөлі «три». Помавліс профтехучилище да лоис трактористөн.

Мунліс ас чужанінысь да олө Ленинградскөй обласьтса кутшөмкө сиктын, гөтырыслөн рөдинаын. Висьталіс эськө нимсө, да менам юрысь петіс. Пенсия вылын, оз нин уджав, локтөма видзөдлыны кольөм рөдвужсө. Сувтлөма нин Ульянаө, көні тай манастыр, да көні коркө уджавліс Кулөмдінса леспромхозлөн подсобнөй овмөсын. Локтөма юрсиктө чөй ордас да со кежис ме ордө. Корис висьтавны Габов деревня йылысь, көні ми ськөд чужим да быдмим, зэв на томөн янсалім велөдчөм да специаль-носьт серти удж абутөм вөсна. Абу нин волөма во комын вит. Ме эськө бура дыр жө коставлі, но во дас вит век аръя сэні да костъясас на гөгыльтчыла сө верстсө юрсиктсянъ.

Мися, воддза ветымын кымын керкасьыс «ловъя» сөмын дас вит кымын. Олысьыс муртса унджык. Став керкасө и олысьсө лыддьөдлі चुныас вылын. Мися, удж некутшөм абу. Кодлы некытчө воштысьны да коді нэмсө көсьйө помавны тані, найө и колисны. Унаөн вөрө пес заптыны оз мунны, пилитөны эновтөм керкаяс. Вась шемөсө эз усь: миянладорын пө тадзи жө.

Челядьдыр казтылігөн вуджим вуграсьөм-кыйсьөм вылө. Вунөдөма нин вуграсян местаяслысь, тыяслысь, видзьяслысь нимъяссө. Сиктсянъ верстөн-джынийөн кымын горулын зэв пө вөлі шедө ком. Мися, местаыс шусьө Визув косьтөн, а сикт катыдын эмось Ревин да Павел вис косьтъяс, кытысь комыд шедө и өні, көть воддза серти ёна этша.

Но Грязнушка ёль паметяс кольөма. Гашкө, сы вөсна, мый Яга ёль йылө каян туй вылын тайө ёль пөлөныс вөлі колхозса мөсьясөс видзан пөскөтина, а пастукаліс батыс, да Васьлы гожся каникулъяс дырйи ковмыліс отсасьны сылы.

— Сэтчө зэв ёна ельдөг петліс,— казтыштіс өттшөтшъяй. — Ёна и ваявлім.

— Ёні дзик ньөти оз пет. Раскыс нитшсяліс да, бырис чөс-кыд тшакыс,— юөрті ме.

Висьтавны эськө позис и кушөдз чирсөм сись кодъ пожөма ягъяс, чериа тыяс пыдди кольөм лягушаа гөпъяс, дзикөдз нин россялөм видзьяс йылысь, но аддзысьөмысь кыпалөм ловсө Васьлысь уськөдны эг кут. Мед олө гөгөрбок на лөсьыд челядьдырас. Мед чужаніныс сулалө синъяс водзас век на озырөн да мичаөн, кыдзи вөлі водзті. Эз өд шу кайлыны деревняөдз. Нинөм нин пө менам сэні абу.

Өтпырйө жалъ и эз ло жалъ меным өттшөтшъяй. Жалъ,

мый көнкө вель ылын йөзын оло. Абу жаль, батыссы копырт-
чывны деревняса шойна вылодз кутшомкө сё верст эз кайлы да.

Челядьдырся сёян

Ыджыд гажьяс кежлө, торйөн нин юрсиктын ли юркарын
ас анытуйөн петкөдчигөн, гөститөдан пызан выло лэптылоны на
ляз, сором, пикан, рака кузья да шомкорья пирөгьяс, а өд ме-
нам челядьдырйи татшөм вөлөгаыд вөлі быдлунья сёянөн. Ми,
дзоляс, и вотлім да өктылім. Бать-мамлы вөлі некор, найос сёр
рытөдз вурыштліс колхоз удж.

Ставыс вөлі, кыз шулоны, ныр улын, ыло мунны эз ков.
Медся ылыс — верстайса Керөс, көні колхозлөн муяс выло
зэв петліс рака куз. Шомкорла ветлім Шөр виддзө ли вуджавлім
мөдлапөлө Кык зорөдаө. Сэтысьясысь жө нетшкылім пикан.

Зэв чөскыда пыравлісны вомө ли, коляоз, пожөм йыв, гум,
гөнян, ог нин сёрнит оз, чөд, чөдлач, мырпом, пув, сэтөр, льөм,
лежнөг йылысь. Шомасыс кусыньтөдліс вомьяс, но сёйлім и
ыжнён, турипув да пельсь. Велөдлісны мамьяс: ёнджыкөсь пө
лоанныд, онджык пө висьмөй.

Збылысь, висьомыс ёнасө эз и сибавлы, көть водз тулыссян
сёр арөдз котравлім көмтөг. Кыткө кө киным пуртөн вөласигөн
вундысьліс ли кокным сангысьліс да босытчыліс петны вир,
сідзжө отсавліс быдманаыс да сюранаыс: доймөминө пуктылім
лапкор ли гульчунысь пуртөн вуштөм пызь. Кыз шулоны, пон
вылын моз бурдліс.

Эм мый казтывны челядьдырся. Сэні ставыс морт нога.

Чери-өгурцы

Сёрниыс ком йылысь. Сійө збылысь өгурцы көра. Миян
Воч юын, торйөн нин сёлөн йылас, көні менам Габов сиктөй,
медся пыдди пуктана да чөскыд чери. Гашкө, кодкө шуас, мый
сьөмга донъявсьө вылоджык, но оз быдөн төд сылысь көрсө.
Сьөмгаыд катлас да и лэччас, анытуй на колө сійөс кыйны, а
комтө, сёйө кө, быд визулысь позьө мачавны. Гырысьлы и посни-
лы. Ыджыд анытуй оз ков. Сөмын зумыджыка вугыр шатинтө
кут, быгылтан коддьомьясыс поводнөя вермасьоны, лэптымөн
берег вылодзид.

Өтитор лёк — зэв өдйө небзьө. Ёкышгясөс моз кертөг лун-
тыртө оз позь видзны, артмас рокөс. Дугдас сёйөмысь, дугдан
жө вуграсьны, да пыр и колө керны да солыштны черисө, абу
кө сикт весьтын, да он вермы котөртөдны гортөдзид.

Сідзсө шедө быд косьтысь, но эмөсь ёна шедан местаяс:
Визув косьт, Павел вис косьт, Дранесник весьт, Ревин косьт,
Яга вом. Кад выло кө веськалан, бура шедө и Яга, Ёндреевка,
Войим ёльясысь. Кор гыалөм бөрын ёльясысь лэччө йирьясө
да, кыз шуоны миянладорын, нянявлө кулөмгясө. Солаласны
да төвбыд сэсся чөсмасясны.

Воддза серти мича чериыс ёна этша. Вөр пөрөдөм вөсна Воч
дзикөдз ляпкаліс, чериыссы эз ло вөляыс. Весиг гурина бырис,
коді дзолядырйи куш вугырсө босьтліс.

Артист

Карело-финскӧй лайкаӧс босьтлі кычиӧн орчча посёлокысь. Стӧчджыка кӧ, Коля воклы тшӧкті корсьлыны, да сійӧ меным вайис. Друг ним сеті, да абу век друг кодъ. Дышӧдас кӧ парма-вӧрӧд котравны, кыз шуласны, синсӧ лапниттӧг менӧ вермас эновтны, сиктӧ кольӧм ас коддьӧмъяс дорас шутёвтны. Чӧс туй вылысь воа гортӧ, сійӧ бӧжсӧ легӧдӧмӧн ӧшинь улысь петӧ, менӧ вочаалӧ, гашкӧ, весиг дыр ветлӧмысь видӧ. Ме броткышта, да сійӧн и кольӧ: ог жӧ кут чужъявны ли беддӧн вачкавны, кызди ӧткымынӧн ассыныс понъяснысӧ «велӧдӧны». Оз позь кывтӧм пемӧстӧ кедзовтны.

Ме ачым мыжа, мый понйӧй татшӧм. Кыйсьыськӧд понйыс век вӧрын, а ми ськӧд деревняӧ волам отпуск дырйи сӧмын арнас. Бур понйӧн сылы лоны некыз. Со и уртӧ дас пуысь увтӧ да муртса вӧтчыштӧм бӧрын дозмортӧ эновтӧ. Скӧрмыла жӧ эськӧ, но Друг вылӧ лӧкысь ог горзы ни син водзысь ог вӧтлы. Мӧдарӧ, прӧща кора, «Тшыкӧді ме тэнӧ, Другӧй, тшыкӧді...» шулывла.

Чӧс туйтӧ вӧдитны эськӧ ёна понйыс оз и ков: мый шедас, сійӧс чукӧрт дай, но ловъя лолыскӧд гажаджык. Сылы мыйкӧ висътавны позьӧ, и ош коддьӧмтӧ кӧ кылас, кӧнкӧ, юӧртас. Оз эськӧ шуны варгыль коксӧ морт вылӧ воысьӧн, да код тӧдас...

Сы пыдди Другӧй кужӧ артиставны. Кор став удж бергӧдӧм бӧрын рытнас пукся ворсны баянӧн, сійӧ дыр оз кӧсйы, пыр и босьтчӧ «сьывны», посводзын нюжйӧдлӧ операса солист моз. Кытчӧдз ог дугды, сэтчӧдз и оз ӧвсьы. Петавла жӧ эськӧ посводзӧ, янӧда йӧзсӧ шызьӧдӧмысь, но мыйӧн босьтча ворсны, пыр и босьтӧ ассыс партиясӧ. Пон омлялӧмтӧ миянладорын оз бурӧн лыддыны, да «концертасям» регыд, но и тайӧ миян сьӧлӧмъяслы тырмымӧн.

Жогнитӧм

Миянладорын шуӧны оз пӧръялӧмӧн, а жогнитӧмӧн. И медся жогнитӧдысьясыс — вӧралысьяс да чери кыйысьяс. Сьӧла-мӧд кӧ шедас — ноп тыр вайӧмӧн висъталасны, весът кузя кӧ чери пысаяс — петкӧдласны сыв кузя сирӧн. Йӧзыслӧн этшыс татшӧм, да мый сэсся вӧчан?

Пӧшти быдӧн пӧръялӧ, но эмӧсь медся пӧръясьысьяс. Кызкӧ пасйылі нин, татшӧмъяс лыдын торъялӧджык Павел Ӧньӧ.

Суӧдіс кызкӧ пув вотанінсянь локтігӧн Яга таладорын. Велосипед багажник вылас ноптор. Эз и сувтлы. Гӧгыльтчигас юалім, уна-ӧ шедіс, да пыр и сӧрыштіс: комын сьӧла пӧ да куим чукчи. Но и баквал: татшӧм нопъяд мед нин дас вит кымын сьӧла...

Вӧр-ваыс дорйӧ

Чужан му йылысь сёрни дінӧ, ме думысь, лӧсялас и тайӧ гижӧдыс.

Модерн туйвизь серти серпасасысь Василий Васильевич Кандинскийлӧн нимыс тӧдса став мирын. Этшаӧн тӧдӧны, мый

сійö 1889 воын, кор велöдчис Москваса университетлön юридическöй юкöнын, научнöй экспедициякöд воліс Коми муö. Студентлы, коді вöлі политической экономиялön да статистикалön кафедра вылын, интересуйтчис римскöй да уголовнöй правоön, а сідзжö этнографияön, окота вöлі пыдісяньджык тöдмасьны ылі пельöсса войтырлön олöмкöд.

Экспедицияö ветлöм бöрын студент-юрист гижис кык статья. «Из материалов по этнографии сысольских и вычегодских зырян. Национальные божества (по современным верованиям)» гижöд веськыда йитчöма Коми му историякöд. Сэтысь унатор верман тöдмавны сійö кадся чужан му йылысь. Но унджык выльтор аддзан дневникас вöчöм гижöдъясысь. Пасъялö, кызди олöны зыряна, кутшöм налön сёян-юан, паськöм, керка-карта. «Сьölöм шонтысь тайö керкаясас ме сьölöмön кылі сійöс, мый сы бöрын сэсса эг на кывлы. Найö велöдісны менö пырны серпасö, овны сэні», — гижис сійö бöрынджык.

Записнöй книгаыс, кытчö сійö пасъяліс коми йöзлön олöм-вылöм йылысь, вölöмкö, «ловъя», сійö Парижын öнія искусство-лön Ж.Помпиду нима национальнöй музейын. Сэтысь пасйöдъяс пыртисны В.Кандинскийлön бöрйöм гижöдъяса кык тома книгаö, коді петіс 2008 воын. Петіс Москваын сöмын 1500 экземплярön да абу Коми республикаса ни öти библиотекаын. Неважөн дневникас пасйöдъяссö чинталöмön йöзöдіс чужан му туялан «Дым Отечества» торъя выпускын «Республика» газет. Ме лыдди да аслым вылö вöчи татшöм пасйöдъяс: «Центр зырянского края — Усть-Кулом»; «В день Петра и Павла, до которых соблюдают пост, зыряне варят всей деревней пиво из ржи у часовни, заменяющей церковь. Тут же служат молебен. Пиво потом пьётся всеми. Напиваются, поют, пляшут. «На игрищах» тоже пляшут и поют, но песен своих нет, есть лишь переводы с русского»; «Зыряне запуганы чиновниками до невероятности. Но легко поддаются ласковому обращению»; «Ночью коми заботливо укрывал меня»; «Да здравствует Усть-Кулом! Бог Чудов найден!!!»; «Зыряне — милый народ. Все на них клеветают»; «Я положительно влюблён в зырян»; «На меня смотрели как на нечто чудесное и никогда не виданное».

Кулöмдінöс, миянлысь Эжва йывнымöс, век лыддылісны помтöм-дортöм парма шöрöн. Кольöм нэмса кызьöд воясын вежöра юръяс вöзйисны вöчны сійöс весиг юркарöн. Тайö менö ёнасö эз шензьöд. Менö шензьöдіс В. Кандинскийлön «Да здравствует Усть-Кулом! Бог Чудов найден!!!» пасйöдыс. Мый йылысь нö сёрниыс? Эз öд весьшöрö кум горöдан пассö пукты. Сёрниыс, дерт жö, оз мун Чудов ова морт йылысь. Сёрниыс, кыз ме чайта, чудьяслön, комиы вуж сетысьяслön, Зарни Ань Ен йылысь, кодлысь мыгöрсö дзеблöмаöсь да эз на сюр öніöдз. Эз вермы сійö лоны и Кулöмдінын. Гашкö, сёрниыс мойд ли сыланкыв йылысь, кодъясöс гижаліс сэки В.Кандинский? Кайлöма Керчомъяöдз. Пасйö, мый сэні гижис öти фольклорнöй сыланкыв, но эз помöдз, сылысьыс висьмис. Кывбуръяс гижны и то кадыс абу да збыльсö тöдмавны ме ог эшты, но мый Эжва йылöй бурмöдіс сьölöмсö ыджыд художниклысь, паметын олас нэм помöдз. Аттьö сылы миянöс шаньöн шуöмысь да пыдди пуктöмысь, аттьö кутшöмакö да дорйöмысь.

Сьӧлӧмӧй ас местаын сыысь, мый ӧні эмӧсь асланым сьыланкывъяс. Ӧнія выль коми сьыланкывъяслысь «Василей» фестиваль-конкурс мӧвпыштӧмӧн, ӧтувтӧма республикаысь став ашшӧр композиторӧс, да сьыланкывсьыд ми ог тшыгъялӧй, радпырысь юксям и финн-йӧгра котырӧ пырысь мукӧд войтыркӧд.

Дзик збыль сійӧ, мый миянӧс нэмсӧ чиршӧдлӧны чиновникъяс, да мыйлакӧ нэмсӧ жӧ и терпита. Миянӧс ньӧти оз пыдди пуктыны быдлаысь локтӧм йӧз, а ми бара жӧ кыв ни джын.

В.Кандинский гижӧ: «Моя задача была двоякого рода: изучение у русского населения обычного уголовного права и соби́рание остатков языческой религии у медленно вымирающих зырян, живущих преимущественно охотой и рыбной ловлей». Збыльысь и бырам надзӧникӧн, кызди войтыр. Важӧн нин, гашкӧ, эг вӧлӧй, да вӧр-ваыс, асланым муса парманым, дорйӧ. Кытчӧдз?

Гуяс вывтӧ

Варламув тыысь, пуяс костӧд видзӧдалӧмӧн, кыйӧді уткаясӧс. Дзолядырйи тысьыс вуграсьлім, а талун кежлӧ ватуруналӧма, да он сибав. Да и чериыс абу. Дизельнӧй станциялӧн вель уна тонна солярка тыас петліс да став ловъясӧ вӧтліс. Ключьяс эськӧ вочасӧн сӧстӧммӧдӧны васӧ, но чери олӧ омӧля на. А уткаяс тулыс-арнад век пуксьӧны дай асланымъясыс, горда коддӧмъяс, быдтысьӧны. Мыйлакӧ радейтӧны пукавны дзикӧдз нин турунзьӧм висладор помын. Сэтысь и казялі гордаӧс, но лыйны эг сяммы: кыліс весиг ствол помӧн турун сі вештӧмсӧ.

Но тайӧ менӧ эз дӧзмӧд. Кыдз шулӧмаӧсь рочьяс, абу век каньлы Йӧввыв. Арыс кузь на. Бурпӧт на келала, корсьурӧ весиг дышӧдлас. Тадзи мӧвпалӧмӧн восьлалі гортлань да бара на аслым пасйи, мый ӧтилаті восьлала мортъясӧс дзебӧм гуяс вывтӧ, кыті сиктсаяс важӧн нин лӧсьӧдӧмаӧсь ты пӧлӧн ветлӧдлан туй. Крестъясыс абуӧсь нин, сӧмын ӧти, дзикӧдз сісьмӧм, куйлӧ кыр горувлань лэччыштӧм коз улын. Мылькъяс ӧдва жӧ нин тӧдчӧны. Кыті ветлӧдлӧмаӧсь, ӧтвесьтасьӧмаӧсь шыльыд му веркӧсыскӧд.

Татчӧ водзынджык дзеблӧмаӧсь кулысьясӧс. Ёна важӧн, мамӧлӧн висьталӧм серти, шойнаяс вӧлӧмаӧсь и вӧвлӧм конюшня да порсь видзанін бокын. Век шуа аслым водзӧ вылӧ ордйӧдны тайӧ местасӧ, да уткатӧ кыйӧдігӧн век вунӧ. Потшны али мый местасӧ?

Ас вӧчӧм тыяс

Шуӧны, мый ва из писькӧдӧ. Вермас лоны, но мыйсьурӧ абу вынъяс серти весиг ытвалы. Ме во дас нин видзӧда, кызди Воч ю веськыдавны кӧсийӧ Матвей вис кодж, но оз вермы, сӧмын ичӧтикаӧн курччышталӧ берегсӧ. Кузь вужъя баддъыс тшӧкыда петӧма да оз лэдз кырӧднысӧ. Эз кӧ эськӧ баддъыс вӧв, важӧн нин дзоляник ты артмис. Зырийӧн некод жӧ оз отсышт дай. Ыджыд кӧ быттӧ вӧлі коджыс, да вермис ыджыд жӧ и ты артыны, гашкӧ, кодкӧ и пӧсь кисьтіс, гортсянь матын да, а дзоляник коджыс, да некодлы абу окота мырсыны.

Сідз кӧ нин шуны, морт отсӧгӧн вӧчӧм тыяс Габов гӧгӧрын

уна. Коді писькөдліс, сійö и кыйсьыліс, сылөн и чериыс век вöлі. Вöчысыяс пöвстысь öні некод нин абү. Рөдвужыс, эм кө, вөдитчö, кызвынас дзик нин бокөвöйяс кыйсьöны, весигтö йöз сиктсаяс да посёлоксаяс.

Асьныс ыджыдъяс

Сёрни мунас Помöсдін вожсаяс, торйөн кө, татчöс кыйсьысь-вöралысьяс йылысь. Кор лои пöсь ни көдзыд вöралысьяслөн да чери кыйысьяслөн районса котырысь, коді уджаліс нисьö эз, найö лöсьöдісны асьыныс котыр. Юралысьö да сылы отсасьысь-ясö бöрйисны медся пыдди пуктана йöзöс и со мөдöд дас во нин эжвайывса вөръясын асьныс ыджыдъяс. Эм пуля-порокөн вузасян магазин, лöсьöдалісны лöсьыдіник керкаяс, көні позьö шойччыны оз сöмын вöралысьяслы, но и вотчысьяслы. Дзоньталöны да выльысь вöчöны ёльяс вомөн постяс, ветланаөн кутöны ордымъяс да туйяс. Кызвынсö вöчöны взносьяс весътö, отсалöны асьыныс удж котыртысьяс. Быд во чукөртчылöны некимынысь, сёрнитöны вöчөм удж йылысь, казялöны бурсö, эрдöдöны тырмытöмторъяс, сувтöдöны водзö вылö могъяс, а сэсся урчитöмасö вöчöны. Вöрын вывтiасьысьяс тайö вожын абүöсь.

Эм татшöм котыр нöшта Югыдъягын. Сэні абү на сэтшöм бур, кызди Помöсдінын, но бурланьö вежсьöмъяс эмöсь. А мукöдлаын парма бöрся сюся видзöдысьыс абү. Сійөн и помалөмөн помалöны зьверсö, пöткасö и черисö.

Бöрдам да элясям, мый ставыс бырö, дорйыны корам, а ставыс ас саяным.

Лапьяпель

Талунъяыс вунö, а челядьдырысь ставыс синъяс водзын да юрын. Сэні жö Лапьяпель. Татшöм ним эськö ме пукті понлы, кодöс ме аддзи медводдзаысь да ёна и шензи.

Öні ме тöда, мый зэв ыджыд пельяса, кузь кокъяса да гыркъя понйыс вöлі гончöйөн, а сэки школаö на ветлытöм мортлы вöлі ыджыд дивöөн. Миян сиктын вöліны сöмын көлач бöжа понъяс, да ме чайті, мый му вылын татшöм понъяс и эмöсь.

Отнам вöлі да, мися, пурас, но сійö сöмын исыштiс да водзö лабутнöя восьлаліс сиктса дзик öти улича кузя. Бöрсянныс кузь воськовъясөн жö локтіс көзяиныс. Понсö моз ме сійöс эг жö на аддзыв. Тыдалö, эз лыдды коланаөн шыасьны шег дорö, весьтасьöм бöрын сöмын бергöдыштліс юрсö мелань да мөдöдчис водзö. Видзöдөмпырысь, тöдіс, кытчö мунны.

Рытнас нин тöді, мый миянладорö локтö мупытшса озырлунъяс корсьысь экспедиция. Сиктö пырысь мортыс колхоз контораын сёрнитчöма юралысь Педөр Матвейкөд, мед налы дон вылö вичмөдасны картофель, йöв-яй да мукöд сёянтор. Ме, дерт, эг гөгөрво, мый сэтшöм экспедицияыс, кутшöм сэтшöм озырлун вермас лоны му пытшкын из да картофель кындзи. Буракö, нинöм эз сюрлы. И мед. Эськö ягъяснымöс моз гөгөрбок пасьвартисны.

А Лапьяпельыс, кушенчаысь на гырысджык пельяса мугöм понйыс, быттö мича серпас, синъяс водзын.

Комиӧн оз гӧгӧрвоны

Кыям Дон ты вылын йи улысь чери. Медводдза йи вылас лӧсьыда шедӧма, а кык вежон мысти чериыс весиг виддыны оз кӧсйы. Ӧтилаын розьӧдчам, мӧдлаын, коймӧдлаын, но весьшӧрӧ.

— Коминад, тыдалӧ, оз нин гӧгӧрвоны, рочьясыд ас ногныс велӧдісны да. Часлы, рочӧн шыасьла,— шмонитӧ орччӧн пукалысь.— Ловись, рыбка, большая и маленькая. Куда ты, сопливый ёрш, спрятался?

— Тадзтӧ омӧльтӧмнад эськӧ оз нин матыстчывны да,— шмонитӧмыс сьӧлӧм серти и меным. Мыйкӧ ӧд вӧч, асьтӧ пикӧ он вошты.

Бокӧвӧй йӧзыс, тшӧтш и рочьясыс, збыльысь ёна кутісны локны шеданаджык местасӧ быдлаысь, весиг кыксӧ верстайса карысь. Сы мындаӧн чукӧрмыласны, весиг машинаяснысӧ некытчӧ берегас сувтӧдны.

Но вугралӧмнад чериыд ӧдвакӧ бырас. Лыдтӧм-тшӧттӧм кулӧм йи улас вӧйталӧмаӧсь, да тадз кыйӧмнад збыльысь нинӧмыс оз коль.

Абу мича и юӧм-кодалӧм. Ӧтилаын сы мында нин тыртӧм дозйыс, быттӧ пионерскӧй бишур вылӧ пес ваялӧмаӧсь. Йи сылас, да ва пыдӧсӧ лӧччасны. Му вылын пӧ медся омӧлыс — морт. Збыль, гашкӧ?

Еджыд вир

Начальной школаын на велӧдчигӧн ме веськалаі орчча Дзоль сиктӧ да ёна и шензи: сиктыс абу ю бокин, а дзульӧн петысь ключьяс дорын. Тайӧ ключьясыс абу горулыносъ, а пӧшти сикт шӧрыносъ, мыльк вылыносъ. Му пыдӧсысь зэв югыд ваыс петӧ еджыд лыа чиръяс лӧптӧмӧн, сӧсся тӧргӧ жӧлӧбӧд, кытысь веськалӧ муӧ либӧ матыстчӧм нывбабаяслӧн ведраясӧ. Ва катӧдысь мужичӧйясӧс татысь он аддзы, тайӧс найӧ оз лыддыны асланыс уджӧн.

Ваыс аслыспӧлӧс кӧра, юсасьыд чӧскыдджык, но, видзӧдӧм серти, арлыдтӧ оз содты: дзольсаяс мукӧдъяс серти дырджык оз овны. Кӧнкӧ, чӧскыд ва вӧснаыс коркӧ и лӧптыліс кыйсьысь вӧр керкасӧ, а сӧсся матыстчалісны мукӧдъяс да овмӧдісны Перымса мусӧ, коді таті, Сӧвет кадӧ административной границаяс вылӧ юклӧмӧн, лоис Комилӧн. Мӧд татшӧм сикт, коді ключ дорын, а абу ю бокин, гашкӧ, парма-вӧрас сӧсся и абу.

Бӧрынджык сюйисны вежӧрӧ, мый став ёлыс да юыс артмӧ ключсянь. Муыслӧн еджыд вирыс кутшӧмкӧ нӧрыс йылын сӧдзтысьӧ войтъясӧн, а сӧсся вочасӧн гартыштчӧ визулӧ да шуньгӧ горув берегъяс костын, небыд мусӧ йӧткӧмӧн, изъяс вештӧмӧн да ордйӧдӧмӧн. Та мында вӧляыс и эм. Ыджыд вӧляыс сылы вичмылӧ ытва дырйи, кор сійӧ и медся вына да гора.

Еджыд вир лӧсялӧ му вылын став быдмысьыслы, сы помысь и ловъяӧсь ставӧн: вӧрыс и туруныс, зверыс и пӧткаыс, гутыс и гагйыс. Зэв лӧсялӧ сійӧ и пӧсь вира мортлы: оз сӧмын горшкӧ веськӧд, но и ловсӧ кыпӧдӧ кывбуръяс тӧчӧмӧн, сыланкывъяс лӧсьӧдӧмӧн да ливкйӧдлӧмӧн.

Аддзысьлытөдз

Кык кытшолысь кык лун жö и лэдзали лэчясöс — меным сьöла-дозмөр кыйысьясöс. Арыс вöли вотöстөм, да шедіс этшаник, но и сы выlö аттё, век нин чöсмасянтор.

Бөръя луннас медбөръя лэч лэдзöм да ю кыр йылö петöм бöрын пестыли бишур да пузьöдi чай. Тэрмасыны вöли некытчö: юрсиктö лэчча аски, талун узя на аслам муса Габовын, ломтыла на дзöля жырйысь пачöс да кывзышта на коз пелысь печласьöмсö.

Отпускалигөн чужанинса вөр-ваöд келалöм, дерт, мудзтö, но сийö жö и бурмөдö сьöлөмöс. Сöмын тани кыла ме ачымöс збыль-выlö ловъяөн, збыльвыlö бордъяөн. Сöмын чужанинысь кыла кывъяс, кодъясысь сэсся гөрддзасьöны кывбуръяс. Сöмын чужанинысь кыла шыяс, кодъясысь сэсся бордъясьöны сьланкывъяс. И кыла ачымöс йöзыслы коланаөн, сы вöсна мый найö тайö кывбуръяссö лыддьöны, тайö сьланкывъяссö сьлöны. Вермас-ö лоны таысь ыджыджык шуд?

Лэччан лунö томнала öдзöс да сёрнита шоныда да пötöса видзысь керкакöд:

— Аттё став бурсыс, донай. Кад кө мойвиас, медводдза йи улысь чери кыйны вола, а ог кө,— выль во кезлö виччысь. Кык вежонся каникултö вöчисны, да слöймöдча. Аддзысьлытөдз, эн гажтöмтчы.

— Аддзысьлытөдз, габовсаяс,— прöщайтча ас сиктса войтыркöд, дум выlö найöс уськөдöмөн, а Ольоксей дядькөд да рöдвужкöд — ки кутлöмөн, кутшöмкө да кывъяс шуалöмөн.

— Керкатö видзöдавлам. Эн дыр костав. Выль во кезлö көть волы,— кыла на машинаö пуксьытөдз ас йöзлысь кывъяссö да көйыся:

— Вола, вола.

Шуа «Аддзысьлытөдз!» и тэныд, дона лыддьысьысь. Ас чужанинса вөр-ваын да йöз пöвстын олöмөн, шоныда ачымöс кылöмөн, ме тэныд козынала на сьöлөмлысь выль петасъяс.





Выль кывбуръяс

Сьöd кымör

Сьöd кымör вевттис рытья кясö.
Тэ висьтав, Сыктыв мулön пи,
кысь корсьны меным сэтшöм кывъяссö,
мед гижны сьölöм сотысь би?

Сьöd кымör вевттис рытья кясö.
Ме öтнам кыся сьылігтыр.
Кысь корсьны меным сэтшöм шыяссö,
мед мича шылад оліс дыр?

Сьöd кымör вевттис рытья кясö,
и войыс воис кань моз ньöж.
Кысь корсьны меным сэтшöм синъяссö,
мед налы эски олöм чöж?

Зарни Ошпи

Тэнад синъяс — вöрса тыяс.
Небыд тупöсьяс кодь кияс.
Восьса чужöм ворсö нюмön.
Видзöдласыд югзьö думön.

Кывбуръясад — сынöd гыяс,
шемöсмöдан войся шыяс,
помтöм дойлön джуджыд джумъяс,
шудлун йылысь кыпыд думъяс.

Ас кыв сöвмöдан да видзан,
нимкодьясян сылön мичön.
Чужанінтö ловнад кылан,
долыдпырысь олан-вылан.

Ме зэв рад, мый аддзи ёртёс,
бурё эскысь шоныд мортёс.
Зарни Ошпи, тэ мем колан
шонді моз, но шоча волан.

Видзёдласыд югзё думён.
Восьса чужом ворсё нюмён.
Небыд тупёсьяс кодь кияс.
Тэнад синъяс — вёрса тыяс.

Сьёд кань

(Машалён висът серти)

Пырис керкаё сьёд кань,
ог тёд кодлён, кытысь усис.
Абу тшыг, зэв шыльыд, шань.
Миян кокъяс улын узис.

Некор татшёмыс оз вун.
Петавліс да локтіс бара.
Гашкё, тайё мойдысь тун
воліс миян арся карё?

Чеччим асывнас, вой гёсьт
ортсё вёзйысис да муніс.
Гашкё, тайё вёлі вёт?
Мед жё бура коляс луныс!



Войся ангел

РОМАН

8

Костин гозъя нуодлісны Тимофей Вячеславовичӧс гортӧдзныс. Накӧд тшӧтш вӧліны и Тамара да Володя Воробьёвъяс. Ӧтлаын ставныс ужнайтісны, сёрнитчисны аскиа лун йылысь. Райсӧветлӧн сессия вылын Лазарь Кузьмичӧс бӧрйисны веськӧдлыны райисполкомӧн. Коми морт лоис и промышленной райисполкомса юралысӧн. Комияс веськалісны и парткомъясӧ да партийно-государственной контроль комитетъясӧ. Коми муным сэки вӧлі на комиӧн. Республикаса веськӧдлысьяс пӧвстысь унджыкыс вужвойтыр пӧвстысь петӧмаяс. Татшӧм серпасыс вӧлі и учреждениеясын да организацияясын.

Володя Воробьёвлӧн гӧтырыскӧд Таркойтӧ кайӧмыс лои аслыспӧлӧс «свадебной путешествие» кодъ. Гортсаясыс оз на и тӧдны сылысь гӧтрасьӧмсӧ. Москваса гӧсьт да Воробьёв гозъя петасны туйӧ Лазарь Кузьмичӧн сетӧм легкӧвой машинаӧн. Кыкнан парткомсӧ и исполкомсӧ вӧлі могмӧдӧма лӅк туйясӧд мунны вермысь машинаясӧн. Вӧйысис кайлыны ыджыд мамыс да ыджыд батыс дінӧ и Кузьма. Таво сійӧ мунас сизимӧд классӧ. Вера чойыс кӧсійӧ лоны докторӧн и лӧсьӧдчӧ пырны Кировса медицинской институтӧ. Сэтчӧ жӧ дасьтысьӧ и Лазарь Игнатов. Юсьбӧжын сӧмын на кӧкъямыс вося школа, и водзӧсӧ Лазарлы ковмис велӧдчыны Лӧмдінын. Кыкнан восӧ сійӧ вӧлі Вера Костинакӧд ӧти группаын. Важысянь ёртасьӧны налӧн бать-мамыс, бур ёртъясӧн лоисны и Лазарь да Вера.

Лӧмдінӧ волігъясӧ Игнатовъяс век пыравлӧны шойччыны, тшӧтш и улывлӧны Костинъяс ордын. Бӧръяысӧс вӧлісны дзик на неважӧн, школа помалысьяслӧн выпускной рыт вылӧ. Зрелосьталысь аттестат сеталігӧн школаӧ корлісны тшӧтш и нывзонлысь бать-мамсӧ. Вот и вӧліны сәні Ольга Ермолаевна да Георгий Евгеньевич Игнатовъяс, Елизавета Емельяновна да Лазарь Кузьмич Костинъяс, сідзжӧ и мукӧдлӧн бать-мамыс.

Ой, мый ӧдйӧ лӧбӧ кадыс! Со тай, Костинъяслӧн да Игнатовъяслӧн нин «кагаясныс» помалісны шӧр школа. Бордъясьӧм лӧбачпиян моз сӧсся жбыркнитасны бать-мамлӧн позйысь, петасны ашшӧр туй вылӧ. Верстыӧяс рыт вылысь мунісны водзджык, том йӧз кольчисны гажӧдчыны школа залӧ. Сулалісны медкузь да медшоныд лунъяс, медъюгыд да меддженъыд войяс. Лӧня кывтіс меженъын сулалысь Эжва. Игнатов да Костин гозъя юпӧлӧнса туй кузя локтісны Лазарь Кузьмич ордӧ. Кильчӧ ӧдзӧс-

* Заводитчӧмыс 2009 вося 11, 12 номеръясын, 2010 вося 1, 2 да 8, 9 номеръясын.

дорса розьё кисё суюлёмён көзиян восьтіс пытшкөсса каличсё. Глафира Ананьевна да Кузьма внукуы узисны нин горничаас, найёс эз садьмодны. Лазарь Кузьмич корис гөтырсё, мед сійё мыйсюрё ваяс пызан вылас: ми пö Георгий Евгеньевичкөд көсьям на пукалыштны, верманныд пö и ті тшөтш миянкөд. Ті пö сёрнитöй асланыд политика йылысь, а миян пö Ольгакөд асланым бабскöй сёрни,— вочавидзис Лизаыс. Дасьтіс пызансö, и Ольгакөд пырисны мөд жырьё. Коньяк доз да кык румка пызан вылө вайис ачыс көзиян. Районса та ыджда начальник оз жö кут гөститөдны нэмөвöйся другсö водкаөн!

Юисны морт öти румкаөн и варовмисны, кутісны казытивны ассыныс томлунсö: öтиыс Дёмаын олөмсö, мөдыс юсьбөжса вояссö.

— Сэсса нөсь, Дёмаад сідз эн и кайлы ни öтиысь?— юалис Костин.

— Век көсийи, да сідз эз и артмы. Вöравны эськө окота вöлі кайлыны да.

— Сöмын вöравны?— ёртыс, тыдалö, кутіс төд вылас и Октябринаөс.

— Ну и адзысьлыны важ төдсаяскөд.

— А төдан, сэтчөс «Труд-Земля» колхозыс районын век медводдзаяс лыдын. Юралысьыс сэн бур — коммунист Погуляев, предавны индім сэтчö, кор ме райкомын на уджалі.

— Йöзыс сэні зільöсь и зэв шаньöсь, няня-солаöсь. Но öтитор менö кутіс майшöдлыны.

— Мый нин сэтшöмторйыс?

— Тöлысь-мөд сайын дёмаса скöt дорын уджалысьяс йывсьыс районнöй газетын вöлі ыджыд статья. И сэні уна гижöма Октябрина Зюзева йылысь, и абу сöмын кыдзи медбур доярка йылысь, но и пи йывсьыс тшөтш. Эн лыддьыв?

— Эг. Но и мый?

— Пиыс пö, Егор Зюзев, велөдчö видз-му овмөс институтын агрономö; таво пö помалö нельөд курс, велөдчынысö отсалö колхоз.

— Но и мый?— бара юалис Костин.— Думайтан, тэныд төдса Октябрина йылысь сёрниыс?

Ёртьяс варовитісны сідз, мед пыді жырьын пукалысь гөтырьясныс эз кывны и эз гөгөрвоны налысь сёрнисö.

— От думайт, а збыль сы йылысь. Öти-кө, татшöм нима нылыс, шуисны Ринаөн, деревняас вöлі öти. Мөд-кө, мыйла пиыслөн нимыс Егор? Менам суседöй, Октябриналөн батыс, кодкөд ветлывлім вöравны, шуліс менö Ёгорейөн. Коймөд-кө, таво пиыс помалöма нельөд курс, сідзкө, сылы кызь öти арөс. Чужис, сідзкө, нелямын кыкөд воын, а ме муні сэсь война сувтан тöлысьö. Со и артмö: Егор пиыс менам! Но Октябрина весиг прöщайтчиганым эз висьтась, мый сійö нөбасьö. А вот батыс, Семён Петрович, ме шулі прөстö Петровичөн, менö жалитіс. Сідзи и шуис: жаль пö, Ёгорей, эн ло меным зятьён да. Воны пö коркө видлынытö. Абу шань морт ме, сідз эз и ло кайлөмöй.

— А пиыслысь вичсö газетас абу индöма?

— Абу. Верөс йывсьыс нинөм жö абу гижöма.

— Кымын арөс Октябринаыдлы?

— Куим арөсөн меысь томджык. А тэа-меалы кымын? Нелямын көкъямыс. Артмö, сылы нелямын вит.

— Да, миянлы нелямын көкъямыс,— шуис Лазарь Кузьмич и мыйкө думыштчис. Эз-ö син водзас сувт Вера Ильинична — Костинлөн томлуныс, коді виччысьтөг кувсис буретш да нелямын көкъямыс арөсөн? Тулыс-гожөмнас, кор Лазарь Кузьмич Юсь-бөж пыр мунліс командировкаө, корліс сувтөдны машинасө кладбище весьтө. Нөрөвитлы пö, ме бөра-водз,— шуас шофёрыслы и шочиник пуяса веж луд кузя веськөдчас кладбищелань, көні и куйлө учитель-комсомолец Лазарь Костинлысь сьөлөмсө гажө-дысь коркөя көзяйкаыс — Костинөн козынавлөм чышъяна да ковтаа Илля Вера. Мед пуктыны гу вылас, мунігмозыс луд выв-сьыс нетшкыштас ловъя дзоридзяссө. Сулыштас крестыслы воча, тапнитас гу вывсө и крестсө, и прөщайтчас выльысь во-лытөдз. Некор и некод сідз оз и кут төдны, мыйла тайö ыджыд начальникыс воывлө юсьбөжса прөстөй аныслөн гу вылө.

— Лазарь, кыз тэ думайтан, Егорыс мясянь али абу?— мөд румка бөрын юалис Игнатов, өчки пырыс другланьыс видзөдіг.

— Быттьökө и тэсянь, но вермас лоны и мөдсянь.

— Кыдз сідз?

— Зэв прөстө. Тэ мунін Дёмасьыд июнын, а Ринаыд вермис сьöктыны и бөрынджык. Сёравно эськө чужтіс нелямын кыкө-дын. Егорнас, вермас лоны, шуисны тэнад ним кузя. Ме вот ассьым медводдза кагаөс шуи юсьбөжса шань көзяйкалөн ним кузя Вераөн. Мөд ног кө, тэнад тьöща ним кузя.

— Сійötө сідз. Ме вед ассьым кагаөс Лазарнас тэнад ним кузя жö шуи.

— Пасибö тэн, Гриш.

— Аслыд ставсьыс пасибö. Не кө тэ, код төдас, кутшөм эськө вöлі менам олөмöй. Думайта да, ми тэкөд нэм помөдзным колям другъясөн.

— Ме эськө көсий, мед колим эг сөмын другъясөн, но и кад кольөм мысти лоим мед сватъясөн. Тэнад Лазарыд ёна воö сьö-лөм вылас менам Лизалы.

— Ме та йылысь думайтла жö. Ог сөмын ме, но и Ольга гаравлө, мед пö эськө Лазарь да Вера костын оз торксый друж-баыс.

— Öти и сійö жö институтö тай лөсьöдчöны мунны-а. Төдö-мысь, мыйкө эм нин юраныс водзö олөм йылысь. Талунтö, дерт, асылөдзыс кутасны гажөдчыны том йöзыд, со кутшөм шоныд да лөнь рытыс. Ме рад, мый татшөм мича налөн томлунныс, абу миянлөн кодь гөлиник.

— Лазарь, висътав мен веськыда кызди коммунист комму-нисты: кажитчö-ö тэн миян партиялөн политикаыс, реформа бөрся реформаясы?

— А аслыд?

— Оз.

— И меным оз. Но мый вермам вöчны тэа-меа? Мый шуас ЦК, сійöс и вöчö обком. Мый шуас обком, сійöс и вöчö райком. Мый шуас райком, сійöс и вöчö первичнöй парторганизация. Көть тэ и абу сöглас, паныд кыв шуны он лысьт. Октябрса ре-волюция муніс «Став власьт — Сöветъяслы!» лозунг улын, но став власьтсö ас киас босьтіс партия. Весиг районъясын школаясса директоръясöс вынсьöдліс партия Коми обкомлөн бюро. Сиктса да районнöй Сöветса депутатö кандидатъяслысь списоксö вын-

сьоддіс райкомлөн бюро. Кор петны гөрны-көдзны, кор заводитны страда — индө райком. Колхозъясса юрнуодысыяссөс, учреждениеяссөн да организацияяссөн веськөдлысыяссөс вынсьоддө райкомлөн бюро. Уна во ме уджалі райком аппаратын, и сійө кад чөжнас сы уджын нинөм эз вежсы.

— Во сизим-көкъямыс нин абу райкомын?

— Ветымын нельөд воын партия обкомлөн бюро менө вынсьоддіс Льөмдін леспромхозса директорөн, и уджалі сэн нель во, сэсса индісны «Льөмдінлес» комбинатса директорөс вежысьөн. Партияөн нуодан реформаясыс вайөдісны со райисполкомө.

— Эз прөстө райисполкомө, а сельскөй райисполкомө!— чуньсө лэптыштіс Игнатов.— Колө мортыдлы кык юр, мед гө-гөрвоны: мыйла өти районас ковмисны кык парткомыс да кык райисполкомыс, комсомолыдлөн кык райкомыс...

— Нем думайттөм реформаясыд бурө оз вайөдны. Позьө мөй вөлі бырөдны гортса скөт, град йөръяс? Крестьяниныд ас овмөстөгыд овны оз вермы. А ЦК шуө: ас овмөсыясыд пө падмөдоны сиктын социализм да коммунизм стрөйтөм. Со и артмисны лавкаясад няньла, йөвла да яйла кузь өчередьяс.

— Лазарь, а мый лоө водзө?

— Кутам овны бур вылө лачаөн. Миян пырөма нин модаө: овны аския лунөн. Кутам уджавны. Уджавны сэн, кытчө индас партия, и стрөитны коммунизм.

— Гашкө, Кремльын и лоө коммунизмыд, миян Льөмдін районын некор оз ло.

— Виччыслам. Эскыны кө Хрущёвлы, дас сизим во нин и колис сэтчөдз. Дерт, сэки ми лоам нин пенсионеръяссөн.

— Да, квайтымын вит сэки миянлы тырө, пөрнөй мужичөйяссөн на лоам.

— Ті дыр на варовитанныд?— вежөс өдзөссө восьтыштілөмөн сетіс гөлөссө Лиза.

— Думсыным челядьнымөс виччысям,— вочавидзис верөсыс.

— Найө аскиөдз, шонді петтөдзыс, оз локны, быд во тадзи школа помалысыясыд гажөдчөны.

— Миянлы тэрмасынысө некытчө жө, аски шойччан лун.

— Ладнө, пукалөй, решайтөй ассыныд мирөвөй проблемаяс-тө,— бөр топыда пөдлаліс өдзөссө Лиза.

— Гриш, көсьян унджыктор төдмавны Егор Зюзев йывсьыд?

— Кыдз эськө вөчин ачыд, ме местаын кө?

— Пөжалуй, төдмавтөг эськө эг коль.

— Кыдз?

— Зэв прөстө. Выльлунө звөнитла Дёмаас, сёрнита Погуляевыскөд колхозас делөяс йылысь, сэсса и пырмунігмоз мукөд-торсө төдмала. Позьө?

— Мый озыс? Позьө.

Сідзи и вөчис Лазарь Кузьмич. Выльлунө звөнитіс Дёмаө Погуляевлы, коді сэтчөс колхозөн веськөдлө уна во нин. Тайө каднас овмөссө петкөдіс районын водзын мунысыяс лыдө. Медуна быд гектарысь босытөны урожайсө шепта көдзаяслысь, кык-куим пөв вевтыртөны йөв, яй да вурун сдайтан планъяс. Сэтчөс дояркаяс районын медводз заводитісны лысытыны быд мөслысь онас кык сюрс да унджык килограмм йөв. Районын медводдзаяс лыдын колхозникъяслы босытчисны мынтысьны сьөмөн. «Труд-

Земля» колхозос да сэтчос водзмостчысыяссө пасйöма районса Почёт пöв вылö. Сэни нимыс и лысьтысьыс Октябрина Семёновна Зюзевалөн.

Костин чолöмаліс Погуляевос дас во предалöмөн, шуис уна ошкана кыв, юасис талунъя тöжд-могъяс йылысь, а сідзжө сы йылысь, кутшöм отсöгыс деревнялы Воч сиктсöветсянь. Колö шуны, промышленной райисполком улö кө пырис сöмын сизим сиктсöвет, то сельской райисполком улö — дас көкъямыс. Кытысь та мындаыс? Вылыс эжваса вöвлöм куим районысь, мый подув вылын и котыртисны промышленной да сельской районъяссö. Тайö вöлі бөръя кадö коммунистической партиаён нуöдöм медгудыр реформаясысь öтиён. Уна организация да учреждение — образование, медицина, транспорт, связь, милиция, прокуратура, суд — сідз эз и вöv ясыдмöдöма, кутшöм партком да исполком улö пыртны найос.

— Öні уна-ö олысьыс Дёмаад? — юаліс Погуляевлысь Лазарь Кузьмич. — Йöз лыдыс содö али чинö?

— Став арлыдасö артыштöмөн, талун кежлö сё дас куим морт, — кыліс телефон трубкаын вочакыв. — Зілям кутны том йöзöс, мед унджыкөн кольччисны колхозö. Öні институтын агрономö велöдам Егор Зюзевос — миян колхозса маяк Октябрина Семёновналысь писö.

— Кор помалö велöдчöмсö? — көть и тöдіс, юаліс Костин.

— Локтан во. Егор Георгиевичос, збыльысь кө, ме велöда ас местаö.

Костин кыліс Игнатовлөн нимён вичалöмсö и көсйис тöдмавыны унджык на:

— Егор Георгиевичыс öтка пи, али эм ещö кодкö?

— Эм нöшта куим чой. Егорыскöд тшöтшъяыс, Альбина, татчос лавкаын вузасьö; ичöтджыкыс Сыктывкарса техникум помалöм бöрын колхозын зоотехник; медічöтыс велöдчö на школаын, вуджис дасöд классö. Зэв бур семья Октябриналөн да Прокопийлөн.

— Егорыс да Альбинаыс двöйни али мый?

— Абу. Егорыслы вöлі ар кык, кор Октябринаыс öтлаасис Прокопийыскöд. Прокöйслөн гöтырыс кер лэдзигөн доймис и кувсис томён, коліс Альбина нывка. Верöссияныс Ринаыс чужтіс нöшта кык нылос.

— А воддза верöсыс кытчö лоис Октябринаыслөн? — мудера юасис друг радиыс Лазарь Кузьмич.

— Прокöсьыс öтдор сылөн некутшöм верос эз вöv. Война-öдзыс тані уджавлöма зэв шань учитель, олöмаджык йöз öнöдз казътылöны сійос медбур кывъясөн. Вот сысянь пö и Егорыс. Октябриналөн батыс, Семён Петрович, шуліс мен тадз: тöдіс кө пö учительыд, мый Рина нöбасьö, сійö эськö Дёмасьыд некор эз мун, ёна пö вöлі радейтö вöравны да.

— Семён Петровичыс ловъя на?

— Сійö, Ен сыкöд, зэв на ён. Гожöмбыд отсасьö колхозлы и век на вöралö. Кымын ар сылы? Сизимдасыс на абу.

— Пасибö, Алексей Васильевич, интересной сёрниысь, — аттёаліс Погуляевос Костин.

— Аслыныд пасибö, Лазарь Кузьмич. Овлö, кор звönитасны Лёмдінсянь, öтарö юасьöны сöмын килограммъяс да прöцентъяс.

Да, төрыт нуөдiм вöскресник, став деревняөн петалiм — дасьтам аэроплощадка, кытчö эськö вермис пуксьывны кöть нин эсiйö нель местаа öти бордъя ЯК-ыс. Ме сёрнитлi Льöмдiн аэропортса начальникикскöд, и шуис, лоас кö пö пуксянiныс, вежоннас кыкысь-куимысь ЯК-ыд кутас лэбзывны.

— Ковмас кö, и ме тшöтш сёрнитла начальникикскöд. Став бурсö!

— Став бурсö!— и телефон пыр сёрни помасис.

Тайö сёрнисö Лазарь Кузьмич сiйö жö луннас кывйысь кывйö висьталiс телефон пыр Георгий Евгеньевичлы, кодi мöд во весь-кöддiс Юсьбöжса сиктсöветөн. Игнатов колис дöвöлен тайö юөр-нас, и другьяс сёрнитчисны не чуйдыны пи йывсьыс ни Ольгалы, ни Лизалы. Семьяясын лöня олöмсö пö нинöмла гудыртны.

Войвыв юяс лунвылö бергöдан проект йылысь сёрни вылö Льöмдiнö Георгий Евгеньевич эз волю. Буретш сiйö луньясас Игнатов вöли Юсьбöж сиктсöветö пырысь Ягдорын да Таркой-тын, тöдмасис, кыдзи деревняса да посёлокса школаяс дасьты-сьöны выль велöдчан во кeжлö.

9

Лун-мöд нин эз зэр, и Ягдорлань нуöдысь вöлöкыс кос. Туйыс мунö «Рассвет» колхозлөн видзяс вывтi чукульöсь-мукульöсь векныдык Кулöмью пöлөн. Ю öтарас и мöдарас тыдалiсны гөр-буш косаөн ытшкысьяс, куртысьяс и чöвтысьяс. Страда. Видзяс помасисны, и заводитчис вöрса туй. Медбөръя чукуль, и тыдовт-чис Юсьбöж.

— Со, тайö орчча кык керкаас школа, танi ме велöдчылi,— машиналөн восьса öшинь пыр Володя Воробьёв индалiс кинас Тимофей Вячеславовичлы.— Эсiйö вöвлöм вичко, öнi сэнi клуб, а орччöнсö, кöнi дöлалö гөрд флагыс, сельсöвет.

Сикт помö вотöдз на машина кежис шуйгавыв. И туйыс бара мунiс вутшкöсь, джуджыд эжöра видз вывтi Юсью пöлөн. Тамара öтарö сёрнитiс Кузьмакöд, юасис, кыдзи велöдчö школа-ас, кыдзи помалiс квайтöд классö и кодъяс велöдысьясыс. А кор юалiс, кодөн пö кöсьян лоны, крапкис сэтчö: батö моз пö ыджыд начальникөн. Кылис тайö вочакывсö да, весиг петiс сeра-мыс шоперлөн.

А шоперыс ягдорса, Володя Воробьёвлөн земляк, «Заря» колхозса вöвлöм юралысь Анна Платоновналөн да Öстап Васьлөн пиыс, шуисны Серафимөн. Курсьяс бöрын сiйö эз мун чужан деревняс, а инасис водительөн Льöмдiнса промкомбинатö. Райпотребсоюзын экономистөн уджалiс и «Заря» колхозса вöвлöм бригадир, а öнi сэтчöс овмöсса юралысь — Тикөн Опоньлөн Таисия нылыс, кодi помавалiс кооперативнöй техникум. Серафимлөн да Таисиялөн челядьдырыс да томлуныс колис öтлаын, и öта-мöдкöд ёна тöдмасьны эз ков. Гөтрасисны. Войнаса ветераньяс — беспартийнöй Тикөн Опонь да коммунист Öстап Вась — лоисны свать-ясөн. Найö отсалiсны том гозъялы пöрöдны керка вөр и лэптыны оланiнсö. Вит во нин Серафим гозъя олöны Льöмдiн катыдпомын кыпöдöм джуджыд кильчöа выль керкаын, быдтöны нывкаöс.

Ягдорса ныв-зон пиысь, кодъяс вермылисны велöдчыны техни-кумын, училищeын, курсьяс вылын, чужан деревняö локтысьыс

пöшти эз вöв. Том йöз мунісны сэтчö, кöні позис нажöвитны унджык сьöм. Быдса семьяяс эновталісны чужан сикт-грезднысö.

Во-мöд нин пöвйöн накöсалöм öшиня, вальдöм кильчöа сійö важиник керкаыс, кöні овліс война вылын усьöм Сьöла Митрей-лөн семьяыс. Гöтырыс, Степанида, öтнас кок йылö сувтöдіс куимнан писö, эз лэдз ни öтиöс кувны война кадся да войнабöрся тшыг воясö. Дöва-мам унасö велöдны челядьсö эз вермы, но куимнан пиыс служитісны армияын, лоисны бур йöзöн. Куим вок ставныс вöрын уджалысь механизаторьяс: кык тракторист да öти шопер. Олöны асланыс семьяясöн Паспом посёлокын, сэ-ні жö медічöт пиыскöд и мамыс. Степанида комын арöсöн колис дöваöн, но ас дінас сідз эз и примитлы ни öти мужичöйöс — ни комиöс, ни рочöс.

Öтиысь, арнас, рыныш дорын аныд паныдасяс Никöн Толькöд. Сэк сійö вöлі нин гöтыра, оліс Закар Агнийскöд, и Степанида эз куж виччысьны, мый Толейыд сійöс кутас кыскыны рынышад. Ичöтик да косіник аныд выннас пыксыны эз вермы и чужйис кытчö веськалö. Тыдалö, инмис добраас, и Никöн Толь пакас кутчысьмöн ымзигтыр нёрис чорыд му вылас. Сэсся ланьтіс. Нывбаба повзис, но эз пышйы. Пидзöсчанысис и кутіс воöдны Толейöс ас саяс: «Толь, шу нин мыйкö-нибудь. Толь, кулін али мый? Толюк, шыасян кö, сетла...» Бөръя кывсö шуöм бöрын Никöн Толь сыркмуніс, восьтіс синсö: «Ладнö, пыр рынышас, часлы, ме локта». Степанида сувтіс, тайкö эз сьöлышт Толейы чужöмас, пинь пырыс сöдзöдіс эжававожса аныслөн модаö пырöм мисьтöм кывъяс: «Т...ть тэныд вомад, сетлöм пыдди!» И триньксöдіс гортланьыс.

Никöн Тольыс сідзсö шань морт, партбилета на. Эз кö öд шань вöв, быд юбка бöрся эз эськö вöтлысь. Колисны вояс, и Никöн Тольлөн, и Öртем Ермолайлөн да мукöд мужичöйлөн гöтырьясныс чужтісны выль челядьöс. Верöсьясныс пуксисны успаньвыв и юöмысь, и пöдруга видзöмысь. А вот коммунист Кирилл Латкин, кодöс сідз эз и бөрйивны ягдорса колхозö юралысьö, индісны районса öти лесопунктö парторгөн, и семьянас мунісны овны посёлокас. Öні сэні уджалö комендантөн.

Армияын служба бöрын сыктывкарса милицияö инасис уджавны Педот Надьöлөн пиыс — Влас. Гөрдитчö сизимдас öти арöса ыджыд батыс, Федот Кирьянович, аслас внукөн, тшöтш и моньнас. А моньыс Рая — 1939 воын лыйлöм партработниклөн да ягдорса пельшөр Устинья Ивановналөн нылыс. 1942 воын, кор кызь көкъямыс арöса Устинья Ивановна веськаліс Ягдорö, Раялы вöлі вит арöс. Сы мында жö и Власиклы. Пукавалісны öти парта сайын, öти даддьö пуксьöмөн исласьлісны чой йывсянь. Батътöм челядь быдмисны пöслукманöсь, кывзысьлісны мамнысö. Кыкнанныс помалісны Ягдорса начальнöй, Юсьбöжса сизим вося, сэсся Льöмдінса шөр школа.

Зрелосьтлөн аттестатөн Рая пырис велöдчыны Сыктывкарса медицинскöй училищеö, Влас — лесотехнической техникумö. Шойчан рытьяс коллявлісны öтлаын, пырджык лестехникумлөн ыджыд залын. Быд субöтаö сэні вöвліны йöктöмъяс, кытчö во-лывлісны пöшти став училищесыыс да техникумсыыс нывъяс. Öд лестехникумын унджык велöдчысыыс зонъяс. Училище бöрын Рая вöзйысис Льöмдін районö, но веськаліс Көрткерöс районса

посёлок. А Власёс босьтисны армия. Том йёз письмёасисны кык во, эз воштыны óta-моднысё. Милицияё инасьом бёрын Влас да Рая гётрасисны, лоисны карса олысьясон.

Со и Володя Воробьёв чужан деревняс локтё гёсьт моз. Нинём вочны журналистыдлы Ягдорын ни Таркойтын. Кутшом лоё сылон судьбаыс — петкөдлас кадыс. Лёсьыда нуөдіс машинасё Серафим, нйит гуранъяссё ордейдөмөн. Помасисны юсьбөжса колхозлон видзяс, и машина быттьокё суніс пемыд туннельё — туйыс водзё муніс енэжсё люкалысь джуджыд туганъяса пуяс костод. Вёрыс, збыльысь кө, тані зэв шуштём, и местасё шуоны ошъяслон чуаланінөн. Ни Юсьбөжсянь, ни Ягдорсянь вотчысьяс татчөдз оз воывлыны, көть и тшак-вотёснад ягъясыс озырөсь. Машина лэччис чой горув, и веськыдадорас воссис паськыд кушин.

— Война дырйиыс и война бёрас тані вөлі посёлок, лагерникъяс уджалісны,— ньөжмөдіс мунан өдсё Серафим и заводитіс висьтавны рочөн:

— Ми, зонпосни, гожөмъяснас воывлім татчө, и ставсё бура на помнита.

— Гашкө, тані и вөвлі менам бать?— гөгөрбок сюся видзөдіг юаліс Тимофей Вячеславович.

— Эз,— шыасис Воробьёв.— Местайс, көні вөвлі тіян батьныд, шусьё Таркойтөн. Öні сійө вөр лэдзысьяслон ыджыд да мича посёлок.

— Со тані, дзик туй бокас, сулаліс буритчан вышка, мыйкө корсисны му пытшкөссьыс. Сэсся мыйлакө дугөдісны уджъяссё, а лагерсё бырөдісны,— машинасё кусөддөмөн висьталіс Серафим.— Öти эновтём барак сулаліс ветымынөд воөдз, сэсся ягдорса öти тракторист вөлі разьёма керкасё и кыскөма тракторнас горт öшинь улөдзыс.

— И уна тані пукалысьыс вөлі?— юаліс Колосов.

— Барак лыд сертиыс кө, вель уна. Öтиысь, сизимөд классын велөдчигөн, Юсьбөжсянь Ягдорё подөн мунігөн ми, куим зон, кытшовтім татчөс местаяссё и веськавлім шойна вылас. Дзебөмаөсь кулөмаяссё вөрас зэв матө, и казялім уна гу, көні чурвидзисны крест сяма пасъяс. Төдчисны и гувывса мылькъясыс,— мый төдіс, ставсё зіліс висьтавны Серафим.— Öнітө, дертнин, ставыс сісьмис да шыляліс. Кодъясөс татчө дзебөма, сідзи и колясны пыр кежлө төдтөмөн.

— Тасянь ылын-ө Ягдорөдзыд?— юаліс Тамара Мисаиловна.

— Сизим верст,— вочавидзис верөсыс.— Мудзин али мый?

— Эг. Тайө вөлөкас некор эг вөв, и ставыс мен выльтор.

— Öні тэ ягдорсалы да таркойтсалы монь и кутан воывлыны частө.

— Надейтча тай-а.

Со и Ягдор — сьөдөдөм керъяса кыксё квайтымын арөса деревня. Коми муын татшөмыс абу этша.

— Ті ставныд Сергей Емель ордө? Мыйкөдыра мысти сэсся Таркойтө, петкөдлам Тимофей Вячеславовичлы местасё, көні пукавліс батьыс. Ми Тамаракөд кольчам сэтчө, а ті бөр Лёмдінө.

— Кузьмаыд тшөтш жө лэччас?

— Ог, ме кольччыла ыджыд мамөясө.

— Ладнө, ме лоа гортын,— бать-мамыслысь керкасө, көні

и чужліс да быдмис, Серафим шуис гортён.— Кор ковма, вись-таланныд.

Сергей Емель гозъя, кыкнанныс вöччыштöмаöсь, вочаалісны госьтьясöс öшинювса йöрысь петöмөн. Емель шыльыда бритчöма, юрсисö гöтырыс лöсьыда тшöтшлöма, и эз пöрысьён кажитчы. Öгрöпена тшапитчыштöма жö: бабаюра — кöсаяссö гартовтöма юр гөгöрыс, мича чвета платтьöа. Тшапитчас, дерт, квайтымын кökъямыс арöса на сöмын да.

— Примитöй госьтьясöс, со мыйтаөн воим,— медводз шыасис Володя, топöдліс и окыштіс пöль-пöчсö.— Талун ті дзик жöника-невеста кодöсь.

— Локтöй, дитяяс, локтöй. Лазарь зять звöнитлöма пошта Зиналы, висьталіс, кодъяс воанныд,— вом тырыс нимкодълунөн шуаліс Öгрöпена, топöдчыліс ставныскöд, сы бöрысь и Емель.

— Тöдмасьöй: менам гöтыр Тамара, Тамара Мисаиловна. Ме тiян внук, а Тамара мед лöб тiянлы и монь, и внучка пыдди.

— Сідз, дитя, сідз. Благöслöвитам тiянöс пöчыс да пöльыс, олöй любовөн да сöветөн, öта-мöднытö пыдди пуктöмөн, кыдзи ми олім Емель пöльыдкöд нэм чöжным,— Öгрöпена и внуксö, и Тамараöс пернапасаліс.

Тимофей Вячеславович топöдіс Емельöс и дыр эз лэдз морöс бердсьыс, юаліс:

— Помнитанныд на менсьым батъöс, Вячеслав Михайлович Колосовöс?

— Кыдз ог помнит, Тимофей, кызь куим во на и колис сэксянь да. Быд здук помнита, батъыдлань мунан,— рочасис Емель.

Москваса гöсьтыд сэсся сывсö паськөдöмөн матыстчис Öгрöпеналань, окыштіс анылысь шыльыд на бан боксö. Кывтыдланьыс, шор посдорса веж эрд вылын, мачасисны челядь — нывкаяс и зонкаяс. Эз весиг пырав керкаас, Кузьма котöртіс на дінö. Зонка частö воывліс ыджыд мамыс да ыджыд батъыс ордö, и став челядьыс тані вöліны тöдсаöсь. Сэсся и, Кузьма джынвийö ягдорса, джынвийö льöмдінса.

Пырисны йöрас. Кильчö öтарас — лук да сёркни градъяс, мöдара — кык град табак. Лунладор стenas öшöдöмөн косьмис гырысь синма режъя ботан. Керкаыслы воча — лöсьыд кökъяса жытник, стын бöжланьыс — көзöда улыс кум, сы сайын быдмис картупель. Важ Эжваланьыс, көні сьод му и тöv ветланін, ягдорсаяс быдтöны көчан. Луныс югыд, шондіа. Енэжыс Богородицалөн синъяс кодь лөз. Вит тшупöда поска кильчö вылын читкырасис еджда-сьод сера кань, öтарö-мöдарö гогйöдіс юрнас, быттö тшöтш чолöмасис госьтьяскöд. А кор кайисны кильчö вылас, кань бергөдчис мышнас и медводзын тапиктіс керкаö. Кань бöрся пырисны Тамара да Володя, сэсся и мукöдыс.

— Ой, кутшöм чöскыд дук нырö сатшкысьö,— пырöмөн тшöтш шензыштіс Тамара.

— Пötка яй дук тайö,— шыасьö верöсыс.— Ичötдырсянь тайö дукуыс мен тöдса, менам челядьдырöй öд кызвынсö колис пöчö-пöльöкöд.

Öгрöпена дасьтöма пызансö катыдладор жыръяс. Пыран да, шуйгаладорас, сунис трубичаяс йылын шливъялысь занавес сайын, пусян-пöжасян пач; тыдалісны гөбöч öдзöс, көтшас öшинь весьтын пöлать. Пызаныс ен ув пельöсын. Кык стен пöлөн

кузя-дженъыда лабичъяс. Ёти стенин ыджыд да ичот рамаяс пытшкын снимокъяс. Медвылын орччон откодъ рамаясын томдырся ыдждодом портретъяс Сергей Емельон да Трепил Иван Огашлон, война вылын усьом пиныслон — Емель Ваньон. Ыдждодомаось снимок вылысь, кони Емель Вань пукало орччон готырыскод, Як Марьякод. Снимайтчылломаось буретш сэк, кор мича Машукыс волон нобасьо Володяон, сидзко, 1940 воын. Отувья рамаын Лиза нывныслон семьяыс.

Пызан вылас Емель гозья лэптёмаось гырысь чериа, банийом бокъяса некымын черинянь, сола чери, латкаын йов пиын пражитом картофель, потка яй — товнас косьтомысь; асья пожасъяс — банийом шаньга да ковдум. Дась и пузьодом самовар, залавка вылын сулало, абу меститчома пызан вылас да. Пызан сайо пуксьытодз Колосов восьтис полътчом пемыдгорд сумкасo, перьялис сась гостинеч тыра кулекъяс, сувтодис тешкодъ нима вина доз.

— А тайо — батюлон меддонаторьясысь оти,— Колосов став син водзо мыччодис съод кучик кошель.— Помнитанныд тайос, Емельян Сергеевич? Тани со горд сунисон вышивайтом гижод: «Ягдор. 1939».

Сергей Емель чуймомысла воштис кыв-ворсо, косийс шуны отитор, а артмис мод ног:

— Тэ тай, Тимофей, збыльсь Вячеслав Михайловичлон пи-ыс! Ивановна, волы жо, волы!— матоджык чукостис готырсо.— Ме аслам кيون вури кошельсо, а Огрөпена вышивайтис.

— Батю видзо тиян йылысь медбур казътыломьяссö. И кошель пытшкас козин пыдди тияны мододис... восьтанныд и асьныд аддзанныд. А кошельсо вот батю бор корис.

— Ноко, мыйся козин?— телепит лоис да, Емель разис кошель ковсо.— О, Енмой, деньга! Да сэтшом уна!

— Бoryннас лыддянныд,— чөвтис Колосов.

— Оз ков миянлы некутшом деньга. Гашко, бор нуан, Тимофей?

— Батюс обидитны оз ков. Шуис сийо тадз: тайо по Емельян Сергеевичлы костюм выло, а тайо — готырыслы мича платтю выло.

— Енмыс мед сетас батюды бур дзоньвидзалун. Видзодто, Вячеслав Михайлович онөдз абу вунөдома мено. Кутшом бур йоз эмось вольной светад. А ме водзоссö мый модода?

— Поль, Вячеслав Михайловичыд ыджыд ученой, сылон быдтор эм. Ме думысь, медбур гостинечнас лоо тэсянь, кошель тырыс ко мододан ас табакто. Сидз али абу, Тимофей Вячеславович?

— Сомын сидз. Сыысь бурджык гостинечсо и думыштны он куж.

Емель судзодис гөбөч джаджыысь ас табак мешоксо и тыртис табакнас кошельсо, мыччис Колосовлы: местит по сумкаад. Сейныюны пуксялигон пернапасасисны сомын Огрөпена да Емель. Ен джаджъяс — важысла пемдыштот оти ыджыд образ да отмодарсянныс ичотдажыкъяс.

— Они миян семьяын партиечъяс эмось, да на пыдди тшотш мен да Емельлы лоо юрбитны,— Огрөпена тод вылас кутис Лазарь зятъсо да Лизаос.— Тэ, Вовук, дашко, тожо нин коммунист да?

— Ме, пöчö, партбилета крестьянин, но «Отче наш» молитва-тö тöда.

— Тöд, дитя, тöд. Енсыйд некор эн öткажитчы.

— Володя кö эз вöв партияын, ми эськö венчайтчим кöдж-помса вичкоын, а öнi сытöг ковмас овны,— шуис Тамара.— Правда, ме öнi тожö Воробьёва.

— Олöмыс миян сэтшöм: мед лоны ыджыдджык должностын, быть колö лоны партияын. Унаöн сы вöсна и пырöны сэтчö,— партия йылысь сёрнили помсö пуктiс Колосов и вöзйис восьтны вина дозсö Володялы.

Юанторйис вöли коньяк. Володя кисьталiс вит румкаö. Тостсö корисны шуны Сергей Емельöс. Сийö көрлiс дзормöм паськыд синкымсö, личöдiс көлыстöм еджыд дөрöм морöссьыс медвыли кизьсö, кыз да туктöм чуньяснас босьтiс вöсни румкасö, мыйсюрö рочөн, мыйсюрö комиён шуис:

— Менам талун кык пöвста нимкодълун. Öти-кö, ловйён колöма и талун жыв-здоров Вячеслав Михайлович. Думысь ме öнi тотшнитча тшöтш и сыкöд. Пасибö сылы, öнöдз абу вунöдöма менö, коми вöралысьöс. Мöд нимкодълуныс: верма благöслöвитны ассьым дона внукöс да сылысь гöтырсö, сыны налы кузь нэм да бур шуд. Та вöсна и юам ставным пыдöсöдзыс.

Юисны. Медьёна чукрасис Öгрöпена. Кылöдiсны коньяксö чериняньон да сола чериён. Кöзйяка вайис торъя тасьтиясын пачысь сöмын на кыскöм руалысь пöтка яя шыд. Мужикьяс юисны нöшта мöд румкаөн. Тамара да Öгрöпена, вежавидзöм ради ли мый ли, сэсся эз юны. И водзö сёрнитiсны ывлаын, кильчö дорас. Емель, кылö, öтарö юасис Колосов семьяслөн олöм йылысь. Öгрöпена дугдывтöг варовитiс Тамаракöд, ошкис Володялысь мамсö да Богдан дядьсö.

— Натöг эськö мöстö видзны эг вермöй. Турунтö Марья монь да Богдан и заптöны миянлы тöv кежлад.— Велалöма да, Öгрöпена век шуö Як Марьяöс Марья моньён.

Ягдорö волiгъясö татчö пыравтöг оз мун и Люда, бытьён пыравлас видлыны мамыслысь вöвлöм энька-айкасö. Юалас на весиг: гашкö пö, мыйкö тiянлы отсыштны? Зиль нывка быдмö, сöмын тай оз ёна бура велöдчы-а.

Прöщайтчан кад воис. Тимофей Вячеславовичлы талун колö бөр лоны Льöмдiнын, а аски лэбö нин Печораö. Но медводз Володя петкöдлас сылы Таркойт посёлок, көнi коркö пукавлiс батысь. Öгрöпена дасьтiс Колосовлы туй вылас кык черинянь, некымын шаньга да көвдум, тшöктiс пуктыны сумкаас. Эз куш киён мöдöд мамыс да дядьыс дiнö и Володя гозъяöс. Пöльыс бөръя кык лунсö ветлiс Важ Эжва вомö ботайтчыны, кык ведра тыр вайис сир, ёкыш, сын да ёдi.

— Пöч, Тамаракöд ми кутам воывлыны, лун дас танi лоам, сэсся лэччам Льöмдiнö. Ме редакцияын кута уджавны, а Тамара школаын.

— Тамарук мен висьталiс нин. Кыкнанныд вöсна ме зэв рад.

Öгрöпена да Емель москваса гöсьткöд прöщайтчисны топöд-чылöмөн.

— Ен да бур шуд тiянлы, Тимофей Вячеславович,— медбöрти шуис Öгрöпена.— Ыджыд поклон миянсянь батыдды.

— Пасибö, Ивановна. Пасибö, Емельян Сергеевич. Батьö нимсянь муöдзыс копыр тiянлы!

Сэтчөдз, көні сулаліс машинаыс, эз вөв ылын, и мунісны подөн. Йöрысь петігөн котөрөн воис Кузьма, көсйис тшөтш ветлыны Таркойтö, но ыджыд мамыс эз лэдз, корис пырны керкаас сёйны. Гожся каникулсö Кузьма пырджык коллявлö Ягдорын. Машина дорö вотöдз öтвесьтасисны керкакöд, көні и чужліс Володя Воробьёв. Мир туйбокса луд ылö пуктіс ыджыд сумкасö, шуис:

— Тайö и эм миян керканым. Бать сійöс стрöитлöма нелямынöд воын, татчö и вайöма менсьым мамöс гөтыр пыдди. Тасянь бать муніс война ылö и бöрсö эз во.

— Сэтшöм джуджыдöсь да пашкырöсь пуясыс!— шензыштіс Тамара.

— Батьö садитлöма. Пуясыс пöшти мекöд тшөтшъяöсь. Йöрас картофелсö мам пуктö. Эсійö пывсяныс миян жö, суседьяс сэн пывсöны. Аски либö сёрöнджык волам?

— Волам.

— Гашкö, пывсян ломтылам?

— Ломтылам.

— Таркойтсаянь локтігмоз чегьялам корöсь и пывсям небыд корöсьөн. Сёрнитчим?

— Сёрнитчим.

Колосов кывзис том гозьялысь сёрнисö и нюмъяліс. Бокöвöй мортысь вежавидзöм ради варовитісны рочөн. Война бöрын деревняса коми войтыр öдйö велалісны роч сёрниö. Медводдза велöдысьяснас вöліны власовецьяс.

Катыдладорсянь машиналань матыстчис шопер Серафим.

— Тесьткöд аддзисьлі, а тьöща пö турун пуктö. Батьö да мамö пö тожö эжвабокса ылі видз ылынöсь.

— Колхозса предыс öні тані Афанасий Тихонович — тэнад тесьтьыд. А көн öні тэнад шуриныд, Тасяыдлөн вокыс?— юаліс Володя.

— Сійö помавліс видз-му овмöс техникум. Велöдчигас тöдмасьöмаöсь удораса öти нывкöд, сы ылö и гөтрасис, олöны Пыссаын. Тесьть пöгибö воöма, том йöзыс пö мунöны Ягдорысь да, регыд пö колхозад некодлы лöö уджавнысö.

— Öні тан уна-ö олысьыс?— окота лои тöдны Колосовлы.

— Мамöлөн висьталöм серти, войнаöдзыс вöлöма куимсё квайтымын морт, öні — кыксё кызь. На пиысь унаөн уджалöны Таркойт лесопунктын, тасянь рыт-асыв ветлöмөн,— вочавидзис Серафим.

— Сэтшöм матын посёлокöдзыс?

— Нель кымын верст. Но, сölалöй,— Серафим ставнысö корис пуксыны машинаö.

Деревня катыдын медбөръя керкаыс — Ягдорью крут берег ылас. Ю берегьяссö йитö кузь кокъяс йылын сулалысь перилö-яса пу пос, кодöс стрöитісны неважөн. Важ поскыс ю горуласджык, сулалö разьтöг, сісьмö кок йылас. Ягдор пыр мунö эжвакатыдса сиктъясö медшөр вөлöкыс, и постöгыс некыдз оз позь. Сы вывті мунöны подаяс, вöлаяс, автомашинаяс. Ю катчöсланьыс, көні вöвлі ягдорсалөн бөръя мельницаыс, вöчисны тракторьяслы вуджанін. Мойдын кодь мича берегьяссö тшыкөдісны вөр лэдзысьяс.

Пос шöрас Серафим сувтөдіс машинасö, кинас индалöмөн висьталіс, кысянь босьтчö визувтны юыс да кытчö усьö.

— Кодарын Эжваыс?— юалис Колосов.

— Тайё юыс усьё Важ Эжваё, а Важ Эжваыс усьё Выхь Эжваё. Коркё, во сё-кыксё сайын, Выхьдаыд, миян ног Эжва, визувтлёма деревнясянь зэв матыті. Сэсся юыд писькёдас выхь туй, веськыджыкёс, и ылысмас деревнясянь, но важ ковтысыс оз косьмы. Со сійё тыдалё: Важ Эжваён шусьё, зэв чериа. А Выхь Эжваодзыс, шуоны прёстё Эжваён, мунны кё сэтчё весь-кыда подён, лоё тасянь верст куим.

Мунісны водзё. Верст-мёд мысти шуйгаладорас кыпёдчис шочиник пуяса вывтасін, кёні тыдалісны крестъяс. Тайё — ягдорсалён кладбище, кытчё дзебёны тшётш и посёлокын кулёмаясёс.

— Кладбище сайтис и мунё пёльёлён чёс туйыс,— шуис Володя.— Эсійё вёрас, тасянь верст сайын кымын, пёльё и адзысьлё вёлом тіян батькёд.

Со и Таркойт.

— Та ыдждаёдз посёлокыс быдмис дас квайт воён. Сэксянь, кор татчё нелямын квайтёд во помын вайисны власовецъясёс. Сійё кадсё ме бура помнита, мен сэки вёлі дас ёти арёс,— висътасис Серафим, кодёс Лазарь Кузьмич тшёктіс лоны туяс варовджыкён.— Эсійё куим орчча баракыс тані медся важёсь, комынёд вояс помын сэнi и овлісны лагерникъясыд. На пиысь ётиын, Тимофей Вячеславович, овліс тіян батьныд. Лагерсё бырё-дём бёрын, война воясад, ми, ягдорса челядь, татчё воывлім ворсны. Лагер дырийыс татчё некодёс эз лэдзлыны, но Эжва вывсяньыс баракъясыс тыдалісны бура. А тайё нель патераа финской керкаяссё, шуоны щитёвой керкаясён, татчё вайисны ветымынёд вояс заводитчигён. Быд патераын ёти комната да кухня. Кодлён семьяыс унджык челядя, кык патераысь вёчёны ётиёс. Эсійё, уна ёшиняыс, школа, директоралё сэн менам рёд-ной чой Манефа.

— Лёмдінад миян экспедициялён контораыс татшём жё щитёвой керкаын,— шуис Колосов.

— Ёні тані ыджыд механизируйтём лесопункт. Эжва береганьыс — ас керкаяса быдса улича,— сёрнийё пырис Володя Воробъёв.— Сэнi и миян керканым, Ягдорсянь татчё вуджим сизим во сайын.

— Вёрсё мыйён кыскёны?— юалис Колосов.

— ЗИЛ да МАЗ автомашинаысён. Ю горувланьыс, вёр бердас, ыджыд гараж техника дзоньталан мастерскойысён. Сэнi Богдан дядь уджалё старшой механикён. Мамё? Мамё веськёдлё клубён и ёттшётш библиотекаралё. Клубыс ыджыд да мича, бруссысь вёчёма. Клуб бердас и библиотекаыс.

Посёлокса чукльёдысь туй кузя Серафим вайёдіс машинасё ю кыр йылёдз:

— Со и Эжва-матушка, рочён — Выхьгада.

Кывтчёсногыс и катчёсногыс сійё тыдаліс зэв ылёдз, ставнас ойдёма шонді югёръясён и пёртмасис синтё ёрана зарнийён. Таладор берегыс нывкёс, и горулынджык тыдаліс лыаюр. Мёд-лапёлас — помтём-дортём нэмөвойся вёр, вёрзёдытём на.

— Эжвалысь да Печоралысь кё ваяссё веськёдасны Волгаё, став тайё мичыс вермас вошны,— шуис Серафим.

— Быдтор вермас лоны, дзик быдтор,— нурбыльтіс Колосов и сы йылысь сёрнисё водзё эз нүёд.— Но мый, Серафим, миянлы

бөр на колö воöдчыны Лёмдінöдз. Пасибö ставныдлы компаніясы.

Воробьёв гозьяös Серафим нуöдiс öшинь улöдзыс. Сэни и прöщайтчисны. Посёлокысь петигөн Серафим бöра-водз кежалiс чойыс ордö.

10

Як Марья асыö кылис Му вылас медся шудаөн. Пиыс помалис дас вит вочöжся велöдчöм, нылыс таво ар пырас көкъямысöд классö; радейтö Машöös Богдан, и ачыс радейтö Богданös. Эм сыöлом серти удж, көть и медсяö рыгтя. И Ягдорын, и Таркойтын важөн нин вунöдiсны «власовец» кыв. На пиысь унаөн гётрасисны коми аньяскöд — томъяскöд и дöваяскöд — и ставныс лоины комиён сёрнитысь ас йöзөн. Кодсюрö коми гөтырсö нуис чужан муас — Украинаö, Белоруссияö, весиг Польшаö. Сöмын öти ань бөр бергöдчис Ягдорö. Вölöмкö, мусульманин верö-сылөн рöдинаас вölöма нин кык гөтыр, коми аньыд лоöма коймöдөн. Мусульманинсянныс чужтылис öти нывкаös, сыкöд и воисны бöрсö во джын мысти. Нылыслы батыс мöдöдавлис посылкаяс и письмöяс и пыр корлис воыны гөститны мамыскöд лунвылас. Öтчыд и лои ветлöмыс, а сэсся, кор Таркойтö воис уна вербованнöй, аньыд вылысь петiс верös сайö, и мусульманинкöд йитöдыс орис.

Шевчукъяслөн семья — Богдан, Як Марья да Люда — Украинаö ветлисны бөръяысысь во куим сайын, аддзысылiсны батымамыскöд, рöдняыскöд, вежон гөститiсны Юлия чойыс ордын, кодi уджалö Тарас Шевченко нима ыджыд колхозын агрономөн. Сэсся и ветлöм-мунöм вылас лишалана кадыс абу жö, Таркойтын горт гөгöрас уна уджыс, дай гожöмнас турун колö заптыны Öгрöпеналөн да Сергей Емельён мöслы, öд найös Машöыс век на шуö знька-айкаөн. Кыдзи нö? Володяыс öд Сергей Емель Ваньöсянь дай овыс сылөн Воробьёв. Көть и абу öткодь оваös Людакöд, радейтöны öта-мöднысö чоя-вока.

Вок гозьяыс сöмын на кайисны кильчö вылас, а Людаыс, казялöма да, киас стеклö банкаа, чикыш моз лэбыштiс на дiнö, сывйыштiс Володяös, сэсся топöдчылис Тамара бердö.

— Эстчö кыр бокшаас оз вотны ветли, быдса пöллитра öктi, нарошнö тiян воигкежлö.— Дас нель арöса нывкаын мичлуныс и мамыслөн, и батыслөн: кисьмöм лём синмыс тырöма нюмөн, мыш вылас кузь сыд юрси, лöсьыдик чужöм-öблика, төвру улын юыввса гы моз кыптыштöма морöсыс.

Дзиръялань кокни восьласөн матыстчис нывбаба — чышгьянтöм, дженьыд соска еджыд ковтаа, пидзös вийöдзыс руд юбкаа. Аньяслөн сэки вöли мода: новлыны дженьыд юбка-платтьö. Татшöм модаыс торъя нин мунiс налы, кодъяс лöсьыдик кокаös. Володя ылисянь тöдiс мамсö, лэччис кильчö вывсыс и мунiс воча. Неямын куим арöса, видзöднысö мича невеста кодь на, Як Марья кутлис да окалис писö, кодi кык ки вомлөсөн джуджыд-джык ас сертиыс. Топöдчылöмөн тöдмасисны и знька-моня.

— Людмила, котöртлы батыд дiнö, вермас кө, мед водзджык локтас,— шуис Як Марья.

— Мам, кутшöм на ме Людмила? Кор пöрысьма, сэки и лоа Людмилаөн, а öни ме Люда Шевчук.

— Ноко, живо. Эн кывтö берт! Пырам керкаас, тiян кынöм-ныд сюмалö.

— Оз. Ми пöчö ордын сёйим-юим. Тiянлы гöстинеч пуктiс; сэни, сумкаас.

— Дядьыд тiянла машина көсйис мөдөдлыны, гашкö пö, нинöмөн локнысö да. Мыйкö тай дыр эн локтöй?

— Лбөмдiнын уна мог вöли. Кыкнанным сёрнитчим удж кузя. Быдтор йылысь на вевъялам сёрнитны, вежон кымын тан кутам овны.

— Патеранытö аддзинныд?

— Мам, Тамара лбөмдiнса, оз ков миянлы нинöм корсыны, ас керкаын кутам овны.

— Слабог, ас керка кө эм. Сэсса бура олöй дай. Жаль, Ягдорад миян керкаыд пустуйтö да. Людмила чойыд тай шуö, ме пö сэн кута овны.

Володя тöдмөдiс гөтырсö керка пытшкөснас, пыртлiс нельнан жыръяс. Öтиын пöжасян пач, роч пачөн шуöны. Ывлаыс жар. Тамара вежис платтьөсö, кокни сарапанасис. Як Марья чуткылис электрочайник, пузьöдiс чай. Воис Люда, юөртiс: батъö пö вылыс складаын (тадзи шуöны вөр пөрөданiнсö), кутшөмкö пö машина жугалöма и кайöмаось вöчны.

Стöкан чай юөм бöрын Воробъев гозъя петiсны Эжва берегö. Як Марья босътчис лөсьöдчыны рытъя ужин кежлö. Ужиныс лоö аслыспöлөс. Богданлөн водзмöстчöмөн Володялысь университет помалөмсö да гөтрасьöмсö шуисны пасйыны гажа рытөн, гөсьтъясöс корлөмөн. Дасьтöма нин вина-водка да сёянтор. Колö ставсö тайöс лэптыны пызан вылö. Отсасис мамыслы Люда. Воробъевъяс кыр йылöдыс мунiсны ю горув, верст сайын кымын тыдалiс лыа юр. Сэтчö и нуөдiс гөтырсö Володя: сэни пö купайтчам. Водзынджык, лыа көса вылас, чилзiгтыр котралiсны челядь, гырысьджыкъяс трусикаось, поснияс пасътöмось, тыдалö, ворсiсны кикольсьöмысь.

Володя пөрчысис водзджык и котөрөн бузгысис ваö. Тамара сулалiс лыа вылын трусик да лип кежысь, быттö Ен-скульпторөн сизьдөм ловъя статуя — мичасьыс-мича. Анькытш сера купайтчан трусикуыс öдва тупкыштö гөг увсö, сэтшөм жö рёма лип увсьыс вот-вот быгыльтчасны гырысь нёнъясыс. Ань сулалiс шондi паныд, синсö читкыралiгтыр видзöдiс югыдөн пöртмасьысь Эжваын купайтчысь верöсланьыс.

— Лок, ваыс шоныд! — чукöстiс Володя.

— Ме пырала сöмын морөсöдз, юрсйöс ог көтöд, а то тшыкö-да кудриöс.

Воробъев локтiс гөтырыслы воча, и ки на ки кутчысьöмөн пырисны ваö. Лыа көса дорад друг джумйыд абу, кокыд пыдöс-сö судзö ылөдз. Тамара ыркöдыштiс пöсялөм вир-яйсö и кинас ва веркөсö швачөдiг келiс берегö. И бара ловъя статуя сувтiс шондi паныд. Кос лыа вылö петiс и Володя. Тани, шондiа лөз енэж улас, воча ныр öнi сулалiсны кык Томлун, кодъяслөн водзын быдса олөм.

Рытнас Як Марьялөн керкаыс лои уна гөлөса, кылис роч и коми сёрни. Юль тöлысья шондiыс вылын на, Эжва весьттi тювъ-ялисны вожа бöжа джыджъяс, ю веркөсыс пöртмасис сюрс дзирдъясөн. Чöv-лөняс разалiс вөр кыскалысь машинаслөн эр-

гёмыс. Клубдорса шылыд эрд вылын кылісны волейболён ворсысьяслөн гора гөлөсьяс. Татшөмөн аддзис гоҗся рытсө Таркойт посёлокын Тамара Воробьёва. Пызан сайын сійö пукаліс мича еджыд платтьöа, верöсыскöд орччөн — алöймыштöм бан бока, руд кудри увсьыс тыдовтчыліс зарни исерга, кодöс важөн нин козынавліс батыс. Ичмонь гозъя вöліны чунькытштöмөсь.

Гöсьтьяс лыдын вöліны гöтырыскöд лесопунктса начальник, роч морт Аксёнов, коді воис татчö кык во сайын лесотехнической институт бöрын. Во сайын гөтрасис посёлокса киномеханик Шуракöд (збыль нимыс Александра). Арлыднаныс көть и торъялöны, Шура да Як Марья пöдругаасьöны, öд киномеханикыдлөн рытья удж и клубын жö. Оз вежны, оз пöрысьтны воясыс пыр на вöсньыдик да визув Педот Надьöс, коді эськö вермис лоны подиум вылын платтьö модаяс петкöдлысьөн. Пукалö пызан сайын тотарин-верöсыс бердö топöдчыштöмөн, пукталö нырувса ляхкыдик фарфор тасьтö вомö сюанторъяс. Öнись Пеклалөн коркöя туналöмыс имитіс: Педот Надьöлы и мойвиис Муса Шаймиевыд. Öтувъя нывныслы, Карималы, дас арöс. Юра морт сідзсö Мусаыс — бура сяммö артасьны-тшöтайтчыны; водзджыксö лесопунктса контораын тшöтöводаліс, сэсся бухгалтерён индісны.

И нöшта öти гöсьт гозъя — школаса директор Манефа Васильевна да Виталий Денисович. Манефаыс — Ягдор колхозса вöвлöм юралысь Анна Платоновналөн да Öстап Васьлөн медводдза нывныс, комын арöс таво тырис. Верöсыс, Виталий Денисовичыс, тайö жö школаса учитель, Юсьбöж сиктсöветса вöвлöм председатель Пелагея Петровналөн пиыс, сылы комын куим арöс. Институтсö помалöм бöрын Манефа веськаліс печоравоҗса öти шöр школаö, көні и паныдасис Журавлёвкöд. Виталий Денисович вöвлöма нин гöтыра, но гöтырыс кутшöмкö пытшкөсса висьöмысь виччысьтöг кувсьöма. Ас районса нывкöд аддзысьöмсö Журавлёв лыддис Енсянь козинөн. Гөтрасисны. Велöдісны школаын. И, тыдалö, мед сиктыс этшаджык казтыліс воддза гöтырсö, Виталий Денисовичлөн водзмöстчöмөн куим во сайын локтісны Таркойтö. Быдмö вит арöса нывка. Татчö вайисны Юсьбöжысь и нывкаыслысь пöчсö — Пелагея Петровнаöс. Велалöма да, көть и пенсия вылын, квайтымын кык арöса аныд век на нырччö общественной уджö, пырö посёлокса нывбабаяслөн сөветö, кодöс ачыс и котыртіс.

Як Марья инөн и ладөн корис тшöтш волыны рыт вылас, но ыстысис эштытöм вылö. Пелагея Петровнаöс, партияса ветеранöс, пыр ёнджыка майшöдліс сійö, мый эз вермы ёнмыны Ягдорса колхоз. Том йöз и верстьö, коді кызд вермö, пышйöны колхозысь лесопунктьясö. Ягдорын öтувъя овмöсыс котыртчис комын кык во сайын. Комын кык во нин ягдорса колхозник мырсьö синсьыс би петмөн, а водзöсыс гыж ыджда. Эз сöмын коммунистьяс, но и беспартийнöйяс гөгөрвоисны, мый видз-му овмöс сөвмөдөм кузя партия ЦК-лөн политикаыс шогмытöм, но некод эз лысьтлы кыпöдны гөлөссö.

Рытыс збыльысь праздникөн лоис Богданлы да Як Марьялы, тшöтш и ичмонь гозьялы. Шевчукьяс думыштöмаöсь дзик виччысьтöмтор. Киас румкатöг, медводдза тост шутöдз, пызан сайын сувтіс Богдан, гач зепсьыс перйис кык ичöтик көрöб, шуис рочөн:

— Тайё луныс менам да Мария Яковлевналён олёмын — медшу-да лунъясысь өти. Нэм помөдз кута помнитны, кызди нелямын квайтөд вося тшыг да көдзыд декабрын ме медводдзаысь воськовті Мария Яковлевналён керка порог вомён. Чайтлі, лөгпырысь кутасны видзөдны ме былө. А вөлөмаось на бур йёзыд му вылас, көзйикаыд менө вердіс ужинён. Вердысьнас вөлі том да мича коми нывбаба, кызь квайт арөса дөва Як Марья, коді быдтіс квайт да джын арөса пиөс. Писө шуисны Володяён. Вовакөд ми өдйө велалім өта-мөд дінө, көть и эгө гөгөрволөй өта-мөдным-лысь сёрнинымөс. Төвся рыгыясө ломтысысь көрт пачын Вова пөжавліс картупель, быдөнлы кык печенчаён. Сійө печенчаыс менам олёмын лоис маысь чөскыджык да зарниысь донаджык,— Богдан өдва кутіс синвасө, сёрнитіс водзө:— Сэсса и семьятчим Яковлевнакөд, быдтім да велөдім пинымөс, и ачыс нин лөсьөдіс семья. Благөслөвитам ми тіянөс и со кутшөм козин дасьтім мамыдкөд.— Богдан көрөбъясысь перйис кык зарни чунькытш.— Володя, пысав гөтырыдлөн нимтөм чуньө; а тайөс, Тамара, пысав верөсыдлөн чуньө. Мед тайө чунькытшъясыс йитасны тіянлысь сьөлөмнытө.

— Горько!— кекөначасиг шуис Педот Надьө.

— Горько!— шуисны и мукөдъяс, көть и тайө чукөртчылөмыс эз вөв свадьбаён.

— Богдан дядь, кызди кужөмыд тадзсө думыштны?— вомтырнас нюмъяліс Володя.

— Кор кывсис миянлы, гижсьөмныд пө загсын, мамыдлы юрас воис татшөм мөвпыс, а ме да Люда чойыд ошким сылысь вөзйөмсө.

Люда видзөдлассө чөвтіс то вокрылань, то Тамаралань и, чайтөмысь, син водзас сувтөдіс асьсө: пукалө жөникыскөд орччөн, а гөсьтыяс горзёны налы «горько!». Як Марьялөн нимкодьлунөн тырөм лөз синъясыс кажитчисны нөшта на лөзджыкөн. Клубын да библиотекаын дыр кадся уджыс велөдіс сійөс бура видзөдны ас бөрсаяс, лөсьыда көмасыны-пасытасыны. Дай быд нывбабалы көсийысьсө петкөдчыны мичаджыкөн да томджыкөн, лоны радейтанаён, көть көні сійө эз уджав. Як Марьялы, кодөс посёлоксаяс шуёны Мария Яковлевнаён, нелямын куим ар. Татшөм арлыда аныд пачысь сөмын на кыскөм банийөм көвдум кодь пөсь да чөскыд.

— Сэсса нөсь удж кузяыд сёрнитчөма нин?— юалис Манефа Васильевна.

— Да. Володя кутас уджавны районса газетын, а ме, Лёмдінса шөр школаын,— вочавидзис Тамара.— Ме помалі физмат факультет.

— Ме сійө жө факультетсө помавлі,— шыөдчыліс Виталий Денисович.

— Ме вөзъя тост миян том специалистъяс да ичмонь гозъя вөсна!— киас тыра румкаён сувтіс Аксёнов да быдөнкөд точкысис.

Юисны. Уна бур кывъя тост на вөлі. Винаён ышмысьыс пызан сайын некод эз вөв, и медсясө варовитісны. Сёрнитісны быдтор йылысь: и посёлоклөн талунъя лун йылысь, и политика йылысь, казътылісны бөрө кольөм вояссө. Быдөнлөн эм мый казътывны. Пызаныс тыр сёян-юанөн, тшөтш и Öгрөпенаён

мөдөдөм гөстинеच्याсөн — чериняньон да сола черион. Нөбасьо ли мый ли, сола черисо медся азыма нёнялис Шура Аксёнова.

Кор разодчисны госьтьяс, вөлі шондіа на. Колис гортас сөмын ас семья. Выльунад клуб ни библиотека эз уджавны, эз мун ывлао шойтны и Люда, көть и кылісны том йөзлөн да челядёлн гөлөсьяс волейболон ворсан площадка дорын. Юпөлөнса ордымод некымын зон сёраныс нюдз вугыр шатинон тэрмасисны Эжва берегө. Ваыс лөнъ, и шонді лэччигад ёнджыка шедө. Катчөсла-нынъ эмось йиръяс, кытысь вугралоны медсясө ёкыш да ляпапийан. Найө, кодъяслы абу дыш, чериыс сёйө көть оз, пукалоны вадорын асылөдзис. Йөршыд эськө кутчысьо и войнас, но сійөс оз пуктыны чери туйө, и пысасяс кө вугырад, бөр лэдзёны васа. Сійө йиръясас вуграсьліс и Володя Воробьёв.

Кузь туганъяса пожөма вөрбердса керкаын, марля вонйын, Тамара узис зэв чөскыда. Ёна, тыдалө, радейтө сійөс Володяыс. Сы вөсна и, надейнө, ни өтчыдысь на эз казытыштылы сылысь верөс сайө петалөмсө. Но и мый, петалис кө? Аньлөн тай ставыс сёрас, ас местаас, кытъясті радейтө малавны верөсыс. Воисны сёлөм вылас Тамаралы и Богдан дядьыс, и Мария Яковлевнаыс, и Людаыс. Вөлөмкө, прөстой йөз пөвстад шоныдлуныс ёна унджык министрөс вежысьлөн пи ордын серти.

— Володь, карө эськө звөнитлыны,— вольпасын нюжмасиг-моз шыасис Тамара.— Тасянь поэьо али оз?

— Татчө локтөм водзвылын на сёрнитін мамыдкөд да.

— Ме ошйысьны көсья мамөлы да батьöлы тöрытъянас. Эг кужой виччысьны, мый тэа-меалы вöчасны аслыссяма свадьба зарни чунькытшъясөн. Мен сэтшөм лөсьыд сёлөм вылын, лэбавны окота.

— И мен лөсьыд, мый тайө мича лэбачыс, жар-птицаыс, ме-нам сывйын,— чупнитіс гөтырыслысь вом дорсө Володя.— Звө-нитнытө поэьо көть тасянь, көть Ягдорсянь.

— Рытнас звөнитам, кор гортаныс лоасны.

Ичмонь гозъя узисны торъя жырийн, и Як Марья эз кут чуксавны найөс завтракайтны. Кор чеччасны, сэки и нуръяссяны. Мед шойччөны та мында вотө велөдчөм бөрын! Ачыс мамыс Людаыскөд муніс куртны Эжва горувлань. Колхозон эновтөм виддзыс зэв нин уна, и ытшкисны турунсө посёлоксаяс, кодъяс видзёны скөт. Видзисны и порсьясөс, и ыжъясөс, медсясө көзаясөс. Як Марья быд во тшөгөдө порсьөс. Таркойтдорса видз вывсьыс кос турунсө нуоны Ягдорө знька-айкаыслы кузола машинаөн. Ыджыд мамыс да ыджыд батьыс ордө быд гожөм воывлөны Лизалөн ныв-пиыс. Йöлыд челядылды быть колө. Люда, көть и абу нин Öгрөпеналөн гөганыв, йöла сёянөн жö быдмис. Нэм чөж пö мөскөн олім да, кызди сытöгыс?— шулывлө Емельлы Öгрөпена. Сэтчөдз пö, кытчөдз кутасны отсасьны Марья монь да Богданыс, мөссьыд ог лэдзчысьöй.

Кузь гожся луныд. Володя нуөдіс Тамараөс петавны посёло-кас, төдмөдны, көні мый. Местаыс кос, лыаа. Шөр туй пөлөныс, көні век уна йөза, нюжөдөма моски. Посёлок ёна быдмис бөръя дас онас, кор лесопунктө кутіс воны вынійөра техника, а сідзжө локтісны уна вербуйтчөм йөз. Локтісны Украинаысь, Молдавияысь, россияса шөр да луныв обласътъясысь нажөвитчыны. Таркойт лесопунктысь сөвмөмсө пыр син улас кутіс Лазарь Кузь-

мич Костин, коді КПСС обком бюролөн шуом серти ветымын нельод восянь нель во чож веськодліс Льомдін леспромхозон, а сэсса сы пыдди воссис комбинат, и уджаліс сэні директорос вежысьон сельской райисполкомса юралысьо бөрийтөдз.

Посёлокас кык лавка, отиас вузасисны сёян-юанон. Тамара корис пыравны промышленной товарон вузасян магазино. Товар лыд серти сийо кажитчис озырджыкөн весиг райунивермагысь. Тась позис ньобны сэтшөмторъяс, мый оз сюр сиктса лавка-ясысь. Орслон магазинъяс нимавлісны бур боксянь район пасьта. Зал помас торъя пельос, кытчө лэптөма художествоа нигаяс роч и коми гижысьяслысь. Тамаралон вежыс петіс пызанывывса электролампа выло — зарни рөма кока, мича гөгрөс шляпаа и абу дона.

— Володь, татшөм лампа дорад лөсьыд лоо дасьтысьны урокъяс кежлө, и тэныд кокниджыка гижсыны кутас. Но кыздз? Ньобам?

— Ньобам. Сьомыд сьорад?

— Абу, лэччөтөдз выльысь волам.

Ичмонь гозъялөн льомдінса керкаын ставыс тырмымон — и мебель, и тасьт-пань. Дай көм-паськөмыс Тамаралон тырмымон. Отка нывтө Королёвъяс радейтисны зэв ёна, могмөдлісны сылысь став корөмъяссө. Мисаил Карпович пыр уджаліс вузасян организациясын и вермыліс судзодны сэтшөмторъяс, мый йөзис эз вермывны ньобны магазинъясысь. Карө выль удж выло лэччигон Королёвъяс босьтисны сьорсьыныс сөмын медся коланаторъяс. Евлампия Ивановналон эз вөв ыджыд көсийомыс мунны карас, но век жө кывзысис.

Рытнас Тамара звөнитіс карө. Гөтырыскөд орччон сулаліс и Володя. Водзджык сёрнитіс мамыскөд, висьталіс гажа рыт йылысь; ошйысис, кутшөм пөся примитісны найос татөні. Трубкаын кыліс Евлампия Ивановналон гөлөсыс: батыд пө кывзө сёрнинымөс и зэв ёна көсий, мед эськө мунтөдзныд волінныд карө; ми пө тияны тожө дасьтім гөстинечьяс. Волөй пө көть лун-мөд кежлө. Володя сөгласа гогйөдліс юрнас: лэччылам пө, сөмын этшаджык ковмас овны Таркойтын.

Аскинас, пөттөдз узьом бөрын, Воробьёвъяс шуисны ветлыны Ягдорө пөль-пөчыс ордө. Мунісны вөрса ордым кузя, кыті и ветлөны лесопунктын уджалысь ягдорсаяс. Ордымбокса ягьясас вотөса воо уна чөд. Тусьсө сөйигмоз да вотігмоз и мунісны. Кытчөдз эз тыртны вотөснас куим литраа бидон, вөрсьыс эз петны.

Выль стрөйбаяса посёлок бөрад Ягдор кажитчис рудон. Важ эжвадорса луд вывсянь кылісны мачасьысь посни челядьлөн гөлөсьяс. Лун шөр лун, и сикткодьыс видз вылын. Совет власьты нелямын квайт во чөжөн Ягдорын эз кыпты ни оти выль общественной стрөйба. Колхоз правленнө, пошта, школа — ставыс на комынөд воясө зіль йөзлысь мырддялөм керкаясин, клуб — вөвлөм вичкоын.

Важмөны-пөрысьмөны колхозникъяслөн олан керкаяс. Пөрысьмөны асьныс колхозникъяс. Серпасыс уналаын татшөм, көні сиктъяссянь матын котыртчисны лесопунктъяс. Льомдін «ныр» улын өні кык ыджыд механизируйтөм лесопункт. Кыкнан посёлокөдзыс верст-мөд и эм. Шөрсиктса «Рассвет» колхозын

явö эз кутны тырмыны уджалысь кияс. Со и ковмывлö страда дырйи да урожай идралігөн петкöдны видзьяс да муяс вылö и школьникьясöс, и учреждениеясын да организацияясын уджалысьясöс. Колхоз эськö ас выннас вöчны нинöм эз вермы. Ичöt удждон вöсна эз локны сиктö и специалистьяс. Армияысь воём том морт, кöть и бать-мамыс колхозникьяс, инасьліс сідзжö лесопунктö. Вося итогьяс серти медбур колхозниклы, механизаторлы сетлісны либö кутшöмкö да бумага награда, либö платтьö дöра, либö чышъян, нöшта мыйкö. Дерт, колхозниклы корсюрö вичмыліс и кöрт медаль. Но медъюгыд да меддона наградаяссö аслыныс пысавлісны ыджыд да шöркoдь начальникьяс. Дыр-ö кутас таdzi кыссьыны — некод оз тöд.

Ягдорью вомөн пос вылö воём бöрын Воробьёвьяс шуисны ыркöдчыштны. Перилöас мыджсьыштöмөн Володя казътыліс ассьыс челядьдырсö. Тувсов да гoжся рытьясö пö тайö поскыс лoліс том йöзлы йöктанінөн, а ми пö, посниджыкьяс, вом вешкыртöмөн видзöдім налөн сьылöм-йöктöм вылö. Тöвнас пö татчöс крут кырьясыс лoлісны даддьөн да лямпаөн исласянінөн.

Сергей Емель вöлі гортас. Керка ортсы стенас öшлöмөн дзоньталіс ботан. Öгрöпена мунöма колхозса видз вылö.

— Пöчö куртны на ветлывлö?

— Опонасей Тикөнöвич пöгибö воёма, куш пö олöма йöз нин и колины колхозад да. Кывсьö тай, колхознымöс пö кöсийны öтувтны Юсьбöжса Калинин нима колхозкöд, тані пö бригада сöмын и лoö.

— Лазарь зятькöд ме волі сёрниö, да шуис, ковмас пö, тыдалö, Ягдорад колхозыс пыдди котыртны подсобнöй овмöс.

— Мыйся сэтшöм овмöс?— эз гөгөрво пöльыс.

— Сетасны Ягдортö кутшöмкö леспромхозлы и сэтчöс вөр лэдзсысяслы кутасны вöчны йöв да яй. А шептасьысь быдмөгьяс быдтыны оз кутны.

— Муяссö эновтасны али мый?

— Кöрым вылö уна вося турунъяс кöдзасны.

— Мед думайтö ыджыд начальство. Вайö пырöй да нурьясьбй.

— Пöль, ми пötöсь. Со, локтігмоз и вотчим, и корöсь чегъялім. Тайö чöдйыс тiянлы. Кöсья гортö нуöдлыны Тамараöс, гашкö, весиг пывсян ломтылам.

Володя пыраліс ключла, и гoзъя мöдісны сэтчö, кодöс Воробьёв шуö бать керкаөн и кöні медводдзаысь аддзис тöдтöм роч дядьöс. Зонка öдйö велаліс сы дінö. Öдйö сы вöсна, мый Вова эз тöдлы батьсö, бать пыддиыс вöвлі пöльыс. Воробьёв гурийв восьтіс керка öдзöсьяссö. Тамара кильчö пос тшупöд вылö пуксьöмөн кöртавліс корöсьяс. Сэсся кытшовтісны керка-картасö. Гөбöч öдзöсдорса кöсяк вылысь Володя петкöдіс пуртөн вöлыштöм пасьяс.

— Медводдза тшупöдсö вöчöма нелямын көкъямысöд воын, первой классö мунан воö. Со, тшупöдыскöд орччөн восö индöма.

— Сідзкö, та судта тэ вöлін сизим арöсөн?

— Да. Пасйöдьяссö вöчавліс Богдан дядь.

— Медвылі тшупöдсö кор вöчöма?

— Шöр школа помалан воö. Таркойтсаянь нарошнö волі, мед кольны тайö пассö.

— Ноко, уна-ö сэксянь быдмöмыд, сувтлы, мерайтам; вит во нин сэксянь колис.

Воробьёв мышнас жмитчис көсяк бердö.

— О-о, сантиметр куим на быдмöмыд. Кымын метр судта öнi тэ?

— Военнöй билетам бөръя пасйöдыс татшöм: «рост — 167, окружность головы — 58, размер обмундирования — 48 (2), обуви — 41, противогаза — 2». Мукöдторйыслысь ыдждасö абу индöма.

— Мукöдторйыслысь мерайттöг да тэнад военнöй билеттöг тöда: меным буретш,— нюмъялiгтыр шуис Тамара и окыштіс верöсылысь бан боксö, сувтіс көсяк бердö.— Видзöдлы, ёна-ö ляпкыд ме тэ серти?

— Ки вомлöсөн. Быдмöмыд буретш менлы вылö. Жаль, пус-туйтö керкаыс да, сизимöд во нин.

— Мыйла он вузалöй?

— Шыöдчылісны сиктсöветсянь, но мамö и кывзыны оз көс-йы. Миян Люда быдмö, друг да Ягдорын кутас уджавны. Помала пö көкъямыс класс и муна дошкольнöй педучилищеö, көсйö лоны воспитательницаöн.

— Гажаинын тэнад чужан деревняыд, кык ю костын. Ме эськö тани öлі жö.

— Кутам воливлыны, татöнi менам став рöдняйö. Ломтылам пывсянтö?

— Нинöм вöчöм дорысь ломтылам дай.

Ни öтиыслы, ни мöдыслы пывсьыны ыджыд коланлуныс эз и вöв. Карсаяс татшöм югыд шондiа лунад мунöны парклы паныда кузь да паськыд лыа көса вылö гожиöдчыны. Позьö пöжсьыны и Ягдорын, Важ Эжва берегын, но турун пуктан кадад йöзсяныс абу лöсьыд — лодыръясөн шуасны. Сэсся и, пароходөн Лбöмдiнö воём бöрын, мöд луннас, ломтылісны нин Королёвъяслысь пывсянсö. Медводдзаясь ныла-зонма, көть и эз на вöвны гозъяöн, зыралісны öта-мöднысö пöсь корöсьөн. Адам да Ева моз найö мелiалісны öта-мöднысö, быттö көсйисны гöгөрвоны: мыйся сэтшöм ловъя лов — нывбабаыс; мыйся сэтшöм ловъя лов — мужичöйыс. Воисны öти кывйö: Енмыс найöс чужтöма öта-мöдныслы. Волö Тамаралы кыв йылас Володясянь коркöя сьöктылöмыс, но мырдысьөн кутö ас пытшкас. Висьталас кө, Воробьёв вермас эльтыштны сылысь верös сайö петалöмсö. Көть мый эз вöв, но нывлөн мывкыдлуныс мойвиис Володялы, и думсьыс сйö гöрдитчис таөн, и нöшта ёнджыка радейтіс Тамараös. Кужны прöститны öта-мöдлысь öшыбка — тайö тожö радейтöм. Журналист асьсö кутіс сiдз, быттö нинöм оз тöд Тамаралөн верös сайö петалöм йылысь. Гашкö пö, эз и петав да?

Эжвакатыдса сикт-грездъясын из горъя сьöд пывсянъяс пытшкöснас нинöмөн эз торъявлыны öта-мöдсьыныс. Воробьёвъяслөн сöмын ичöтджык Королёвъяслөн серти. Быд морт дырджык көсйö лоны томөн да дзоньвидзаөн и кузьджык нэмаөн. И тадзи сэксянь, кор морт кутіс овны му вылын. Сэксянь жö и йöз босытчисны корсьны бурдöдчанторъяс. Пöрысьмöмысь кө öнöдз на абу некутшöм лекарство, то уна сикас нёрпалöмысь позьö мездысьны. Зэв важысянь (античнöй кадсянь) йöз заводитöмаös пöльзуйтчыны пывсянөн. Пывсян мездылöма найös медсьöкыд висьöмъясысь. Важ греческöй мифъяс висьталöны: весиг

пö енъяс, мед пыр кежлö кольны томöн да кувлытöмөн, мыссы-
лöмаöсь пывсянын.

Коми крестьянинлы пывсяныд век вöвлі корöсьөн мудз весь-
кöданінөн. Керка лэптöмкöд тшöтш сійö стрöитліс и пывсян.
Нелямынöд вося арын ас керкаас мича Машукуыскöд овмöдчöм
бöрын Емель Вань медводдзаысь пывсис гöтырыскöд вьль пыв-
сянын. Буретш сійö пывсянсö и ломтісны Володя гозъя. Талун
сэн кутасны пывсьыны Емель Ваньöлөн пиыс мича Тамараыскöд,
зыравны öта-мöднысö небыд кыз пу корöсьөн, коді важысянь
лоис коми пывсянлөн символөн.

Пывсигөн гозъя костын пансис сёрни.

— Володь, мед эськö ог на жö сьöкты.

— Мыйла?

— Во кык кöсья уджавны нёнöдчытöг. Тэа-меалы медводз
колö сувтны кок йылö, а сэсса тон тыдовтчас.

— Та йылысь ме эг на и думышты. Мый эськö сöветуйтан?

— Пыравны Лёмдинса аптекаö. Сэні менам бур тöдса уджа-
лö, Диана Попова, миян серти кык воөн водзджык помавліс
шöр школасö, фармацевтö сэсса велöдчис. Ськöд и сёрнитла,
кызди видзчысьны сьöктöмсьыс. Али öдйöджык батён кöсьян
лоны?

— Кöсья эськö, но öд и збыльысь кок йылö сувтны колö.

— Сувтам. Öтлаавны кö тэа-меалысь велöдчöмнымöс, лöö
комын во! Весышөрö али мый та мында восö велöдчим? Аддзысь-
ла Дианаыскöд?

— Аддзысьлы нöсь,— öти кывйö воисны гозъя.

Куим лун мысти лесопунктлөн автобусөн Воробьёвъяс лэч-
чисны Лёмдинö. Тэрмасьöмыс лои сы вöсна, медем удж вылö
инасьтöдз Володя удитіс воыны карö матысянь тöдмасьны тесть-
тöщайскöд. Ёна кöсйисны аддзысьлыны зятыскöд и Евлампия
Ивановна да Мисаил Карпович. Медем туяс эз вош уна кадыс,
шуисны лэбзывны карас самолётөн. Тамара гортсяныыс звöнит-
ліс аэропортса начальникыслы, коді мамсяныыс матысса рöдня,
и корис судзöдны кык билет. Мöдыс пыр и вочавидзис: верман-
ныд пö лэбзыны аски медводдза рейсөн.

Эз нюжöдчы Тамара и аптекаö ветлöмөн. Диана лыддис сьöк-
тöм йылысь быдса лекция.

— Стенад öшöд календар и пасъяв сэтчö, кор вöлі тöлыссяыд.
Сійö лунсяныыс и колö артавны, кор позьö да оз кутчысьлыны
верöсыдкöд, кор öдйö сьöктан, а кор и он. Ме тэн сета не-
ыджыд брошюра, сэні ставсö гижöма. Гортын нигаыс, талун и
пырта. Правда, мужикъясыд оз ёна юасыны, позьö али оз...

Диана кызіник, лайкыд том нывбаба. Чужöмыс банйыштöм
блин кодь гöгрöсіник, нюмдігас бан бокъясас тöдчöны лöсьыдик
нөптовъяс.

— Презервативыд нö эм гортад?

— Абу.

— Ньöб, пока эм, кык сикас весиг.

— Мыйла кык сикас?

— Ыджданас торъялöны, но доныс öткодь.

— Ньöба. Кодсö сöветуйтан?

— Кутшöм öд верöсыдлөн мужик пасыс, сы серти.

— Сідзнад, ыджыдджыксö.

Сьорас ньобөмторъяснас Тамара Воробьёва муніс гортас. Рытнас, орччөн пуксьомён, гозъя гораа лыддисны Дианаён вайём брошюрасё, кодёс гижёма Москваысь медицинскöй институтса профессор. Брошюрасё лэдзёма странаын разөдөм выlö кык миллион экземпляр.

— Но мый, Владимир Иванович, кутам овны профессорлөн индөдъяс серти? Эн пов, ме тэнö тшыгйөдны ог кут; лоö кө теплит, ог ло паныд, сөмын со этійөс ковмас пысавны.— Тамара перйис сумкаысь некымын пачка презерватив, пуктіс брошюра вылас.

— Ньобин?— тшөкмуніс Володя.

— Диана вөзйис, ме ньоби. И велөдіс, кыдзи вөдитчыны.

— Татшөм дивөсö аддза медводдзаысь. Ладнө, позьö видлыны коркө.

— Сөмын сэк, кор кокниа верма сьоктыны. А сійö кадсö кутам төдны и тэ, и ме.

— Тавой татөг на позьö али оз нин?

— Позьö.

И кыкнанныс дөвөля нюмъялісны.

Аскинас АН-2 самолётөн Воробьёвъяс лэбисны Сыктывкарö. Королёвъяс примитісны зятсьö ыджыд нимкодълунөн ассыныс пиös моз.

Водзö лоö на.



Диана ХОЛОПОВА

Тима Веньлөн еньюгыд чужанінын


*Со и Помёсдін син водзё петіс,
Мича стрёйбалён тыдовтчис нюм.
И вот мунам ми туй кузя сәті...
Чужё юраным сё пөлөс дум.*

*Татён тёданныд овывліс коді?
Кодлөн зумыда тувчавліс кок?
Коми гижөдлы пуктывліс подув?
Тима Вень да Иона — кык вок.
Илля Вась.*

Тавося октябрь 20 лунё тырө 120 во чужан лунсяньыс Тима Веньлы, Вениамин Тимофеевич Чисталёвлы — енбиа, ыджыд вежора коми гижысьлы. Ми, музейса уджалысьяс, та кежлө лөсьөдчигөн некымынысь ветлім гижысьлөн чужаніно, Помёсдін сиктө, мед аддзөдчывны Тима Веньлөн Авиа нылыскөд, кывзыштны сылысь казътыломъяссө, волены чужан керкаас да музейö, нöшта öтчид матыстчывны гижысьөн садитлөм ниа пуяс дорö.

Помёсдін сикт сулалö Эжва йылын, Коми мулөн медся гажа пельöсьясысь öтиын. Сикт дортис визувтö Помöс ю, сійöс вуджөм бöрын веськыд ки вылын, джуджыд кыр йылын, сулалö Чисталёвъяслөн керкаыс. Керка пытшкөснас мянөс тöдмөдіс Тима Веньлөн внучкаыс, Ирина Егоровна.

Керкасö лэптывлöма Тима Веньлөн батыс. Улі судтаас кык жыр да посводз, выліас — куим жыр, шöрсаыс вöлöма гижысьлөн уджалан кабинетөн. Ирина Егоровна висьталөм серти, жыръяс Тима Веньлөн оландырсянь нинөм абу вежлөмась, и быттö гижысьыс сöмын на кытчöкö петöма — сідзи жö сулалöны диван, улöс, шкап да пызан, код сайын уджавлöма В.Чисталёв. Чуймөдöны шкапын сулалысь небөгъясыс да журналъясыс: найöс кутліс кияс Тима Вень, öткымын небөг да журнал вылын эм гижысьлөн кырымпасыс. Но уна небөг-журнал нуöмась пуксьöдан войö, торйөн нин комияссö. Жырсянныс торъя öдзöс петкөдö балкон вылö. Балконсянныс вöссьö сиктгөгöрса став мичлуныс — ылын



кывтö Эжва, кок улын моз визувтö Помöс, шылыда плавгысьö-маöсь видзьяс, ылын-ылын тыдалö енэжтас. Сöмын тані и гö-гөрвоан, мыйла сы мында гижöдын Тима Вень петкöдліс ывла-ывылсь помтöм мичлунсö, восьтіс сы дорö куслытöм муслунсö.

Кыкысь и янсöдчыліс В.Чисталёв чужан сиктыскöд да горт-ыскöд дырджык кежлö — Дереваннöйса школаын велöдчан да сардырся армияын служитан воясö. Дерт, ветлывліс Сыктывдін-карö гижысьяслөн конференцияс да съезд вылö, издательствоö; Москваö да Архангельскö съездъяс вылö. Тима Веньöс унаыс корлісны уджавны издательствоö, но гижысь сідзи эз и вермы торйöдчыны чужаніныскöд.

Сöмын тай дзикöдз вылö мырдөн нуисны ноябрь 27 лунö, мыжтöг мыждісны. Авиа Вениаминовна казтылöм серти, тайö войö и помасис налөн челядьдырыс, öд батыныс вöлі вывті бур, зэв ёна радейтіс челядьсö да гöтырсö, Александра Семёнов-наöс. Со татшöм письмö Тима Вень гижлöма гортсаясыслы дзескыдінсянь кулан воас, 1939 вося юнь 20 лунö: «Муса гортсаясöй менам, вунöдлытöмторъясöй, сьölöмшöръясöй: гöтырöй, челядьöй, чойясöй и став рöдвужöй — Ара (тадзи шуліс гöтырсö), Музук, Авьюш и Воканук — югыд шондйöй, менам пиöй! Кутшöма нин оланныд?.. Ме ог тöд, ті кыздз, а ме колян письмö-ас тай гижлі, ола здорöвьеөн кокныдджыка, кокъяс ямисны, кынöм чині и сёя-юа... Сьölöмöй быттö пыр матыстö регыд-джык аддзысьöм вылö. Мед эськö да, он тöд, мый дыра на кыссяс — кымын лун, кымын вежон, кымын тöлысь... Поклон быдöнлы... быдөнлы, коді юалас, казтывлас ме йылысь...».

Водзö Авиа Вениаминовна висьталіс, мый мамыс унатор на вöчис верöссö мездöм могысь: некымынысь ветліс Сыктывкарö, вузаліс батыслы костюм вылö ньöблöм дöра да корсис адвокатоs. Адвокатыс сьöм ыстöм бöрын воис Москваысь да суд ылын В.Чисталёвлысь унджык «мыжсö» сяммис вештыны, колис сöмын öтитор — гортас важ литература видзöм. Но Медвылыс судöдз гижысь эз ов — куліс 1939 вося октябрь 13 лунö. Тайö бырлытöм дойнас да курыд шогнас и мунісны олöмсьыс Александра Семёновна, Муза нылыс да Вокан пиыс. Куимнан челядьыс уджалісны велöдысьясөн.

Тима Веньлөн олігөн на сылөн чужан керкаö воывлісны коми гижысьяс. 1920 вояс помын Помöсдін сиктса том йöзлы школаын велöдчис коми поэт Иван Михайлович Вавилин. В.Чисталёв велöдіс сәні коми кыв да литература, чуйдöдіс том йöзöс гижны. Сійö корлывлöма том поэтöс гортас, а И.Вавилин аслас велöдысь пыдди весиг урокъяссö нуöдлöма.

Колис казтылöмъяссö и коми прозаик Иван Васильевич Изъюров. Медводдзаысь В.Т.Чисталёвкöд паныдасьöма 1928 воын Коми небöг лэдзанінын. Йöзкöд сёрнитігөн Тима Вень вöлöма вежавидзысьөн, рамөн да ыджыд вежöраөн; некор абу лэп-тывлöма гөлөссö. А 1936 во пансигөн И.Изъюров да «Правда» газетса корреспондент В.Ворыгин ветлöмаöсь Помöсдінö творческой командировкаö. Тима Вень корöма найöс олыштны сы ордын. Найö уна сёрнитöмаöсь коми литература йылысь, паныдасьлöмаöсь сиктса йöзкöд. В.Чисталёв висьталöма, мый уна уджалö: лöсьöдö аслас гижöдъяслысь коймöд том, гижö сиктлысь история.



Тима Веньлысь бур нимсö бергöдöм бöрын чужан керкаас гижысьясöс да литература туялысьясöс радпырысь паныдавлісны сёян-юанöн тырöм пызан сайын сылön челядьыс — Муза, Авиа да Вокан. Татчö воывлісны В.И.Лыткин (Илля Вась), Г.И.Торлопов, Г.А.Юшков, А.Е.Ванеев, В.В.Тимин, П.Ф.Шахов, В.А.Латышева, В.В.Пахорукова, Е.В.Козлова, В.А.Лимерова, В.А.Попов, В.Г.Лодыгин, Тима Веньöс дядьöн шуысь — коми композитор П.И.Чисталев, Т.А.Чисталёва да мукöд.

Помöсдінын öнöдз на сулалö сійö школаыс, көні велöдчыліс Тима Вень, а сэсся и велöдліс. Чужан сиктса школаас уджаліс 1910 восянь 1933 воöдз, персональной пенсия вылас петтöдзыс. 1911 воö Усть-Сысольскын вöлі велöдысьяслön мöд съезд. В.Т.Чисталёв, делегат, сёрнитіс коми школаясын коми кыв вылын велöдöм йылысь, но некод сійöс эз кыв...

Школа дорас сулалöны нияяс. Нияыс — гижысьлön медся радейтана пу. 1923 воын «Выль туйöд» небöгын вöлі йöзöдöма В.Чисталёвлысь «Ылі йöз мусянь ас чужан му йылысь» очерк. Гижöдсö лöсьöдöм йылысь мöвпыс Тима Веньлы воис сэк, кор сійö вöлі Украинаын медводдза мирöвöй война вылын да ёна гажтöмтчис Коми муысь. Киевын олігөн, Днепр ю дорын пукалігөн гижысь думнас шыöдчö Эжва ю дорö, коми кыв дорö, быд пу да куст дорö. Ниа пулы сиöма со татшöм кывъяс: «Нияяс сэн быдмöны. Ок, гырысьöсь жö быдмöны! Кызöсь, кузьöсь, веськыдöсь, мичаöсь!.. Ниаöй, ниаöй! Мича муса пуöй! Аддзывла ог нин ме тэнö коркö?..»

А 1924 воö «Коми му» журналын Тима Вень йöзöдіс «Ниа» кывбур да сиис сійöс ичöt воыслы, кывбуралысь да вуджöдчысь Иона Чисталёвлы. Кывбурас вöсьö пулön олöмыс, мичлуныс да ёнлуныс, но кыптö лёк бушков да жалиттöг бырöдö ниаöс. Регыдъя кадön жö муніс олöмсьыс и Иона воыс.

И.Т.Чисталёв — тöдчана коми композитор Прометей Чиста-

лөвлөн батыс. Сійö велөдчис Помөсдинса школаын да Усть-Сысольскса училищєын, сәсся помаліс Архангельскын велөдысь-яслысь курсъяс. 1917 вося революция бөрын уджаліс УОНО-ын (йөзөс велөдан Усть-Сысольскса юкөн), ыджыд пай пуктіс коми школаяс да учебникъяс лөсьөдөмө. Кызди төдчөдліс Нёб-динса Виттор, Жан Морөс (И.Чисталёвлөн литературной нимыс, сідзкө, вося да шань сьөлөма морт) вөлі бур критикөн да окотапырысь отсавліс гижысь-ёртыясыслы. Ыджыд вокыс моз жö вөлі медводдза мирөвöй война вылын да висьмис чахоткаөн (туберкулёзөн). 1922 воын бурдөдчис Крымын, но висьöмыс вывті нин чорыда пытшкас вөлі пырöма — 1923 вося юль 24 лунö кувсис Пөддельной санаторийын. И.Т.Чисталёвлы вөлі сöмын на 31 арөс. Дзєбисны сійöс сиктса шойна вылө. Дерт жö, та вöсна и садитліс нияяссö Тима Вень.

В.Т.Чисталёв чужан сиктас видзис-дөзьöритіс ставсö: сикт-шöрсä пожöма ягсö, сиктгөгöрсä пуяссö да кустъяссö, ачыс садитліс найöс. Сійö эз сöмын видз, а велөдіс таö ассьыс велөд-чысьяссö да сиктсаяссö.

1930 вояссянь уна ва нин визувтіс. Но гижысьöс колö помнитны и вöчны ставсö сы могысь, мед дыр на сулалісны чужан керкаыс да школаыс, вильмөдны сэн музейсö. А школа йöрас, ния пуяс дорас, колö лөсьөдны пукаланін, мед эськө позис сэн Тима Веньöс казътылігмоз шойччыштны да мөвпалыштны ыджыд гижысьлөн олөм йылысь.



Снимокъяс вылын:

- 1. Тима Вень гортас, уджалан кабинетас;*
- 2. Коми гижысь И.Изъюров да «Правда» газетлөн корреспондент В.Ворыгин Чисталёвъяс ордын Помөсдинын (1936 во).*
- 3. Тима Веньөн лэптылөм керкаыс.*



Таво октябр 22 лунö тырö 140 во чужан лунсяньыс ыджыд роч гижысь, Нобелевскöй премия лауреат Иван Алексеевич Бунинлы. Чужліс сійö Воронежын гöльмöм дворянин семьяын. Батьыс — Алексей Николаевич Бунин, мамыс — Людмила Александровна Бунина.

Медводгза кывбурсö И.Бунинлысь йöзöдісны «Родина» журналын 1887 воын.

1895 воын И.Бунин муніс Петербургö, а ссэся Москваö. Москваын том гижысь тöдмасис уна нималана художниккöд да гижыськöд: К.Д.Бальмонткöд, А.П.Чеховкöд, В.Я.Брюсовкöд. Д.Телешовкöд тöдмасьöм бöрын кутіс ветлöдлыны «Среда» кружокö. 1899 воын Ялтаын тöдмасис М.Горькийкöд, коді сёрөнджык корис Бунинöс уджавны «Знание» издательствоö. И.Бунин заводитіс нимаवны «Антоновские яблоки» (1900) висьт петöм бöрын. А америкаса поэт Г.Лонгфеллолысь «Песнь о Гайавате» поэма вуджöдöмысь (1898) да «Листопад» кывбур чукöрысь (1901) Россияса наукаяс Академия шуис сетны И.Бунинлы Пушкинскöй премия.

Иван Бунин ёна ветлöдліс Европаöд, Азияöд да Африкаöд. Гижысь эз примит Октябрса революциясö да 1920 воын гöтырыскöд, В.Н.Муромцевакöд, муніс Константинопольö, а ссэся Францияö, көні и оліс олöм помöдзис Грассаын да Парижын. 1925 воын Иван Бунин лэдзис Октябрса революциялы паныд гижöм «Окаянные дни» удж да «Митина любовь» повесьт, 1927 воын — «Солнечный удар» висьт чукөр, 1929 воын — «Божье древо». 1930 воын И.Бунинлөн петіс «Жизнь Арсеньева» роман, а 1933 воын гижысь лоис Нобелевскöй лауреатöн. Иван Бунин унаысь көсйыліс бөр мунны Россияö. Но «Звезда» да «Ленинград» журналъяс йылысь Жгдановлөн 1946 вося постановление бöрын гижысьлөн век кежлö воши гортас мунны көсйöмыс.

1943 воын Иван Бунин гижис «Тёмные аллеи» небöг и шуис сэтчö пыртöм висьтъяссö аслас творчествоын медбур гижöдгъясөн. Найöс сиöма муслунлы, но геройяслөн шудыс абу кузь: радейтысь йöзöс пыр мыйкö торйöдö, и сьölöманыс кольöны сöмын муслун йылысь казътылöмъясыс.

Кувсис Иван Алексеевич Бунин 1953 вося ноябр 8 лунö Парижын. Гуалісны гижысьсö парижувса Сен-Женевьев-де-Буа роч шойна вылын.

Иван БУНИН

Кык висьт

Кöдзид ар

Сэки сійö гөститіс миянын юньын — век лыддим сійöс ас мортöн: шонъянöй батьыс вöлі менам батьлөн ёртөн да суседөн. Юнь дас витöд лунö Сараевоын виисны Фердинандöс. Мöд луннас, асывнас, почта вылысь вайисны газетъяс. Батьöй петіс кабинетсьыс киас москваса рытъя газетөн сёянінö, көні мамöй, ме да сійö пукалім тшай юан пызан сайын, и шуис:

— Но, ёртгяс, война! Сараевоын виёмаось австрияса крон-принцос. Тайо война!

Петыр лун кежлө миянө локтис уна йёз,— батылөн нимлун вёлі,— и пажын дырйи сійёс тёдмөдісны госьгьяскөд, шуисны менам жөникөн. Но юль дас өкмысөд лунө Германия уськөдчис Россия вылө...

Сентябрын сійё воліс миянө сутки кежлө — прөститчыны фронт вылас мунтөдз (сэки ставныс виччысисны войналысь регыдя пом, и көлысьнымөс шуисны ворсны тулыснас). И со воис миян прөщайтчан рыт. Ужнайтом бөрын вайисны самовар, и өшиньясным руалисны. Батёй видзөдіс на вылө да шуис:

— Арыс тай таво зэв водз пуксис дай көдзид.

Сійё рытнас ми пукалім чөла, сөмын гежөдика шыасьлім өта-мөд дорө. Но сьолөм шызыөмсө некод эз петкөдлы и гуся мөвпгьяснас эз юксыы. Йёзаддза лөня шуис батёй и ар йылысь. Ме матыстчи балкон өдзөс дорө да чышки стеклөсө чышгьянөн: сьод енэжас ярьюгыда да ёся дзирдалисны йиа сөстөм кодзувьяс. Батёй шпуткис креслө вылө лэдзчысьмөмөн да веськодпырысь видзөдіс пызан весьтын өшалысь пөсь лампа вылө, мамөй өчкиасьмөмөн зілис-вурис лампа би улын ичөт ермөг сепыс,— ми төдім кутшөмөс,— и таысь нөшта на ёнджыка нормис сьолөмыд да босьтис гажтом. Батёй юалис:

— Тэ сэсся асывнас завтракөдз и көсьян мунны?

— Да, бурджык асывнас,— вочавидзис сійё.— Зэв эськө абу окота, но ме эг на удит сетны керка серти индөдгяс.

Батёй кокныдыка ышловзис:

— Но, кыдзи сэсся көсьян, сьолөмшөр... А миянлы мамыдкөд ковмас водны узыны, мед тэнө аски кольөдны...

Мамөй чеччис да пернапасалис зятйпусө, сійё копыртчыліс мамлөн ки дорас, вөлисти батылөн ки дорас. Ми колим өтнаным да олыштім на сёянінын,— ме заводиті тэчны пасьянс,— сійё чөла ветлөдіс пельөсысь пельөсө, бөртиджык юалис:

— Гашкө, прөйдитчам да?

Лов вылам пыр сьөкыдджык лоис, и ме веськодя вочавидзи:

— Прөйдитчам...

Водзпомын пасьтасигөн сійё век на мыйкө мөвпалис, нюмсорөн казытыштіс Фетлысь кывбурсө:

Какая холодная осени!

Надень свою шаль и капот*...

— Капотыс абу,— шуи ме.— А водзөсө кыдзи?

— Ог помнит. Тадзи кө-а:

Смотри — меж чернеющих сосен

Как будто пожар восстает...

— Кутшөм пөжар?

— Төлысь петөм, дерт. Мичаа жө шуөма тайо кывбурас сиктса ар йывсыыс! «Надень свою шаль и капот...» Миян дед-баблөн кад... Ок, сө морө олөмөй!

— Мый нө лои?

* *Капот — юркыша плащ.*

— Нинөм эз, сьолөмшөр. А век жö гажтөм. Гажтөм и лөсьыд. Ме тэнö зэв ёна радейта...

Пасьтасьөм бөрын ми петім балкон вылө, лэччим садьö. Первойсö вöлі сэтшөм пемыд — ме кутчыси *сылөн* соскө. Сэсся югдысь енэжын кутісны тöдчыны дзирдалысь кодзувъясөн мичмөдөм сьöд увъяс. *Сійö* сувтовкерлөмөн бергөдчыліс керкалань:

— Видзөдлы керка öшиньяс вылас, кутшөм найö аслыспөлөса югвидзöны, арся моз. Ловйөн кө коля, некор ог вунöд тайö рытсö...

Ме видзөдлі, и *сійö* дзигөдіс менö швейцарияса сөстөм кышöднам. Вешті чужөм весьтысь гөн чышъянөс, дорынътышті юрөс, мед *сійö* окыштас менö. Окыштіс, сэсся видзөдліс чужөмам.

— Кутшөма синъясыд югъялөны,— шуис *сійö*.— Тэныд абу кодзыд? Сынөдыс нач төвся кодь. Менö кө виасны, он öд, көнкө, дзик пыр менö вунöд?

Ме думышті: «А збылысь кө нö виасны? И збылысь мөй вунöда *сійöс* мыйкөдыра мысти — öд ставыс коркө вунö?» И тэрмасьөмөн вочавидзи, татшөм мөвпсыс повзи да:

— Эн вай таdzi сёрнит! Тэ кө кулан — ме абу жö олысь! Чөв олыштөм бөрын *сійö* надзөникөн шуис:

— Но, виасны кө öд, ме кута виччысьны тэнö сэнi. Тэ олышт, нимкодьясьышт оломнас, сэсся ме дорö лок.

Ме курыда бөрддзи...

Асывнас *сійö* муніс. Мамөй öшөдіс *сылы* голя вылас рытнас вурөм сепыссö,— сы пытшкын вöлі ичөтик зарни öбраз, кодөс новлөдісны война вылын мамлөн батъыс дай дедыс,— и ми ставным тэрыба, шөйөвошөмөн пернапасалім *сійöс*. Бөрсяныс видзөдөмөн сулалыштім кильчө вылын бөбмөм чужөмъясөн: таdzi овлө кодкөдкө дыр кежлө янсөдчигөн, и сэтшөма эз лөсъяв миянлы тайö кыпыд, шондіа, турун вылын пужйөн югвидзысь асылыс. Сулыштім да пырим кушмөм керкаö. Ме муні жыръясөд киясөс мышкө пуктөмөн и эг төд, мый керсьыны: ырзөмөн бөрддзыны либö горөдны сьывны...

Сійöс виисны — кутшөм тешкодь кывйыс!— төлысь мысти, Галицияын. И коли сэксянь быдса комын во. Зэв унатор лои пыкөма тайö каднас, и сійö кажитчө сэтшөм кузьөн, кор ёна мөвпалан сы йылысь, лукъян юрсьыд став шензьөданасö, гөгөрвотөмсö — кольөмасö. Дас көкъямысöд вося тулысын (сэки батьмамөй кыз му улын нин куйлісны) ме олі Москваын, смоленскөй рыноквывса вузасысь дорын пöдвалын, и сійö пыр тешитчис ме вылын: «Но, барыня, кыдзи-мый оланнды?» Ме вузаси жö, сэки öд унаөн вузасисны, вузавлі папахаяса да разьөм кизя шинельяса салдатъяслы эмбур колясөс — то кутшөмкө чунькытш, то перна, то возйөн сөйөм ку воротник, и сэнi, Арбат да рынок пельөсын, вузасигөн паныдалі бур, авъя мортөс, отставкаö петөм оломө военнөйөс; сыкөд ми регыд мысти гозйөдчим и апрельнас мунім Екатеринодарö. Миянкөд сэтчө муніс и дядьөн шуысьыс, дас сизим арөса кымын зонка, матö кык вежон писькөдчим доброволечьяс дорö,— ме баба моз нинкөма, верөсөй — казак ниртчөм дукөса, дзор чильйыла сьöд быдтөм тошка,— и олім Дон да Казань бердын кык воысь дырджык. Төвнас, бушкала

поводдя, мукд пышйсыяскд вөрзёдчим Новороссийскыс Турция, и туяс, саридзын, веросой кулис тифыс. Матыс рөдужыс менам та бөрын колины сөмын куимон: верослон племянникыс, сылон томиник гөтырыс да нывканыс, сизим төлысса кага. Но и найо бөрыннас мунисны Крым, Врангель дор, кагасо меным колисны. Сэни найо и вошисны лы ни ку. А ме дыр на оли Константинополын, нажөвитчи ас выло да нывка выло зэв сьокыд сьод удж помыс. Бөртинас кони сөмын сьокд эг шөйтөй! Болгария, Сербия, Чехия, Бельгия, Париж, Ницца... Нывкаой важон нин быдмис, кольчис Париж, лои пранцуженкаон, мичаммис и ме дор дзикодз кодзалис, уджалис шоколад лавкаын, Маддэн весьтын, зысы гыжъя мичаник кияснас гартлис көрөбкаяс атлас бумага, да көртавлис найос зарни көвъясон; а ме оли и пыр на ола Ниццаын, сы выло, мый Енмыс сетыштас... Медводдзаыссьо ме веськавлэ Ницца, окмыссэ дас кыкод воын — и верми мой думыштыны сэкса шуда лунъяс, мыйон коркө лоо меным Ницца!

Тадзи и оли ме сылон кулом бөрас, көть и шули, мый ог вермы *сытөг* овныс. Но важыс дум выло усылас да, век юаса ассьым: а мый эськө сэтшөмыс вөли менам олөмын? И вочавидза аслым: сөмын сийо кодзыд арся рытыс. Збыль өмой сийо коркө вөли? Дерт, вөли. И тайо ставыс, мый вөли менам олөмын, — мукөдторйыс вөт. И ме эска, пөся эска: конкө сэни *сийо* виччыссьо мено — воддза кодыс том да радейтыс. «Тэ олышт, нимкодясьышт олөмнас, сэсса ме дор лок...» Ме олышти, нимкодясьышти, да регыд мысти локта нин.

Парижын

Бритом вөсни чужома да көтасьтом кузь пальтоа, веськыд статя, косньод кузь тушаа мужичойлы позис эськө сетны нелямын арөсыс эз унджык. Шляпанас, — уличод мунигон либө метро вагонын сулалегон, — дженьыда шырөм гөрдоват юрсиас эз на төдчы дзорыс. Но югыд синъясыс видзөдисны шогпырыс, да и ачыс сөрнитис и кутчысис олөмас унатор төдлом морт моз. Коркө кадө сийо көртымалис Провансын ферма да кывлис сэни уна лэчыд шмонькыв, а Парижын радейтис нюмсорон сюйыштны найос аслас век дженьыд сөрнио. Унаон төдисны, мый Константинополын тайо мужичойсэ эновтома гөтырыс, и сэксаян сийо век на шогалө. Сийо некор и некодлы эз висьтавлы сьолөм дой йывссыс, но көсйытөгыс корсюрө гарыштлис гөтырсө нывбабаяс вылын шмонитигон:

— Rien n'est plus difficile que de reconnaitre un bon melon et une femme de bien*.

Өтчыд Парижын зэра сөр арся рьтө сийо пырис пажнайтны Пасси уличабердса пемыд кулигаын сулалыс неыджыд роч столөвой. Столөвой пытшкын вөли мыйкө сөян-юанон вузасянин сяма, и мужичойлон кызкө төдлытөг сувтсис паськыд өшинь весьтө. Ошинь вылас тыдалисны пелыся винаа, куим пельоса

* Бур арбуз да авъя аньос төдмаломыс сьокыджыкыс нинөм абу (фр.).

гöгрöссияма алöйгöрд сулеяяс да зубровкаа, нель пельöса кольк-
виж сулеяяс, пражитöм да косьмöм нин пирожкияса бекар,
рудöдöм шырöм котлетьяса тасьтi, халва көрöб, шпротья көрöб.
Стойкаыс вöлi тыртöма закусаясöн, а сы сайын тыдалiс буг-
жыль видзöдласа, роч нывбаба чужöма көзьяка. Вузасянинас
вöлi югыд, и мужичöйöс кыскис тайö би вылас көдзыд да быттö
сыла поска пемыд кулигаысь. Сийö пырис, копыртчылис көзьяка-
ыслы да мунiс вузасянинбердса йöзтöм на пемыд биа жырийö,
кабалаөн вевттöм еджвидзысь пызаньяслань. Сэни тэрмасьтöг
öшöдiс руд шляпасö да кузь пальтосö кока вешалка сюрьяс
вылö, пуксис пызан сайö медся пыдi пельöсас и, гöрд гöна ки-
яссö веськодпырысь зыралоён, кутiс лыддыны сылössьöм
лист вылысь вöзьяна вöлөгаяссö; көнсюрö найöс вöлi печатайтö-
ма, а көнсюрö гижöма паськалöм гöрдовлöз чернилаөн. Виччысь-
тöг сылөн пельöсыс югдiс, и мужичöй аддзис вежавидзöмөн
матыстчысь ар комына нывбабаöс. Ань вöлi веськыд потаса
сьöд юрсиа да сьöд синьяса, еджыд водздöраа да сьöд платтьöа.

— Bonsoir, monsieur*,— шуис сийö мича гөлöсөн.

Мужичöй весиг шöйöвошлис, сэтшöма сылы аныс кажитчис
да, и родöмөн вочавидзис:

— Bonsoir... Ti мöй абу роч?

— Роч. Эн дивитöй, гöсьтьяскöд велавсьöма французскöйөн
сёрнитны да.

— Татчö мöй уна француз пыравлö?

— Оз этша. И ставныс корöны зубровка, блиньяс да весиг
борщ. Ti мыйкö бöрийнныд нин?

— Эг, танi зэв уна да... Ti асьныд мыйкö вöзийöй.

— Талун миян флотскöй щи, казак биточки... Позьö и кукань
котлет либö, көсьянныд кө, шашлык...

— Зэв бур. Вайöй меным, пöжалуйста, щи да биточки.

Нывбаба лэптiс вöнь вылас öшалысь блокнотсö да пасйыштiс
сэтчö карандаш помнас. Киясыс сылөн вöлины лым еджыдöсь
да мичаöсь, платтьöыс новлöм, но, тыдалö, бур.

— А водкасö юанныд?

— Дерт, юа. Ывлаас вель васöд да.

— Мый закуситанныд? Эм дунайса сельди, гöрд пöк — не-
важөн на вайисны, коркуновса ичотика солалöм öгуреч...

Мужичöй бара чöвтлiс синсö ань вылö: еджыд нагруникыс
зэв мичаа видзöдчис сьöд платтьö вылас, а сы улын тыдалiс ён
том нывбабалөн мича гöгрöс морöсыс... Кыз парйыс краситтöм,
но вежтö петкөдö, юр вылас сьöд көсасö прöстö гартыштöма,
а киясыс еджыдöсь, мичаöсь, алöйгöрд гыжъясыс лöсталöны,—
тöдчö маникюр...

— Мый ме закусита?— шуис мужичöй нюмъялигмоз.— Сель-
ди да пöсь картупель кө-а.

— А винасö кутшöмöс?

— Гöрдсö. Век тай танi сэтшöмсö вайлöны-а.

Ань пасйис блокнотас да пуктiс сылөн пызан вылö орчча
пызан вывсьыс ва тыра графин. Мужичöй довкйöдлыштiс юр-
нас:

— Аттьö эськö да, но васö да винасö öтлаынсö некор ог ю.

* Бур рыт, сударь (фр.).

L'eau gate le vin comme la charette le chemin et la femme — l'ame*.

— Бурa жö тi миян йылысь думайтанныд!— веськодъпырысь вочавидзис ань да муніс водкала да сельдила. Мужичöй видзöдіс бöрсяныыс веськыд восьлас вылас да сьöд платтьö вөрöм вылас... Да, вежавидзöм да веськодълун, рам да бур уджалысьлөн став сямыс. Но кытысь сылы дона туфлиыс? Олöма да озыр «ami»** эм кө-а...

Мужичöй талун вöлі зэв кыпыд руа, и, дерт, мыйтакö тайö нывбаба вöснаыс. Бөръя мөвпыс дöзмöдіскöд сійöс. Воысь воö, лунысь лунö ставсьыс гусьöн виччысян сöмын öтитор,— радейтана морткöд шуда аддзысьöм. Олан, збыльвылас, тайö аддзысьöмас эскöмөн — и ставыс весьшөрö...

Мöд луннас сійö бара локтіс да пуксис аслас пызан сайö. Нывбаба первойсö эз эшты, примитіс кык французлысь заказ да блокнотас пасъялігмоз гораа шуаліс:

— Cavair rouge, salade russe... Deux chachlyks***...

Сэсса петіс, бөр локтіс да веськöдчис сыланьö тöдсалань моз нин, нюмъялöмөн:

— Бур рыт! Тіянлы, буракö, тані кажитчöма?

Мужичöй гажаа кыпöдчыштіс:

— Видза оланнıд! Вель ёна кажитчис. Кыдзи тіянöс ыдждöд-лöны?

— Ольга Александровна. А тіянöс?

— Николай Платоныч.

Найö киасисны öта-мöдныскöд, и Ольга кыпöдіс блокнотсö:

— Миян талун рассольник. Ок и чöскыд! Пусьысьыс миян зэв бур, служитлöма князь Александр Михайловичлөн яхта вылын.

— Рассольник кө и рассольник... А ті тані важөн нин уджаланныд?

— Коймöд тöлысь.

— А водзынджык көні?

— Водзынджык — вузасысьöн «Printemps»-ын.

— Чинтылісны?

— Дерт, ас гажөн эськö эг мун.

Мужичöй нимкодъпырысь думыштіс, мый «ami»-ыс сылөн абу, и юаліс:

— Ті верöс сайын?

— Да.

— Көнкö уджалö?

— Югославияын. Еджыдъяскöд öтвылысь вöлі. Ті, көнкö, тшöтш?

— Да, вöвлі и мирövöй и гражданскöй война вылын.

— Тіян серти тöдчö. Генерал на, көнкö и,— нюмсорөн шуис ань.

— Вöвлöм. Öні гижa тайö войнаяс йывсьыс суйöрсайса быдсикас издательствояс корöм серти... Кыдз нö эськö ті öтнаныд?

* Вaыс тшыкöдö винасö сідз жö, кыдзи дөддъыс — туйсö и кыдзи нывбаба — ловтö (фр.).

** Ёрт (фр.).

*** Гөрд пөк, винегрет... Кык шашлык (фр.).

— Да кыздкө тай...

Коймөд рытнас Николай юалис:

— Ті радейтанныд кино?

Ольга вочавидзис борщ тыра тасьті пызан вылө пуктігмоз:

— Корсюрө овлө интереснө.

— Оні пө тай «Etoile» кинотеатрын кутшөмкө зэв бур кино петкөддөны. Көсьяанныд кө, ветлам. Тіян, көнкө, эмось шойччан луньясыс?

— Мерси. Ме верма вьльлунө.

— Сідзкө, вьльлуннас и ветлам. Талун мый? Субөта? Аскомысь, сідзкө. Сёрнитчим?

— Да. Аски ті воланныд жө?

— Ог, кар сайө ветла, төдсаяс дорө. А мыйла ті юасяанныд?

— Ог төд... Тешкодь эськө да, но ме тіян дорө кыздкө вела-лі нин.

Мужичөй шоныда видзөдліс сы вылө да гөрдөдіс:

— И ме тіян дорө. Оломас өд аддзысьлөмъясыс сэтшөм шо-ча овлөны шудаось...

И тэрмыштчис вежны сёрнисө:

— Сідзкө, аскомысь. Көн нө ми паныдасям? Ті көні оланныд?

— Motte-Picquet метро дорын.

— Вель тай лөсьыд: веськыда «Etoile»-өдз и позяс локнытө. Ме кута виччысьны тіянөс метроысь петанінын көкъямыс да джынйын.

— Мерси.

Николай ышмана копыртчыліс:

— C'est moi qui vous remercie*. Водтөдөй челядьнытө,— нюмъялөмөн шуис сійө, медым төдмавны, челядя али абу аныс,— и локтөй.

— Слабог, тайө добраыс менам абу,— вочавидзис ань да лайкыда нуис тасьтіяссө.

Гортас мунігас Николайлы өттшөтш вөлі и жугыль, и шуштөм. «Ме тіян дорө велалі нин...» Гашкө, тайө и эм сійө шуда аддзысьомыс? Сөмын сөр нин, сөр. Le bon Dieu envoie toujours des culottes a ceux qui n'ont pas de derriere...**

Вьльлуннас рытнас зэрис, Париж весьтын руалөм енэжыс гудыра гөрдөдіс. Николай эз пажнайт, көсйис Ольгакөд Монпарнас вылын ужнайтны да, пыравліс Chaussee de la Muette вылын сулалысь кафеө, сөйис ветчинаа сандвич, юис сур кружка да куритчигмозыс пуксис таксиө. Etoile метроө пыранінын сувтөдіс шоперсө да петіс зэр улас моски вылө — гөрдөдөм баньяса кыз шопер кутіс виччысьны сійөс. Метросянь ыргис пывсян көра төлөн, содьясөд йөзыс мунігмозыс зонтикьяссө паськөдігтыр сьөд кайис. Газетөн вузасысь лэчыда горзіс Николай дорын рытъя газет нимъяссө утка моз герчкөмөн. Кайысь йөз пиын Ольга петкөдчис виччысьтөг. Мужичөй нимкодпырысь муніс сылы паныд:

— Ольга Александровна...

Мичаа да моднөй пасьтасьөм, Ольга кокниа, эз столовөйын моз, лэптис сы вылө сьөдөн краситөм синъяссө, нюжөдіс өша-

* Тайө ме тіянөс аттьөала (фр.).

** Енмыс век сетө гачсө налы, кодлөн бекйис абу... (фр.).

лысь зонтика кисö, а мöднас лэптыштис рытъя кузь платтö бöждорсö,— Николайлы нöшта на долыдджык лои: «Рытъя платтöа,— сідзкö, лöсьöдчис жö кино бöрын кытчöкö ветлыны»,— и бергöдыштис сылысь чуня кепысь помсö, окыштис еджыд кисö.

— Коньöрöй, тi важөн нин виччысянныд?

— Ог, сöмын на локтi. Мунам öдйöджык таксиö...

Ыззöм сьölöмөн Николай сölis Ольга бöрся джынвийö пемыд, уль нойөн öвтысь каретаö. Туй чукультанiнын каретасö ёнакодь докнитлис, пытшкöссö здук кeжлö югзöдлис пöнар,— мужичöй кöсйытöг кутыштис аньöс коскöдыс, кылис бан боксыс пудра дуксö, аддзылис гöгрöс пидзöсьяссö рытъя сьöд платтö увсьыс, ворсöдчысь сьöд синъяссö да гöрд помадаа кызiник паръяссö, и быттö дзик мöд ань пукалис ськöд орчтөн.

Пемыд залын найö видзöдисны лым еджыд экранöд пöлöсөн лэбалысь да кымöръясö усьласысь, гулыда жыныгысь, пласъткысысь аэропланъяс вылö и гусьöник сёрнитисны:

— Тi öтнаныд оланныд? Либö кутшöмкö пöдругакöд?

— Öтнам. Збылысь кö, зэв лөк сэнi. Отельыс эськö сöstөм, шоныд, но, гашкö, сöмын öти вой колявны либö нывкöд душмöд час кeжлö пыравны... Квайтöд судта, лифтыс, дерт жö, абу, нельöд судтаын сод вылас гöрд коврикыс помасьö... Войнас кö зэрö, нöшта на гажтöм. Восьтан öшиньтö — öти морт оз вуджорт, карыс быттöкö кулöма, улiас öти пöнарыд эм ли абу... А тi, кöнкö, гöтыртöмөсь да отельын жö оланныд?

— Пассиын менам эм нейджыд патера. Ола öтнам. Водзынджык овлi Парижын. Öти кадö Провансын кöртымалi ферма, кöсйи ставсьыс öддортчыны, овны аслам удж помысь, но, кыз шуласны, сүйöй вöсни вöлöма. Босьтi отсасысьö öти казакöс, да юысь вöлöма, кодалiгас öбичатöм и. Лöсьöдлi курöгъясöс да кроликъясöс — чергöдчисны. Öтчид мулöй ачымöс тшук эз йир,— зэв скөр да тöлка пемöсыс... Сідзи и олi öткөн. Гöтырöй Константинопольын нин пышйылис.

— Шмонитанныд?

— Ньöти ог. Абу ме öтнам сэтшöмыс. Qui se marie par amour a bonne nuits et mauvais jours*. А менам и сэтшöмыс этша вöлi. Шыбитис гöтрасьöм бöрын мöд вонас.

— А öнi сийö кöнi?

— Ог тöд...

Ольга дыркодь чöв олiс. Экрaнöд йöй моз котралiс паськöдöм кок лапаяс вылас ыджыдсьыс-ыджыд киссьöм башмакъяса, юр вылас боквыв пöлынтьöм шляпаа, Чаплинлань мунысь морт.

— Тiянлы, кöнкö, гажтöм öткөнтö олигад,— кайтыштис ань.

— Да. Но колö терпитны. Patience — medecine des pauvres**.

— Зэв гажтöм medecine.

— Да, абу гажа. Та понда,— серамсорөн водзö висьталiс Николай,— ме корсюрö весиг «Иллюстрированная Россия» листавлi; сэнi эм сэтшöм юкөн, кöнi йöзöдöны татшöмсяма юөръяс: «Латвияысь роч ныв гажтöмтчö, кöсйис эськö письмöасьны бур сьölöма роч парижанинкöд и корö ыстыны фотография... Русыд юрсиа авъя ань, абу том, но мичаник, öкмыс арöса пиа дöва,

* Радейтöмөн гöтрасьысьлөн войясыс лöсьыдöсь, а лунъясыс лөкөсь (фр.).

** Терпеньö — гöльяслөн медицина (фр.).

көсйö письмöасыны нелямын арöсысь абу томджык төлка-лада мужичöйкöд, кодi уджалö шоперөн либö кодөнкö мөдөн и радейтö семья. Абу быть интеллигентной...» Зэв лöсыда сйöс гөгөрвоа — абу «бытьсö».

— Тi мöй некодкöд онö ёртасьöй? Тöдсаясныд көть эмöсь?

— Ёртасьнысö ог ёртась, а тöдсаяссьыд төлкыс абу.

— Кодi нö овмöснытö бергөдö?

— Овмöсид менам абу ыджыд. Кофесö пуа ачым, пуся ачым жö. Рытланысь волö femme de menage*.

— Коньөрöй!— шуис Ольга сылысь кисö шамыртолмөн.

И найö дыр пукалисны рöмьдас кинас кутчысьмөн да быттöкö видзöдисны экран вылö, кодлань налөн юръяс весьттi мунис бөрладор стенбокса кабинаысь лöзоват нисьö еджыд руа югөр. Чаплин моз ворсысь актёрлөн повзьöмысла юрсьыс торъялис нямралöм шляпаыс, и сйö тшынасьысь самöвар трубаа киссьöм машинашой вылын ыджыд öдөн лэбис телеграф сюръя вылö. Громкоговоритель равзис уна пölös мыла гөлöсөн. Улыс, папирос вöсна тшына залыс,— Ольга да Николай пукалисны балкон вылын,— ойдис кекöнач сора долыд ваксьöмөн. Мужичöй копыртчис ань дорö:

— Тöданныд мый? Ветламöй кытчöкö Монпарнас вылö, танi гажтöм, да и лолавнысö нинöмөн...

Ольга довкнитис юрнас да мөдис перчаткиасыны.

Найö бара пуксисны джынвийö пемыд каретаö да кутисны видзöдны зэрысла дзирдалысь стеклöяс вылö. Стеклöясыс öтарö öзйивлисны пöнар бияслөн уна рöма алмазьясөн, а пемыд ывлаын биясыс пöртмасисны то вир чутъясөн, то югъялысь реклама-ясөн. Николай бара кусынтыштис анылысь перчатка помсö да кузя окыштис кисö. Ольга видзöдлис сы вылö са сьöд кузь синлысьяса тешкодя лöсталысь синъясөн да надзöник кутис матыстыны сылань чужöмсö, юмов көра помадаа яя вом доръяссö.

«Coupole» кафеын найö первой сёйисны устрицаяс да анжу, та бöрын корисны вайны байдөгъясöс да гөрö бордо. Виж шартреза кофе юигөн найö гажмыштисны. Ёна куритчисны, пепельницаыс тырис анылөн вир рöма чигарка помъясөн. Николай сёрнитiгкостыс видзöдис сылөн öзйысь чужöм вылö да думайтис: «А сйö мича».

— Но висьталöй нин,— шуис Ольга, кыв йывсьыс табак чиръяссö чепölөн босьталiгмоз.— Тiян öд кодкö вöли тайö во-ясас?

— Вöли. Но тi асьныд гөгөрвоанныд, кодi. Войся отельяс... А тiян?

Ань чöv олыштис:

— Да вöли öти... Но ме ог көсйы та йылысь сёрнитны. Зонка, сутенёр... А кызди тi гöтырыдкöд торъялiнныд?

— Юръяндзим эськö да... Зонка жö вöли, мичаник грек, вель озыр. И төлысь-мөдөн сöстөм, вежавидзысь нывка нач вежсис. А öд водзынджык сйö еджыд армиясö, ставнымöс миянös, Енмö лэптö вöли. Кутис ветлөддыны грекыскöд Пераын медся дона кабакö, мöдыс пондiс ыставны сылы дзоридзьяса ыджыдсьыс-ыджыд көрзинаяс... «Ог гөгөрво, мыйла тэ вежöгтан

* *Волывлысь гортса уджалысь (фр.).*

менö сы дорö? Тэ лунтыр он эшты, а тайö шань зонкаыс менö гажöдö, и всё...» Шань зонка! Аслыс сöмын на кызь арöс. Сьöкыд вöлі сійöс вунöдны,— важъясö, екатеринодарсасö...

Тшöтсö вайöм бöрын Ольга нуöдiс сійöс син пырыс да тшöктiс сетны прислуга вылас дас прöчентысь эз унджык. И час джын кольöм мысти янсöдчöм йылысь мöвпыс кыкнанныслы кажитчис тешкодъөн.

— Мунам ме дорö,— норпырысь шуис Николай.— Пукалыштам, сёрнитыштам...

— Да, да,— чеччигмозыс вочавидзис ань, босьтiс сійöс ки пöлöдыс да топöдiс кисö ас бердас.

Войся шоперыс, роч, вайис найöс йöзтöм уличкостö, джуджыд керкаö пыранiн дорö, код весьтын шыблас тыра жöч тшанö киссис зэр газ пöнарлөн эзысь би улын. Найö пырисны югзьысь водзпомö, сэсся ньöжйөнник кыпöдчисны дзескыд лифтөн, дзигöдчöмөн да гусьөнмоз окасöмөн. Мужичöй удитiс сүйны ключсö öдзöс томанас биыс кустöдз да пыртiс аньöс пöрччысянинас, сэсся ичöt кухняö, көнi люстраын гажтöма öзйис сöмын öти лампочка. Чужöмъясныс налөн вöлі мудзöмаöсь нин. Николай вöзйис юыштны вина.

— Ог, сёшайтöй,— шуис Ольга,— ме ог нин вермы.

Мужичöй эз öвсьы:

— Юам еджыдсö көть öти бокал, öшинь сайын менам зэв бур пуи* сулалö.

— Юöй, сьöлөмшöр, а ме муна пöрччыся да мысся. И вода узыны. Ми абу челядь, и тi, көнкö, гөгөрвоинныд: ме кө тiянкöд көсийиси мунны, сiдзкö... Да и мыйла янсöдчынысö?

Шызьöмысла Николайлы эз сюр вочакывйис, сійö кыв шутöг кольöдiс аньöс узылан жырьö, көнi осьса öдзöс пыр тыдалiс ванна жырьыс, öзталiс бияссö. Танi лампочкаясыс ломалiсны югыда, гөгөрбок ымралiс, сэк жö керка вевтö тэрмасьтöг таркöдiс зэр. Ольга дзик пыр заводитiс пöрччыны кузь платтьöсö юрöдыс.

Николай петiс, юис дорвыв кык бокал йиа курыд вина и эз вермы кутчысьны да бара мунiс узылан жырьö. Узылан жырьын, паныд стеныввса ыджыд рөмпöштанын, ясыда тыдалiс югзьöдöм ванна жырьыс. Ольга сулалiс сылань мышнас, пасьтöм, еджыд, тувкыд, мыссян дозлань копыртчöмөн мыськис голясö да морöссö.

— Татчö оз позы!— шуис ань, плавгис вылысас халат, но эз сайöд кисьмöм морöссö, еджыд зэлыд кынöмсö да еджыд топыд лядьвейяссö, матыстчис да верöсöс моз дзигöдiс Николайöс. Мужичöй воча дзигöдiс сійöс гöтырöс моз жö, окалiс мыссян майтöг дука вакодъ на морöссö, краситтöм синъяссö да вом доръяссö...

Лун мысти Ольга дутдiс уджавнысö да овмöдчис Николай дорö.

Öтчыд төвнас Николай ышöдiс сійöс босьтны аслас ним вылас Лионскöй кредитын сейф да пуктыны сэтчö Николайөн нажöвитöм став сьöмсö.

— Быдторсьыс колö видзчысьны,— висьталiс сійö.— L'amour fail danser les anes**, и ме кыла ачымöс кызь арöса моз. Но мыйыс оз овлы да...

* Пуи — вина сорт.

** Муслуныд весиг осёлъясöс йöктöдö (фр.).

Ыджыд лун вежонё коймод луннас Николай куліс метро вагонин,— газет лыддигмоз виччысьтөг чатөртис юрсö пуклос бөрлань, кылөдіс синъяссö...

Кор Ольга съод паськөмөн локтіс шойна вывсянь, вөлі тувсовъя гажа лун, парижса югыд енэжод корсюрö кывтісны тувсовъя кымөръяс, и ставыс висьталіс том да помтөм олөм йылысь — и аньлөн помасьөм олөм йылысь.

Гортас Ольга кутіс идравны патерасö. Коридорын, стенпытшса шкапын, син улас усис Николайлөн гожа важ шинельыс, гөрд увтыса, руд. Ольга босьтіс сійөс тувсьыс, топөдіс чужөм бердас да сідзи и пуксис джоджас, став вир-яйнас сыркъялөмөн да горөдлөмөн корис кодлыськө прöща.

Комиөгис Алёна Шомысова.



ПЫДДИ ПУКТАНА АВТОРЪЯС!

Редакцияö гижөдъяснытö ыстігөн быть колö юртны:

1. Ассьыныд ним, вич, ов; кор да көні чужлөмныд (лун, төлысь, во).
2. Паспорт юбръяс: номер, серия, кор да көні сетісны, гортса адрес (прописка серти).
3. Индивидуальной налогөвöй номер — ИНН (кодлөн эм).
4. Страхөвöй свидетельство номер.

Тайс юөрттөг редакция гонорар оз вешты.

*Журналын йөзөдтөм гижөдъяс
редакция оз рецензируют и авторыслы найс оз мөдөд.
Редакция оз век во öти кывйö авторъяскөд.*

Комп. набор и верстка **Н.Кузнецова**. Корректор **Т.Югова**.

Адрес редакции: 167982. ГСП-2, г. Сыктывкар, Дом печати, каб. 202.
Телефоны редакции: 24-47-52 (гл. редактор), 24-51-52 (общ. отд./факс).

E-mail: kodzuv@mail.ru

Подписано к печати 11.10.2010. Формат 70х108^{1/16}. Печать офсетная. Усл. печ. л. 7; усл. кр.-отт. 8,4; учётно-изд. л. 7,54. Тираж 825. Заказ № . Регистр. ПИ № ФС 3 - 0226. Публикация материалов по освещению реализации социально значимых проектов осуществляется при государственной поддержке в форме субсидии Агентством Республики Коми по печати и массовым коммуникациям. Отпечатано в ООО «Кировская областная типография», 610000, г. Киров, проезд Динамо, 4.